

WANTOK

Wan Wik, Septemba 30 - Oktobe 6, 2004

NIUSPEPA BILONG OL PNG STRET

NAMBA 1576

K1 tasol

**PES 3:
LO BILONG
KILIM MAN**

**PES 19:
Stori bilong
SANGUMA na POISEN**

**PES 28 - 29:
NRL RAGBI
GREN FAINOL**



Noken guria long kilim man

Neville Choi i raitim

BIPO Sief Jastis bilong kantri, Sir Arnold Amet i tok gavman i noken guria long karimaut lo bilong kilim man.

"Yumi noken hariap long yusim dispela lo bilong kilim man inap yumi glasim gut pasin bilong

yumi yet."

Sir Arnold i mekim dispela toktok long wanpela kibung i kamap long Mosbi long Trinde long glasim dispela lo bilong kilim man.

Dispela kibung i kisim wanpela saveman bilong Ingran, Peter Hodgkinson i kam long givim tingting bilong em long dispela lo, na

opim paitim toktok long en.

Wanpela as tingting bilong dispela kibung em bilong painim ol arapela rot i stap bilong mekim-save long ol man nogut.

Sir Arnold, i mekim dispela toktok bihain long em i tokaut olsem jastis sistem insait long kantri i no redi long karimaut dispela kain lo.

"I gat ol bikpela askim yet i stap we mipela i mas painim bekim. Mi yet mi lukim olsem mipela i nogat inap save na strong bilong karimaut dispela lo. Sapos mipela i laik karimaut dispela lo bilong kilim man, mipela i mas gat ol veliu o i mas i gat wanpela sistem we i soim klia bel bilong ol man, na husat manmeri i wok insait long jastis sistem i mas klia long strong bilong em long bihainim lo," Sir Arnold i tok.

Em i tok kriminol jastis sistem o sistem bilong mekimsave long ol manmeri husat i no bihainim lo i nogat inap strong bilong givim dispela kain mekimsave long ol kalabus manmeri.

"Nau yet, ol wok manmeri insait long jastis sistem i wok long kisim taim. Ol polis i nogat inap mani long karimaut gut wok painimaut long wan wan kes na ol jas inap long asua taim ol i mekim disisen long ol kes bilong wanem ol i stap ol wan wan yet i mas mekim. "Sapos yu askim mi sapos mi inap long karimaut dispela lo bilong kilim man, mi bai tokim yu olsem mipela i nogat strong bilong karimaut dispela lo," em i tok.

Sir Arnold i tok pablik sevis i gat bikpela hevi long sait bilong pasin bilong ol wok manmeri, ol manmeri i no yusim gutpela tingting bilong sindaun isi, na pasin bilong ol lida bilong kantri tu i no gutpela.

"Mipela ol lida i go inap ol wan wan manmeri, mipela i gat wanem kain pasin tru? Mi laik singaut long olgeta lida insait long kantri, yumi noken guria long yusim dispela lo bilong wanem mipela i no redi, na planti lida manmeri i mas senisim pasin bilong ol pastaim," Sir

Arnold i tok.

Em i tok em yet i mekim wok painimaut long wok bilong wanpela saveman bilong det penelti na dispela man i tok olsem dispela lo bilong kilim man i no save senisim o daunim pasin bilong ol man i kilim ol arapela manmeri.

Em i tok kantri na gavman i mas lukluk gut pastaim na noken hariap i go insait long yusim dispela lo.

Gavman nau i wok long traim painimaut moa long dispela lo. Minista bilong Jastis, Mark Maipakai i bin stap long dispela kibung na i tok em i wok long go pas long wanpela teknikol tim husat i go raun pinis long Singapore long lukim ol i karimaut dispela lo bilong kilim man olsem wanem.

Em i tok ol i givim ripot bilong raun bilong ol i go long Singapore i go long Nesenel Eksekutiv Kaunsol (NEC) pinis.

Nau ol bai go raun long Ingran na Amerika long glasim ol i yusim dispela lo tu.

Tasol Mista Maipakai i tokaut tu olsem gavman i luksave olsem ol i mas kisim tingting bilong olgeta arapela sekta insait long kantri pastaim long ol i karimaut dispela lo.


Dispela kibung we Hai Komislin bilong Ingran i bin go pas long en em i namba wan kibung. Neks wik bai i gat namba tu hap bilong kibung we bai wanpela saveman bilong Ingran bai kam na toktok long ol bikpela hevi olsem man i kilim na bagarap ol arapela manmeri.

"Lukim moa ripot long lo bilong kilim man long PES 3.



TRAMONTINA Bush Knives

- Top quality bushknives with stainless steel sharp edges
- Available in wooden and poly handles



Exclusively distributed
by Brian Bell and
authorised dealers
nationwide

Brian Bell
Shop with a friend

PLAZA 325 5411 HOME CENTRE CITY, GORDONS 325 8469 LAE HOMECENTRE CITY 472 3200 GOROKA 732 1622 DISCOUNT HAUS 477 3905 KOKORO 322 3027 MT HAGEN 542 1993 MADANG 592 1659

Polis Ripot

Lae:

Bihain long lukim wanpela vidio long narapela hap, wanpela meri i ting olsem wanpela man em i save long en bai karim em gut i go bek long haus bilong em long Nawae Blok long Lae las Sarere. Nogat. Dispela man husat i sapos long was long em, tanim bek na pulim em i go insait long hap graun bilong ol lain i stap klostu long haus bilong em na reipim em. Polis i holim pasim pinis wanpela man na i wok long lukluk i go insait long dispela birua.

Vanimo:

Wanpela Filipino namel long ol 7-pela man husat ol atoriti i no larim long lusim kantri, i tok olsem ol polis na kastams opisa i bin sutim tok nating long em, sasim em na bihain kalabusim em. Ol loya bilong em, Henao Lawyers, i tok olsem ol polis na kastams i bin mekim we bilong ol i go insait long hap bilong dispela man, paitim ol sekyuriti gad na wokmanmeri bilong em, taim ol i go long kisim wanpela kontena we ol i tok dispela man i nogat rait long holim i stap long hap bilong em.

Nupela bareks bilong polis mobail skwat

NIUGINI Ailan rijon bai i gat wanpela moa polis mobail grup insait long rijon bilong ol. Dispela bai bringim namba bilong mobail skwat bai i go antap long tripela.

Na dispela mobail skwat bai i stap long Talasea insait long Kimbe, Wes Nu Briten provins.

Polis Komisina, Sam Inguba, i tokaut long dispela las wik bihain long wanpela kibung bilong olgeta bikman bilong polis insait long kantri i bung.

Komisina Inguba i tok dispela bai stopim wanpela rot bilong haus. Haus nau i wanpela bikpela hevi insait long polis fos. Na taim mipela i luksave long haus, em i ken mekim ol polismanmeri i slip gut long haus na mekim wok gut.

Em i mekim dispela singaut bihain long wanpela bikpela bung bilong ol polismanmeri bilong Niugini Ailans long Kimbe las wik.

Samting olsem 3,000 man na meri i bin kamap long Kavagura stesin long Talasea long lukim opim bilong

haus projek long las Fonde.

Dispela kibung i soim pinis mak bilong wokim mobail bareks, we planti singsing grup na presen i bin kamap wantaim bikpela kaikai.

Komisina Inguba tu i tok amamas long AusAID long painim mani olsem K3.2 milien we bai yusim long baim ol yunifom bilong polis.

Em i tok tu long ol polismanmeri olsem ol i mas wok bung wantaim long putim kamap tru ol samting ol i bin plen long en long 2005.

Dispela kibung em namba wan taim bihain long em i kamap komisina bilong polis fos. Na long wankain taim tu em i tok welkam long nupela polis komisina bilong NGI rijon Fred Sheekiot.

Dispela em namba tu bareks bilong mobail insait long kantri, we i kamap aninit long Komisina Inguba.

Narapela em i stap pinis long Bulolo insait long Morobe provins, we Morobe Provinsel Gavman i papa long en wantaim mani olsem K100, 000 long wokim mobail bareks.

Ol ripot bilong kibung bilong ol polis komisina wantaim Bustin Anzu.

Senis long mani i go long rijon

KIBUNG bilong ol polis komisina long Kimbe las wik i tok olsem bai i gat sampela senis long ol mani bilong olgeta mun.

Dispela i soim olsem ol wok bilong ol long olgeta mun long 41 i mas i kam daun long 11 tasol.

Dispela senis i min olsem olgeta asisten komisina long ol rijon bai i gat bikpela wok

long lukautim ol dispela mani. Na ol dispela mani bai i kam long ol long mekim ol wok insait long rijon bilong ol.

Deputi Komisina bilong operesens Gari Baki i tok aut klia olsem ol mani bai i no inap go long ol ektiviti menesa olsem pas-taim ol i save mekim.

Em i tokim ol sinia polis opisa olsem ol

bai kisim helpim long ol divisinel komanda bilong ol taim ol i gat hevi.

Em i tok klia tu olsem wok bilong ol ECP bai i stap tasol long Pot Mosbi, we olgeta samting i save kamap long NCD tasol.

Em i tokim tu ol provinsel polis komanda long wokbung wantaim ol provinsel gavman long kisim moa helpim long ol.

2005 baset bilong polis i go daun - Deputi Komisina Kulunga

NESENEL gavman i tok orait long katim baset bilong polis long 2005 wantaim mani mak bilong K18 milien tasol.

Deputi Komisina bilong polis long sait bilong edministresen, Tom Kulunga, i tokaut long dispela long bung bilong polis komisina long Kimbe las wik.

Em i tok plis dipatmen i bin wokim pepa i go long nesenel gavman long givim polis sampela mani antap liklik. Tasol gavman i givim ol K18 milien tasol, we i sot long K2.5 milien long baset bilong las yia.

Mista Kulunga i tok baset i tait na dipatmen mas yusim sampela rot long lukautim gut dispela fand o mani.


Em i tok taim gavman i taitim baset bilong em long wanem i gat kainkain hevi long sait bilong mani, polis fos i mas amamas long gavman long dispela iekonomik driven rot na

helpim ol yet long wokim sampela rot bilong painim mani bilong ol yet olsem trafik fain o sas na rental peimen.

Mista Kulunga i tok ol i mas wok strong long lukautim mani bilong ol yet.

Em i tok polis fos mas nau was gut long ronim dispela K18 milien baset. Sampela bilong ol dispela rot em long; painim rot bilong stretim ol hevi ausait long kot setelmen; lukautim gut rot bilong yusim pawa na wara long ol polis bareks; stretim ol dinau bilong bensin bilong ol ka bilong dipatmen na; bai i nogat moa polis rikrut long yia antap.

Polis Komisina Sam Inguba i tok tu olsem ol dispela 100 nupela rikrut bilong Bogenvil i sotim tru mani bilong dipatmen olsem na sampela mani bilong sampela wok, ol i bin putim go long dispela wok.



Ol namba wan rikrut bilong Bogenvil husat i bin i go skul long Bomana Polis Koles long Pot Mosbi na i kam bek gen long ples long mekim wok.

Plantil ol bikmanmeri na ol pipel tu i bin amamas long dispela tingting we i helpim sindaun long Bogenvil.

Komyuniti polising i no ron stret - Pascoe

KOMYUNITI Polising insait long Nesenel Kapitel Distrik (NCD) i no ron gut tumas maski planti hatwok ol polismanmeri i mekim long kamapim strong dispela tingting.

Bosman bilong AusAID Projek Namba 3 Peter Pascoe i tokaut klia long dispela hevi long wanpela bikpela kibung bilong ol polisman long Kimbe insait long Wes Nu Briten provins las wik.

Pascoe i mekim dispela toktok bihain long putim tingting bilong en long program bilong Projek III.

Em i tok wanpela bikpela hevi em long wanem i nogat inap polisman na polismeri long wok bilong komyu-

niti polising long Waigani Polis Stesin we opis bilong ol i stap long en.

Em i tok long ol narapela hap senta, dispela wok bilong komyuniti polising i ron gut long wanem i gat planti polisman na meri i save wok i stap. Tasol dispela i no wan kain long NCD.

Em i tok tu olsem planti hap tingting long wanpela opisa long wok fultaim tasol ino gat gutpela supevaisa na dispela i save soim les pasin na mekim ol narapela wok gen.

Bos bilong AusAID Pascoe i tok wok bilong ol tu long Projek III bai pinis klostu tasol dispela i no min olsem ol bai lusing RPNGC. Bai i



Wanpela komyuniti polising wok we i bin kamap long Morata long Pot Mosbi long helpim ol mama.

gat helpim i kam yet aninit long dispela nupela ECP, we bai i gat ol Australia polismanmeri bai kam wok wantaim RPNGC.

Narapela rot em tok long Lo na Oda Jastis Sekta Program (LJSP), we bai kisim ples bilong Projek. Nau yet rot i stap long kamapim ol gutpela rot long stretim ol dispela hevi.

Taim lukluk gut long wok bilong komyuniti polising, em i tok i bin gat planti skul na awenes ol i bin holim skul bilong HIV/AIDS na ol narapela skul na woksop. Samting olsem 1856 awenes, skul na woksop ol i bin holim pinis insait long kantri aninit long wok bilong AusAID projek.



Sekim strong bilong lo bilong kilim man

Neville Choi i raitim

WANPELA kibung long Pot Mosbi i tok gavman i mas lukluk gut long strong bilong lo bilong kilim man o det penelti pastaim long em i karimaut.

Ol i mas skelim sapos dispela lo bai inap long daunim ol hevi bilong lo na oda we ol man i save kilim ol arapela manmeri. Tasol em bai i no pinis long hap. Ol i mas lukluk tu long ol wanem samting i stap long as bilong ol hevi bilong lo na oda.

Dispela kibung we Hai Komisn bilong Gret Briten i go pas long kamapim i kisim tingting bilong Peter Hodgkinson, wanpela saveman bilong Ingran husat i gat bikipela save long lo bilong kilim man na strong bilong en.

Ol arapela bik manmeri husat i bin mekim toktok long dispela lo em Mike Manning, Dairekta bilong Institute bilong National Affairs, Eking Presiden bilong Nesenel Kaunsol bilong ol Meri, Nahau Rooney, Anglican Bisop bilong Pot Mosbi, Bisop Peter Fox, Lt Col James Laki bilong National Research Institute na bipo Jastis Minista na bipo Spika bilong Nesenel Palamen, Bernard Narakobi.

Mista Hodgkinson i toktok long laip bilong

em long Ingran we em i bin wok wantaim ol kalabus man husat i kilim dai arapela man inap long 15 ya.

Em i tok long Ingran, gavman i bin luksave long dispela lo bilong kilim man, tasol bihain, ol yet i bin rausim dispela lo.

Tasol bikipela samting we Papua Niugini i mas mekim em long glasim gut strong bilong lo bilong kilim man.

Mista Hodgkinson i tok hevi bilong lo na oda na pasin we ol man i save mekim long kilim arapela i save gat kain kain as bilong en.

Planti taim ol manmeri i save kilim arapela i save gat hevi long moni, hevi bilong nogat gutpela skul o helt sevis. Sampela taim ol dispela kain hevi i save kamap bilong wanem ol papamama i no save skulim gut ol yangpela taim ol i bikipela. Nogat gutpela skul bilong onaim arapela man o meri na nogat ona o rispek bilong ol lo bilong kantri.

Mista Hodgkinson i tok olsem long olgeta kantri long wol, i gat ol manmeri i save kilim ol arapela manmeri. Tasol bikipela samting em long glasim wanem samting i stap long as bilong ol manmeri i save mekim olsem.

"Kapitel panismen o det penelti em i wan-

pela polisi bilong kalabus we i bikipela long Amerika. Na olgeta paitim toktok i save bikipela long sait bilong Amerika tasol. Tasol dispela lo i gat ol hevi bilong em tu we i wok long kamap ples klia tude yet," Mista Hodgkinson i tok.

Em i tok ol kantri olsem Saina, Saut Korea, Taiwan na Nigeria i yusim dispela lo i stap na Vietnam i wok long skelim na tingting long yusim. Tasol long sait bilong Papua Niugini, bai gavman i mas painimaut long wanem as tru na ol manmeri i save mekim ol bikipela birua olsem kilim dai arapela man.

Em i tok as tingting bilong dispela lo em bi-long stopim ol manmeri long mekim ol bikipela asua olsem kilim arapela manmeri.

Tasol em i tok olsem i nogat wanpela ripot o wok glasim i soim olsem lo bilong kilim man i save stopim ol arapela manmeri.

Misis Rooney i toktok long sait bilong ol lain husat i karim hevi bilong ol man i kilim wanfamili bilong ol, Bisop Peter Fox i toktok long sait bilong buk baibel na toktok long pasin bilong bekim bek, na Mista Narakobi i toktok long lo na taim gavman i kisim dispela lo bilong kilim man i kam bek long 1991.

Yawari i tok Sauten Hailans i ples bilong mekim bisnis

GAVANA bilong Sauten Hailans provins Hami Yawari i tok olsem Sauten Hailans provins i no sot long mani. Provins i gat ol oil na ges na ol pipel i gat mani long strongim ol wok bisnis insait long provins.

Mista Yawari i tok ol bikipela bisnis insait long Mendi i nogat gutpela as long pasim bisnis bilong ol bikos provins i gat mani i ron.


Mista Yawari i mekim dispela toktok long bekim ripot olsem ol bisnis long Mendi i laik pasim dua bikos i nogat mani i ron long provins.

Gavana i tok em bisnis bilong ol dairekta na bod bilong ol dispela bisnis sapos ol i laik pasim bis-

nis bilong ol na karim i go long narapela hap em laik bilong ol tasol. Bikos ol pablik sevens tu taim ol i save kisim potnait em laik bilong ol long go long Haggen na baim ol samting long stua long hap. Dispela em samting bilong ol bisnis na menesmen bilong ol yet we provinsal gavman i nogat wanpela samting long mekim long ol.

Mista Yawari i tok sapos haus sik na skul i gat hevi em nau em bisnis bilong mi na gavman long toktok na stretim. Tasol long praivet bisnis em samting bilong menesmen na bod bilong ol yet.

Em i askim memba bilong Kendep na Minista



Mista Yawari.

bilong Trensport na Sivel Eviesen long noken subim nus i kam long bisnis bilong Sauten Hailans bikos em i gat 8-pela memba bilong Sauten Hailans i stap long karim hevi bilong ol yet.

Lukim stori long pes 6.

Rausim Gavana Jenerel kot

LOYA Loani Henao long Mande i bin askim Suprim Kot long rausim dispela kot bilong Gavana Jenerel we Sir Pato Kakaraya, wanpela kandidate bilong dispela posisen i bin lus.

Mista Henao husat i makim Sir Paulias Matane i tokim Suprim Kot we Jastis Nicholas Kiriwom, Jastis Gibbs Salika na Jastis Greg Leahy i stap long en i tok dispela olgeta samting Sir Pato i putim long kot bihain long em i lus long resis bilong kamap Gavana Jenerel i no stret olsem na ol i mas rausim.

Ol i bin rausim Sir Pato olsem wanpela man ol i makim long resis bilong Gavana Jenerel long palamen long March 31 long dispela ya taim Suprim Kot i painim olsem we ol i yusim long ileksen long makim Gavana Jenerel long dispela taim i no bin stret na i bin askim palamen long wokim nupela ileksen.

Narapela ileksen i bin kamap long Mei 27 we Sir Paulias i winim narapela faivpela kandidate husat wanpela bilong ol i bin Sir Pato tu we i lukim em i kisim dispela i go long kot. Loya Robert Leo husat i makim maus bilong Sir Pato i tok olsem dispela ileksen i kamap ausait long 10-pela de bihain long sindaun bilong palamen taim spika, Jeffrey Nape i tokaut long ol MP olsem i bin gat spes long opis bilong Gavana Jenerel.

Em i tok tu olsem Mr Nape i no bin skim askim ol MP long palamen long givim ol nominesen na em i no bin kisim ol pepa (Proposal) fom olsem lo i tok na dispela i mekim ileksen ya i no stret. Tasol Mista Henao i tok rot bilong ileksen we i makim Sir Paulias i sanap stret wantaim seksen namba 3 bilong Ogenik Lo long makim bilong Gavana Jenerel.

Rausim olgeta hos res masin

POLIS komisina, Sam Inguba, long Mande i tokaut olsem em bai wok bihainim oda bilong Pablik Akauns Komiti (PAC) long strong long opere-sen bilong ol hos res masin husat ol i no save bihainim lo.

Tasol em i tok dispela oda i no holim em na nogat man, wantaim siaman bilong PAC John Hickey (Bogia MP) i gat pawa

long givim em oda. Mista Hickey i bin salim wanpela pas i go long Mista Inguba las wik long tokim em olsem Komiti (PAC) i bin painimaut olsem planti lo aninit long Geming Masins Ekt (lo) bilon 1993 we planti kampani na ol manmeri i brukim wantaim opere-sen o wok bilong ol hos res masin long ol hap bilong siti.



Sampela wanwok bilong mipela em ol maus pas lain tasol taim ol i laik singsing taim ol i kisim marasin bilong ol man, bai yu kirap nogut ya. Taim mipela i bung long banis bilong wanpela wanwok niusman long las wik, olgeta niusmanmeri i kilim skin long singim olgeta singsing bilong ovasis stret. Tasol wanpela mauspas bilong mipela em winim mipela tru long singsing na emi go pas long olgeta singsing bilong dispela nait. Sore husat bai holim em.

Wanpela bikman i save salim niuspepa i hatim mipela long noken wasim han long paip wara insait long banis bilong BSP benk long Waigani. Em yet i wasim han na tek bilong em gut tru na pulapim long plastik na karim i go. Em hatim bos bilong Wantok olsem em praivet wara bilong ol na em i save was long dispela tep wara. Gutpela tru na nogat man i singaut long sekyuriti bilong BSP benk. Em orait neks taim yu kam gen bai mipela singautim sekyuriti.

Inap gavman i toksave klia long husat em minista bilong Lens Dipatmen na husat em Deputi Prais Minista. Mipela i no harim liklik nem bilong dispela tupela posisen olsem na sapos husat i gat save liklik orait tokaut long mipela tu long Wantok Niuspepa. Taim bilong baset i kam klostu na salens bilong oposisen tu i stap yet ya.

Rot long Buki wof long Finsafen i go long Gagidu em bus karamapim pinis. Em i tru mipela i lukim long mun Julai long dispela ya. Mipela i ron long bus rot i go painim olpela rot na go long Gagidu. Tasol go antap long Elsbeg na Manimba em mipela kalap kalap olsem solwara i bruk na sapos mipela i gat sik, ating bai mipela go stret long Braun haus sik ya.

Wanpela susa i tokim mipela olsem em i no laik kam long Mosbi bikos Lae em swit tumas. Masta bilong em i kam wok long Mosbi pinis na em wantaim ol pikinini i stap yet long Lae. Paps, ating bai yu tokim kampani na go bek long Lae o olsem wanem.

Taim yu ron long bas noken tromol han nabaut i kam ausait long bas long traime tasim ol arapela manmeri i wok about long rot. Sapos yu laki long tasim ol em orait tasol sapos ol i holim han bilong yu bai yu yet nau. wanpela stail man i laik tasim ol meri long rot taim em i ron long bas na ol holim han bilong em na pulim na turangu ating hap han bilong em i mas lus pinis ya. Dispela pasin i kamap long Mande apinun long Godens maket rot.

Taim bilong kuka nau na yupela i mas lukluk gut na baim kuka. sampela i tok taim bilong mun yu ken baim ol kuka meri bikos mit bilong em bai planti na pulap tru. Wanpela susa i komplem olsem kuka emi karim i go long haus i nogat mit long en na em wanpela bun nating kuka stret. Plis ol lain bilong salim kuka, salim gutpela kuka em abus bilong mipela planti lain ya.

Tok lukaut olsem bai bikipela drai taim bai kamap long planti hap bilong PNG wankain olsem bipo long 1997. Planti ol provins arere long nambis i mas was gut na stretim gut ol kaikai na ol wara na ol samting nau bikos dispela drai taim i kam bai yumi ken redi long stap laip na stap olsem yumi save i stap. Bikipela samting em yumi stap klostu long ol niuspepa na redio long harim moa toksave bilong dispela bikos em bikipela samting long laip na sindaun bilong yumi long ples.

Ol sapota bilong Roosters na Bulldogs i wok long skin kirap long lukim gren fainel long dispela wiken. Wanpela bikman bilong mipela tu insait niusrum i wok long amamas long tim bilong em Roosters i go long dispela las pilai. Samting tru, em tim bilong em i Sharks, tasol Sharks i dring wara na nau em i laik harim ol Roosters i krai.

Bikipela amamas i go long ol dispela tupela tim na ol sapota, plis lukluk long gem isi ah. Noken paitim man o meri.

NARI i tok lukaut long hat bilong san

OL ples arere long nambis insait long Papua Niugini bai bungim bikipela hevi long bikipela drai we i wok long kamap nau. Ol ripot i kamap nau i soim olsem 5-pela provins long Sauten kos bilong kantri bai kisim taim long bikipela drai. Dispela ripot i kam long National Agricultural Research Institute (NARI).

Tasol NARI i tok dispela hevi we ples bai drai i no inap bikipela tumas olsem long 1997 we kantri i bin bungim.

Nesenel Weather Sevis i tokaut olsem ol provins bai bungim bikipela hevi em Westen, Sentrel, Milen Be, Galp na Oro provins. Olsem na NARI bai wok klostu long ol long givim ol tok stia na ol tingting

bilong was long ol yet taim dispela hevi i kamap.

Bai ol opisa bilong NARI bai i go long ol dispela hap na toktok wantaim ol pipel long ol rot na ol tingting bilong lukautim ol yet na wanem samting ol inap mekim long taim nogut olsem we ol bai bihainim ol ripot na save ol i bungim long 1997.

NARI bai givim aut ol toksave na ripot bilong ol nius na ol buk na ol kain rot we ol pipel i ken kisim save long dispela samting.

Ol bai wok klostu wantaim ol provinsal disasta opis long ol wanwan provins long karimaut ol dispela awenes program bilong ol.

Hap Hap Nius

Jumogot kisim mani
bilang kirapim developmen

GAVANA bilong Manus provins, Dokta Jacob Jumogot i tokaut pinis olsem long tupela yia antap bai Manus i lukim wok developmen i kamap bilong wanem em i painim pinis mani i kam long ol developmen patna.

Dokta Jumogot i tokaut long dispela taim em i givim K5,000 i go long kamapim silva jubili selebren bilong wanpela Katolik pater bilong Manus yet, Pater Clement Taulan.

Pater Taulan i wok wantaim sios inap 25 yia olgeta.

Bikpela amamas bai i kamap bihain long dispela yia long luksave long bikpela wok em i mekim bilong ailan.

"Long strongim edukesen insait long provins, mi kisim pinis K7.1 milien long AusAID long sanapim tripela hai skul na tripela komyniti skul," Dokta Jumogot i tok.

Em i tok tu olsem em i kisim K20 milien bilong stretim ol rot na ol arapela haiwe.

Em i tok Esian Developmen Beng i makim pinis K1.5 milien long strongim olgeta samting bilong bot na solwara bai ol manmeri i raun gut.

ENB sanapim komiti bilang lukautim famili

IS NU BRITEN provins nau i gat wanpela komiti bilong banisim famili long ol pasin nogut.

Dispela komiti em nem bilong em Provinsele Famili na Seksuel Vailens Eksen Komiti (FSVAC).

Long ol yia i go pinis, Is Nu Briten i save kisim bikpela nem nogut long ol famili i save painim hevi taim ol papa i save bagarapim pikinini wantaim pasin nogut.

Tasol nau ol i sanapim dispela komiti, komyniti yet insait long provins i soim olsem ol i laik daunim dispela bikpela hevi we i wok long bagarapim planti famili tru.

Dispela komiti bai i wok bilong daunim ol kain kain hevi ol famili i save bungim. Ol bai toksave long olgeta hevi i save kamap na strongim ol to bilong lukautim ol lain turangu.

Bihain long ol non gavman ogenaiesen (NGO), praiwet sekta na gavman i

sanapim dispela komiti, ol i makim wanpela interim eksekutiv we Binam Kakap i kamap siaman, Diuvia Kopman i kamap deputi siaman, Cecilia Pala i holim wok olsem seketeri na Philip Miaba i holim wok olsem tresera. Kakap em i holim wok olsem Provinsele AIDS Komiti Siaman tu.

Kibung we i bin kamap long sanapim dispela komiti i bin kamap gut na ol man i winim namba bilong ol meri.

Eking Siaman Patrick Warangat i tok sanapim bilong ol Child Abuse Prevention Komiti long Kokopo, Rabaul na Gazelle Peninsula i soim olsem ol i gat bikpela wari long hevi bilong bagarapim ol pikinini na ol pasin nogut i save kamap insait long ol famili.

Mista Warangat i daunim ol toktok we ol manmeri i tok Is Nu Briten i gat planti hevi bilong ol pasin nogut na i tok mak bilong ol dispela kain hevi i go daun tru.

Em i tok dispela i kamap bilong wanem i gat strongpela wok nau i kamap long luksave long dispela hevi.

Em i salensim ol pipel bilong Is Nu Briten long daunim ol hevi bilong komyniti na lukluk long strongim famili.

Bikman Sir Ronald Tovue i sutim tok long ol kain hevi olsem i go long bikhet pasin, famili i no sindaun gut, na i nogat toktok namel long komyniti.

Man i go pas long Is Nu Briten Sexual Offences Squad, Roland Funmat, i singaut long olgeta manmeri long yusim gutpela rot, helt na edukesen sevis long kirapim gutpela senis insait long provins.

Sajen Funmat i tok olsem ol pipel insait long Is Nu Briten i laik daunim mak bilong ol pasin nogut i save kamap insait long famili na i wok long kisim strong long autim tok long ol dispela kain pasin nogut we i save bagarapim sindaun.

NIP provinsel asembli kisim nupela memba

NU AILAN Provinsele Gavman i makim tupela nupela memba long Provinsele Asembli.

Dispela tupela man em bisnisman na dairekta bilong Nu Ailan Developmen Koporesen, Walter Schnaubelt, na komyniti lida Elias Salot.

Gavana bilong Nu Ailan, Ian Ling-Stuckey, i bin tokaut long makim bilong dispela tupela man na em i tok olgeta memba bilong provinsel asembli i bin tok orait long tupela i kamap memba.

Mista Schnaubelt bai i makim maus bilong ol yut, na Mista Salot bai mausman bilong komyniti developmen insait long provinsel asembli.

Tupela i bin mekim tok promis bilong ol long ai bilong Sinia Mejistret, Peter Toliken, bihain long ol i tok orait long sanap long asembli.

Mista Ling-Stuckey i tok dispela tupela senis i bin kamap bihain long wanpela riyu i bin kamap long glasim wok bilong asembli. Dispela riyu o wok glasim i save kamap olgeta tupela yia.

Em i tok ol senis i kamap na i soim klia polisi bilong provinsel gavman long brukim pawa bilong provinsel edministresen i go aut long olgeta provinsel memba.

Mista Schnaubelt i senisim bipo memba Eli Toismael na Mista Salot i senisim Steven

Tengis.

Tupela memba wantaim i givim bikpela komitmen o tok promis olsem ol bai mekim gut wok bilong ol na strongim provinsel asembli.

Mista Schnaubelt i tok tenkyu long olgeta manmeri i sapotim em long kisim dispela nupela wok. Em i tok tenkyu long provinsel gavman long bilip bilong ol long en na em i tok em bai wok hat long strongim ol yut insait long provins na komyniti.

"Nau em i taim bilong mekim wok. Yupela i mas redi bilong wanem mi bai no inap sindaun long opis tasol," Mista Schnaubelt i tokim ol yut insait long provins.

Em i givim bikpela luksave long bipo memba Eli Toismael tu long wok em i mekim taim em i holim dispela opis.

Mista Schnaubelt i bin kisim bikpela sapot i kam long Nu Ailan Maimai Asosiesen na ol arapela komyniti opis bilong sanap makim ol yut insait long provinsel asembli.

Mista Ling-Stuckey i tok tupela memba i stat wok pinis, na nau provinsel gavman i wok long lukluk long makim wanpela arapela memba bilong makim maus bilong ol meri na wanpela bilong makim maus bilong ol sios.

Em i tok bai ol i toksave long husat tupela manmeri bai i lukautim dispela tupela wok klostu taim.



• Bisnisman Walter Schnaubelt nau bai makim maus bilong ol yut insait long Nu Ailan provinsel asembli. Long dispela poto em i givim wanpela trak long ol lain bilong Nokon. Em i dairekta bilong Nu Ailan Developmen Koporesen tu.



Kalabus skul long droim piksa

OL KALABUS long Kerevat kalabus long Is Nu Briten provins i wok long kisim skul long dro na disain aninit long wanpela woksop we i bin kamap las wik.

Woksop i yusim skul bilong lainim ol kalabus bilong dro na pen bai ol i ken kisim save na lusim ol pasin

*Helpim ol long lusim
pasin nogut bilong ol.*

nogut bilong ol.

Woksop i bin stat las wik Fonde na i pinis long Mande bilong dispela wik.

Samting olsem 22 kalabus na 6-pela woda i bin skul long dro.

Greta Designs Limited, wanpela disain bisnis i bin go pas long kamapim dispela woksop.

Menesing Dairekta na Art na Disain program dairekta Oseha Ajokpaezi i tok save bilong arts na disain program em i wanpela nupela program we i ol i wok long kamapim bilong ol kalabus bai ol i ken yusim olsem wanpela rot bilong senisim pasin bilong ol kalabus man.

Em i tok namba woksop i bin kamap long Bomana kalabus long Pot Mosbi. Dispela woksop we i kamap long Kerevat em i namba tu tasol.

Mista Ajokpaezi i tok program i lukluk long ol kalabus man tasol ol opisa bilong CIS tu i mas stap bai ol i ken skruim dispela kain skul i go moa yet long ol arapela kalabus man.

Em i tok sapos ol opisa i stap long dispela program, ol bai inap long helpim ol kalabus man.

Hap Hap Nius

Wanpela man skelim
sik long 300 lain

Bung bilong Yunaited Nesens Developmen Progreman long dispela wik i harim olsem wanpela man i wok long raun long Is Sepik provins wantaim sik nogut ol i kolim sik AIDS na givim long planti lain pinis.

Dispela bikpela bung i harim olsem dispela sik man i wok long givim binatang bilong sik AIDS ol i kolim HIV i go aut pinis long samting olsem 300 lain insait long Is Sepik provins. Bung i harim olsem dispela em bikpela hevi tru bikos dispela 300 lain bai surukim namba i go antap moa long bihain taim.

Singaut long kisim
bek kokonas siaman

Ol kopra groa insait long Madang provins i singaut long Minista bilong Agrikalsa na Laivstok long kisim bek Sir John Middleton long wok bilong em olsem siaman bilong Kokonas Industri Kopresen insait long kantri.

Dispela singaut i kam long presiden bilong Sumkar LLG na nau presiden bilong groas asosisen long Madang Mista Nick Mare.

Em i tok Sir Middleton i gat bikpela save na eksperiens long wok bilong kopra insait long kantri na taim em i bin holim dispela wok em i kila gut long wanem samting em i mekim long sait bilong prais bilong kopra na ron bilong kokonas industri insait long kantri.

Pasin bilong stilim ka
i bikpela long Lae siti

Pasin bilong stilim ka i bikpela nau insait long Lae siti long Morobe provins.

Plantit taim ka i save lus insait long Lae siti em ol stilman bilong stilim ka i save mekim long ol lain husat ol i save pasim toktok pinis long ol i baim.

Metropolitan Suprintenden bilong Polis, Simon Kauba, i tokaut long nius long las Mande long ol manmeri na bisnis haus olsem, lukaut husat i gat ka i mas was gut long ka bilong ol long wanem las wik taim wanpela kar i bin lus insait long siti.

Mista Kauba i tok, i gat planti stilman bilong stilim ka i isi tru na rausim spea pats na salim long ol man i baim we dispela pasin ya i kamap bikpela tru insait long Lae siti tude.

Mista Kauba i tok, tambu tru long stopim kar bilong yupela long nait taim.

"Taim yu go long kisim ol man o wantok long rot em dispela i isi long ol man nogut i ken holim yu," em i tok.

Em i tok yupela i mas stopim ka bilong yupela long ol hap we planti lain i save bung o wakabaut long en na tu long ai bilong ol sekyuriti na ol polis i sanap long en.

Dispela em wanpela bikpela hevi nau we polis long Lae i wok long givim toksave long ol manmeri husat i gat ka o i save ronim ka bilong wok, em i tok.

Raikos distrik kalsa so i kamap nais tru

Michael Novingu i raitim

LAS wik Raikos Distrik insait long Madang provins i bin amamasim namba 29 Independens anivesari wantaim kalsa so bilong ol long distrik.

Moa long 15,000 manmeri bilong Raikos distrik na ol arapela distrik long Madang provins i bin kamap bung long soim pasin tumbuna bilong ol long amamasim Independens Anivesari. Dispela kalsa so ya i bin stat long 15 Septemba na i go pinis long 20 Septemba.

Ges spika, Fafuts Ganda, bipo em i spika bilong palamen i tokim ol manmeri long strongim pasin tumbuna bilong yumi. Yumi mas holim na bihainim pasin tumbuna bilong yumi orait dispela em i soim olsem yumi manmeri bilong dispela kantri. Sapos yumi i no holim dispela pasin tumbuna bilong mipela, mipela i no inap kamap independens tru tru.

"Kantri bilong yumi i pulap tru long ol kainkain risos tasol yumi yet i no traim long kamapim ol dispela risoses we i ken kamapim gutpela wok insait long kantri na strongim ikonomi bilong yumi.

"Nogat, yumi save larim ol arapela kantri i save i kam karim i go wokim pinis na i kam salim long bikpela mani long mipela.

"Mipela i save strong long kisim dinau mani long arapela kantri long wokim ol wok bilong mipela. Dispela i solim olsem mipela i no kisim Independens yet.

"29 yia i go pinis na kantri bilong yumi i bihainim sampela rot we i not stret na yumi i kisim planti hevi long ol dispela rot yumi yet i bin kamapim na bihainim.

"Dispela i no ken daunim yumi long kirapim nupela senis bilong abrusim ol hevi yumi i bin bungim pinis.

"Yumi mas wok bung wantaim long trupela na stretpela pasin long kamapim gutpela sindaun insait long ol ples bilong yumi long strongim ikonomi na independens, Mista Ganda i tok.

Long wankain taim, eking polis komanda bilong Madang provins, Jimmy Namora, i tok tenkyu long ol pipel long rispektim dispela 29 yia independens we i nogat hevi i kamap long dispela kalsa so.

Em i askim ol pipel long bihainim lo na oda noken bagarapim nating samting bilong arapela manmeri.

Long dispela rot tasol bai yumi i ken tok olsem yumi trupela independens pipel bilong dispela kantri stret, em i tok.

Ol papa bilong kantri

Praim Minista Sir Michael Somare i bungim lapun bilong palamen na long-taim memba bilong Maprik ilektoret long Independens wok-about bilong em i go long Is Sepik provins long Independens De. Tupela i bin namba wan lain bilong kirapim tingting bilong PNG long kamap lida na kisim independens.



Finsafen rot i bagarap nogut tru

WANPELA bikpela hevi na bagarap ol pipel bilong Finsafen long Morobe provins i bungim em long rot bilong ka. Long las yia 2003 i kam inap dispela yia 2004 Finsafen distrik i kisim bikpela bagarap tru long rot bilong ka we ol i save pulim ka long baklain rop.

Wantok Niuspepa i kisim ripot olsem rot bilong ka long Finsafen i bagarap stat yet long Gagidu stesin na i go pinis olgeta long Pindiu we ka i ron namel long nambis na kamap long kona bilong Mosa Joang i pulap long ol hul na ol baret we ol PMV ka bilong Finsafen maunten i no ron nau yet i kam. Bikos ol daina trak i no inap long ron long kain rot olsem.

Wantok Niuspepa i raun lukim rot long Gagidu stesin na go olsem long Braun Helt Senta Haus sik em i bagarap olgeta we ka save i go i kam na kalap kalap.

Wanpela olpela komyuniti polls long Sattelberg insait long Sililio ples, Butimi Nasingnu, i tokim Wantok Niuspepa las wik i go pinis olsem bipo taim em i gutpela tru. I no olsem dispela taim i kam we i hat tru long kisim ka.

Mista Nasingnu i tok, bipo mipela save kisim ka long maus rot bilong mipela Sililio long 6 kilok moning na i go long Gagidu stesin mipela save i go kamap long taim long hap pas 8 na 9 kilok long wanem rot long bipo em i gutpela, nau nogat.

Lida i gat as long helpim pipel

PASIN bilong bagarapim nem bilong narapela man i no stret tru taim i nogat samting tru bilong soim long dispela kros nating bilong yu.

Sapos yu lukim samting em i stret long tingting na ai bilong yu orait yu i ken tokaut sapos nogat em nogut yu bagarapim narapela brata o susa bilong yu nating.

Dispela toktok i kam long Tuat Bio, wanpela opisa bilong memba bilong Kabwum Bob Dadae bihain long em i lukim wanpela pas i bin kamap long dispela niuspepa wantaim het tok Kabwum distrik plening bung i no kamap gut.

Insait long dispela pas ripot i tok olsem dispela bikpela bung tu i kamap long biknait klostu long 11 kilok nait taim olgeta manmeri i slip pinis.

Long dispela tok Mista Boio i tok dispela i no tru.



The new generation Caterpillar Forklift is born from years of industry leading design experience. A new standard is now set for **reliability, operator productivity, and safety.**

Caterpillar Forklifts delivers on its promise for a cleaner **environment** with automotive style engine controls that reduce gas emissions and diesel smoke.

Discover the higher standard in material handling with **Caterpillar® Forklifts.**

Hastings Deering



• PORT MORESBY - Phone: 300 8300 - Fax: 325 0141
• LAE - Phone: 472 2355 - Fax: 472 1477
• TABUBIL - Phone: 548 9162 - Fax: 548 9155
• RABAU - Phone: 982 1244 - Fax: 982 1129
• LIHIR - Phone: 986 4105 - Fax: 986 4107



Hap Hap Nius

Polis patrol long Hagen siti

Wokabaut patrol long Hagen taun i wok long kamap gut nau. Polis wantaim sapot bilong mobail skwat i wok long wokabaut long strit na askim ol manmeri na sekim ol samting ol i holim long rausim ol birua samting na ol spak brus nabaut. Rijnol Komanda na Asisten Komisina, Geoffrey Vaki, i wok long go pas long dispela.

Mista Vaki i tok bai bikpela komyuniti polising program bai stat liklik taim bihain. Bai ol i kisim ol tripela bikpela haus lain bilong Jika, Moge na Yamka na tu ol setelmen lain insait long siti. Em i tok dispela kain wokabaut patrol tu bai kamap long ol arapela hailans taun long bihain.

Spika givim helpim long ol pipel

Spika bilong palamen, Jeffery Nape, i bin skelim K50,000 i go long ilektoret bilong em long amamasim Independens De we i bin kamap gut tru. Ol i bin amamasim independens de long tripela hap olgeta long dispela taim. Ol singsing grup, bras ben na ol arapela pilai long Nilguma, Tabare na Muaina i bin kamap gut tru.

Plantit tausien manmeri i bin kamap long lukim memba bilong ol husat i bin kamap olsem namba wan spika bilong ilektoret bilong ol long dispela taim.

Em i tokim ol pipel olsem em bai wok strong opim rot long Koge i go long Dumun we dispela inap olsem nesenel rot na bai i stap insait long nesenel baset. Dispela rot we developmen i ken kamap insait long kantri long en.

Memba i givim tu wampela skul trak na arapela liklik projek i go long ol pipel we i kam long Distrik Sapot Grent bilong em.

Ol hap olsem Koge bai kisim wara saplai, Mani kisim helpim long sipsip projek na ol pipel bilong Ku kisim kisim K20,000 long wokim haus man.

Mas Kal raun long ilektoret bilong em

Paulus Tali i raitim

MEMBA bilong North Waghi, Michael Mas Kal, i mekim wampela lukluk raun long ilektoret bilong em las wik we i mekim ol pipel bilong em i amamas long lukim lida bilong ol i kam bek long ples.

Mista Mas Kal em i wampela kendidet aninit long Nesenel Pati na tu em i siaman bilong olgeta Luteran memba long palamen.

Em i save givim taim bilong em long sios na

gavman wantaim.

Las wik Mista Mas Kal i kamap long wampela bikpela selebren long Nondugul distrik we em i bin givim helpim long wampela skul long hap na tu long lokel level gavman bilong ilektoret bilong em.

Long wankain taim Mista Mas Kal i givim tu sampela mani i go long Luteran sios long Kerowagi long namba 70 selebren bilong em.

Karim Lek



Husat i tok ol bikpela manmeri tasol i save karim lek. Em pasin kastam na pasin tumbuna. Ol liklik pikinini i kisim liklik save tu long taim bihain ol i ken save long rot bilong bihainim na karim lek. Ol i traim tasol long Goroka So long las wik. Foto: PATER PHILIP GIBBS

Launa tok long peim hap skul fi

Yakam Kelo i raitim

SIMBU Provinsel Gavman bai peim hap skul fi bilong ol Simbu pikinini long ele-mentri i go antap long gret 12 long neks yia.

Gavana bilong Simbu provins, Peter Launa, i mekim dispela toktok taim em i go sindaun wantaim ol sumatin bilong Simbu na ol wokmanmeri long Goroka Yunivesiti long las wik long pasim skul yia bilong ol.

Em i tokaut tu olsem bai i gat narapela sait helpim na sapot bilong ol Simbu sumatin long ol yunivesiti na arapela bikpela koles insait long Papua Niugini.

Em i tokaut olsem em i laik peim olgeta skul fi bilong ol pikinini bilong Simbu

provins tasol sapos em i mekim olsem bai Simbu provinsel gavman bai bruk daun olgeta. Olsem na em i mas helpim ol papamama wantaim hap.

Mista Launa i tok ol arapela provins ol i gat planti gutpela samting bilong mekim mani long en we i stap long graun na solwara bilong ol. Tasol Simbu provins i nogat kain samting olsem na ol i save kisim strong tasol long wanem mani nesenel gavman i givim long ol olgeta yia.

Em i tokaut olsem ol lida na edministren bilong Simbu provins long pastaim i mekim kainkain pasin na stail we i lukim provins i pundaun i go daun tru na planti samting i no inap sanap strong moa.

Mista Launa i tok sapos em i sanapim

edukesen olsem bikpela wari bilong em, em bai painim mani long sampela rot long peim olgeta skul fi bilong ol skul pikinini bilong Simbu provins. Olsem na nau yet em bai helpim wantaim hap pastaim.

Em i katim pik na givim ol sumatin na tok pilal long ol olsem nau ol i kaikai pik em i katim, ol i bilong em nau na em bai kisim ol i go bek long Simbu long skulim ol pikinini bilong Simbu provins long skul.

Em i tokaut tu olsem bai Gumini Hai Skul bai kamap bikpela long mak bilong sekenderi skul long neks yia we em i makim K800,000 bilong dispela wok.

Em i bin kamap long skul tupela wik i go pinis long opim kompyuta program bilong skul.

PABLIK TOKSAVE

Bai i gat wampela Kot Eksibisen we bai i kamap long namba 4 - 8 de bilong mun Oktoba, 2004 long Lae, Morobe Provins long Melanesian Hotel. Het tok bilong dispela eksibisen em "Bringing Courts Closer to the Public" o "Karim ol Kot i go Klostu moa long Pablik".

Ol manmeri bilong pablik na ol skul i ken go long ol sesen i stat long 9 kilok i go inap 11.30 kilok long moning na 1.30 i go inap 5 kilok apinun long olgeta de.

Long kisim moa toksave, plis ringim Mista Ikiso - Asisten Rejistra, long Telepon: 472 2177 o Feks: 472 2936.

NATIONAL JUDICIAL SYSTEM

Supreme, National and District Court of
Papua New Guinea

COURT EXHIBITION

Theme: *Bringing the Courts closer to the People*

4th - 8th October 2004

Melanesian Hotel, LAE, Morobe Province

CONTACT: Mr. Samuel Ikiso, Assistant Registrar

Phone: 472 2936



Australian Government
AusAID

Stretim gut Mendi - Polye

MINISTA bilong Trensport na Sivel Eviesen, Don Polye, i tok em i no amamas long harim ripot olsem ol bisnis long Mendi taun i pasim bisnis bilong ol.

Mista Polye i tok bikos sampela lain long ilektoret bilong em i wok long serim boda na wan pisin wantaim ol lain long Mendi distrik olsem na taim bisnis long Mendi i pas dispela i kamapim hevi

long ol pipel bilong em long Kendep. Olsem na em i no amamas tru.

Minista em memba bilong Kendep long Enga provins.

Mista Polye i singaut long olgeta nesenel lida bilong Enga long gavman na oposisen wantaim long kamap long wampela bung bilong toktok long wanem kain rot ol i ken mekim bisnis i ron gut long Mendi.

Em i singaut long

Gavana bilong Sauten Hailans, Hani Yawari, long go pas long stretim dispela hevi. Sapos Mista Yawari i no go pas bai provins i gat bikpela hevi tru long han bilong ol lida nau.

Em i singaut tu long olgeta lida bilong Sauten Hailans long lusim kainkain sait tingting na pasin bilong ol i stap longwe na kam bung wantaim long ranim provins na ol pipel bilong provins.

Gavana stopim ol sevis long Isten Hailans

OLGETA gavman sevis long Isten Hailans provins bai stop bikos long pasin hait na stil insait long Dipatmen bilong Fainens na Treseri, Gavana bilong provins, Malcom Kela Smith, i tok.

Mista Kela Smith i givim oda long olgeta gavman opis long pas long Mande dispela wik taim dipatmen baim bai hap milien (K500,000) bilong provinsel gavman grent i go long stretim wampela peimen bilong wampela kampani.

Mista Kela Smith i tokaut olsem ol i bin pasim ol provinsel na distrik opis bikos i nogat mani insait long baset long ranim ol dispela opis long dispela yia.

Bai i nogat sevis long provins bikos dispela peimen i no bihainim lo na i go long dispela kampani.

Mista Kela Smith i tok em i sik tru long lukim kain hait na paul pasin olsem long dipatmen bikos em i tok dispela mani em bilong ol pipel bilong

ples. Ol dispela samting i bin kamap long dispela wik olsem na ripot i tok i nogat bekim i kam yet long opisel bilong nesenel gavman.

Mista Kela Smith i tok gavman bilong em i kisim kot pepa pinis na salim i go long dispela kampani we ol i bin mekim wankain tu long 17 arapela hevi olsem.

Em i tok dispela pepa i bin stap long 1999 i kam nau we opis bilong em i save long dispela bikos opis bilong Atoni Jenerel i raitim ol pepa long stopim peimen inap ol i sekim sapos olgeta samting i orait bihainim to.

Tasol olgeta wok i go het pinis long mekim peimen na Mista Kela Smith i tok dispela mani i kam long provinsel grent we i kam aninit long lo na em i no stret tru long kisim dispela mani na mekim narapela samting long em. Olsem na em i stopim olgeta sevis provins inap dispela grent mani bilong ronim sevis i kam long provins.

Hap Hap Nius

Ol tisa long NCD toktok
long ol senis long ol skul

MOA long 1500 tisa bilong elementeri na praimeri skul long Nesenel Kapitil Distrik (NCD) i bin bung long Waigani Indo Spots bilding long Pot Mosbi long paitim tok long ol senis long we bilong skul o skul rifoms, moayet long yusim ol tokples stret long lainim ol pikinini. Dispela i bin kamap long tupela wik i go pinis. Ol i tok olsem planti ol pikinini i save klia moa long wanem samting ol i lainim taim tisa i save skulim ol long Tok Pisin.

Hiri Moale Festival i bin stail tru

PLANTI manmeri husat i bin lukim Hiri Moale Festival i bin tok olsem dispela so i bin wanpela stail so tru, we i soim tru ol pasin kastam bilong Papua Niugini. Ol turis husat i bin kam long ovasis long lukim dispela festival na ol manmeri husat i bin raun i kam long Pot Mosbi long dispela wiken o i save stap long siti na i bin i go long lukim, olgeta i wanbel olsem tru, PNG i gat kastom na kaisa we i narakain tru long ol narapela kantri. Ol i tok moa so olsem i mas kamap long pulim ol turis i kam long kantri.

Velda Thom i kamap Mis UPNG

TUPELA sumatin bilong Yunivesiti bilong Papua Niugini (UPNG) husat i wok long stadi long han bilong saiens ol i kolim fisiks, i winim taitel bilong Miss na Mista UPNG.

Velda Thom na Rarua i bin winim ol dispela tupela taitel las Tunde nait long dispela resis. Studens Representativ Kaunsil (SRC) bilong yunivesiti i kamapim.

Ol bikpela sponsa bilong dispela resis i bin Eures (PNG), wantaim sapot bilong Second Time Around na Trends Hair and Beauty Salon.

6-pela man na 6-pela meri i bin stap insait long dispela resis, wok bilong ol man em olsem bilong wokabout wantaim ol meri i go antap stej taim ol i laik soim ol kainkain bilas bilong ol.

Mis Thom, husat i bin

amamas tru long win bilong em i tok: "Mi no bin ting olsem mi bai win. Mi wokim long amamas tasol."

Mis Thom, husat i bilong ol provins bilong Morobe na Galp na i stap long namba 3 yia bilong em long UPNG, i winim wanpela tropi, K100 long ol presen i kam long Trends na wanpela K50 vouse i kam long Eures.

Meri husat i bin go pas long kamapim dispela resis, Cesly Kaira, i tok dispela i namba wan taim we dispela resis i kamap gut tru na klostu olsem Mis PNG resis.

Em i tok em i amamas tru long sapot we i kam long ol sponsa, SRC na ol narapela sapota.

Em i tok olsem em i laikim olsem resis i mas kamap gut olsem neks yia.

Karani kisim sapot long Pot Mosbi Not Is bai ileksen

Paulus Tali i raitim

WANPELA kendidet bilong Pot Mosbi Not Is, Mathias Karani, husat i bin bipo Membra bilong Lufa long Isten Hailans provins i kisim bikpela sapot i kam long ol pipel na sampela ol membua long dispela Pot Mosbi Not Is bai ileksen.

Dispela i kamap long wanpela bikpela bung long Erima long Sande, Septemba 26, we moa long 1500 manmeri i kamap na lukim planti tumbuna singsing na bilas.

Long dispela bung tu lida bilong oposisen na Membra bilong Ialibu/Pangia, Peter O'Neil, husat i kamap olsem ges spika i tok amamas bilong em long ol manmeri i kamap soim sapot bilong ol.

Em i tok: "Mi amamas long yupela i kamap soim sapot long kendidet bilong yupela na mi laik salensim yupela tu long tingting gut na putim mak blong yupela long lida."

Em i tok tu olsem kain lida olsem Mista Karani em i gat ol gutpela pasin long bringim gutpela sevis i go long komyniti

na ilektoret.

"Wanpela gutpela piksa em taim em i stap memba bilong Lufa, em i bin kisim pawa na lait i go long stesen na putim rot kolta i go olgeta hap, kain lida olsem yumi i mas lukluk long em," Mista O'Neil i tok.

Yumi i gat moa risos long kantri bilong yumi tasol nau dispela gavman bilong yumi i no lukluk tumas long givim moa wok i go long en.

Em i tok tu olsem; "Sapos mipela i kisim gavman bai mipela i bringim i kam insait rurel beng we em i nap long helpim ol liklik bisnis lain long gutpela sindaun bilong ol."

Long wankain taim em i tok fri edukesen bai kamap sapos oposisen i kisim gavman long givim gutpela edukesen i go long ol pikinini bilong yumi long tude.

Gavana bilong Milen Be na lida bilong Yunaited Risos Pati (URP), Tim Neville, husat i bin stap long dispela bung i tok tu long ol manmeri i mas lukluk gut na makim gutpela lida.

"Sapos yumi makim rong lida bai yumi kisim bikpela bagarap olsem nau ol lain bilong Esia i wok long bagarapim yumi," em i tok.

Em i tok tu olsem gavman bilong tude i gat K2.6 bilien i stap long Sentral Beng na gavman bai mekim wanem long dispela kain mani.

"Mipela ol URP i gat 10-pela kendidet long palamen na dispela i mekim mipela i namba tri pati husat i gat gutpela namba."

"Sapos Mista Karani i win long dispela bai ileksen bilong Pot Mosbi Not Is, mi olsem lida bilong URP bai pusim em long bringim wok na sevis i kam long ilektoret bilong em," Mista Neville i tok.

Ol narapela ges husat i bin kam long dispela bung long soim sapot bilong ol Mista Karani, meya bilong Mulbaya, Kuri Kinigal, membua bilong Alotau, Isaac Itabe, membua bilong Talasia, John Vulupindi, bipo membua bilong Vanimo Grin, Michael Wes, na bipo membua bilong Daulo, Ron Ganaropo.

Fly pret long teroris birua

OL LAIN long Fly long Westen provins i gat wari long teroris birua bilong wanem ol i stap klostu long boda wantaim Indonesia.

I no gat inap sekyuriti namel long boda bilong Papua Niugini na Indonesia na dispela i mekim ol tingting bilong pret i kirap.

Minista bilong Foren Afeas na Treid long sait bilong Oposisen, Conrad Haoda, husat ilektoret, Saut Fly i stap

long dispela intanesenel boda stret, i gat wari long sefti bilong ol pipel bilong em na tu bilong kantri.

Em i tok dispela boda we longpela bilong em i nap olsem 800km i no gat man i was long en.

"Long dispela as na planti manmeri bilong ol narapela kantri i wok long kam nating insait long PNG i nap 20 yia nau."

"Mi save olsem planti man

bilong Midel Is i wok long yusim dispela rot long traim na go insait long Australia," Mista

"Nogat man i was long boda."

Haoda i tok.

Em i tok long dispela bom i bin pairap long Embesi bilong Australia long Indonesia we ol teroris i bin putim i wokim na kain i no gat man long was long boda i mekim yumi no stap gut.

Em i singaut tu long Paim Minista Sir Michael Somare na gavman bilong em long ol i mas lukluk strong long dispela samting long dispela hap bilong kantri.

"Aninit long wanpela tingting wantaim Australia, Papua Niugini Difens Fos (PNGDF) aninit long Pukpuk eksesa is program i ken kisim helpim i kam long ol wanwok bilong ol long Australia long wokim dispela wok," em i tok.

Ol mama tok tenkyu long Papa God

...Holim bikpela de bilong amamas

Paulus Tali i raitim

OL LUTEREN mama bilong Kote long Nesenel Kapitil Distrik (NCD) bai kamapim wanpela spesol o bikpela tenksgiving de o de bilong tok tenkyu long Oktoba 17 long 9 Mail ausait tasol long siti.

As tingting bilong dispela tenksgiving de em bilong ol mama long tingim na amamasim dispela yia we ol i no kisim wanpela bagarap o painim birua long stat bilong yia i kam inap nau.

Seketeri bilong ol mama grup Misis Limbo i tok dispela program i save kamap long bringim tingting bilong ol mama i go

"Dispela i wanpela rot tu we yumi ol narapela Kristen i ken bihainim long helpim yumi yet."

bek long laip bilong yumi wanwan i go long Papa God na yumi tu i mas tok tenkyu long em.

Long dispela tenksgiving bai ol i givim ol

kaikai bilong gaden, bilong stoa na mani tu wantaim i go long sios, haus sik, kalabus na ol wokman bilong sios.

Misis Limbo i tok; "Dispela i wanpela rot tu we yumi ol narapela Kristen i ken bihainim long helpim yumi yet na ol narapela wantaim olsem ol sik man, kalabus, sios na ol turangu."

Man husat bai i go pas long dispela bung em Pastor Barry Wilson bilong Good Shepherd Luteran sios long Koki na em bai autim tok tu long dispela tenksgiving.

Trust a Genuine Brand

YAMAHA

PORTABLE GENERATOR

Advantages

- ✓ HIGH POWER OUTPUT
- ✓ LOW NOISE LEVEL
- ✓ RELIABILITY & DURABILITY
- ✓ PARTS & SERVICE BACKUP
- ✓ BUILT WITH YAMAHA JAPAN ADVANCE TECHNOLOGY

POWERING THE NATION

Special Price!
K1,665
GST INCLUSIVE

HURRY OFFER EXPIRES
30th OCTOBER 2004, or
WHILE STOCKS LAST



AVAILABLE NATIONWIDE

FOR MORE INFORMATION CONTACT :
James Moveh - Port Moresby
Ph 3229400 Fax 3213703
Email : jmoveh@elamotors.com.pg

Ela Motors
YAMAHA



TOYOTA TSUSHO (PNG) LTD.
www.elamotors.com.pg

Wanbel long ol lida i pinis olgeta long wok

Yakam Kelo i raitim

TRENSPERENSI Intanesenel Papua Niugini (TIPNG) i sapotim tingting bilong rausim ol lida olgeta long noken holim wok moa insait long ol gavman opis taim kot i painim ol i asua long stil o paulim ol samting.

TIPNG i sapot na askim palamen long lukluk insait na mekim ol senis long lo we i ken kamapim dispela senis.

Dairekta bilong TIPNG, Mel Togolo, i tok pasin stil na paulim mani na ol samting

long opis bilong gavman em bikipela hevi tru we i ken bagarapim kantri na tu ol sevis olsem helt, edukesen, rot na arapela bikipela sevis moa i no inap go gut long ol pipel. Na tu ol pipel bai i no inap wanbel long ol lida bilong kantri.

Mista Togolo i tok oltaim TI PNG i save toktok egensim kain pasin nogut olsem hait na mekim samting, paulim mani na stil na ol kainkain stil pasin we i save kamap long ol bikipela opis bilong gavman. Olsem na ol i amamas long bikipela bung bilong Nesenel Developmen Forum i

kamapim dispela toktok.

Tasol memba bilong Usino Bundi husat i sanap nau long kot bilong Lidasip Traibunel em Peter Yama i no wanbel long dispela samting.

Mista Yama i tokaut long nius olsem em i ting dispela toktok i sut long em we em i sanap nau long kot long ol tok paul bilong mani na ol samting i no bin go gut taim em i bin memba bilong Sumkar Open na Minista bilong Woks na Trensport long 1992 i kam.

Teroris birua i bikipela samting long PNG

Joe Ivaharia i raitim

MEMBA bilong Saut Fly, Conrad Haoda, i tok Papua Niugini i mas was gut tru long hevi bilong teroris bikos teroris i save kam wantaim bikipela pret na bikipela birua long laip bilong ol gutpela manmeri bilong kantri.

Mista Haoda i tok mipela i no wok hat long stopim birua bilong teroris bikos Australia i toktok long en o ol arapela poroman kantri i toktok long en. Mipela yet i mas sanap strong na stopim dispela birua long kam insait bikos dispela birua bilong teroris i ken brukim fridom na gutpela sindaun bilong ol pipel bilong PNG.

Maski kantri bilong yumi i sot long ol samting bilong karimaut dispela bikipela wok bilong stopim ol birua lain olsem long noken kam insait long kantri, kain olsem lo na oda hevi tude. Tasol yumi i gat wok bilong banisim gut ol boda na bandri bilong yumi. Olsem na mipela i mas wok bung wantaim olgeta wansolwara kantri na ol poroman kantri long dispela stopim dispela birua bilong teroris, Mista Haoda i tok.

Mista Haoda i tok em i no ting birua bilong teroris i kamap long rijon bikos long pait

long Irak, nogat. Maski PNG i no bin go pait long Irak woa tasol mipela i sapotim pasin bilong Amerika, Briten, Australia na ol arapela kantri husat i wok wantaim long kisim bek fri gavman bilong ol pipel bilong Irak.

Mista Haoda em mausman bilong oposisen long wok bilong Foren Afeas na Treid.

Em i tok i bin gat birua bilong teroris i kisim pinis ol kantri olsem Filipins na Indonesia wantaim Bali pastaim long ol Amerika ami i rausim Saddam Hussein long las yia. Na ol dispela kantri em ol gutpela pren kantri bilong PNG olsem na PNG i gat wok bilong mekim long sapotim ol na stopim teroris insait long dispela sait bilong rijon.

Tasol em i tok oposisen i wanbel long pasin gavman i wok long mekim tude long wok klostu wantaim ol pren kantri long strongim wok bilong stopim na rausim teroris insait long kantri na solwara bilong yumi. Dispela wok em Sir Rabbie Namaliu i wok long go pas long en.

Em i tok oposisen i wok long redim pepa bilong tokaut long wanem kain polisi bilong lukluk insait long wok bilong teroris nau.

Limitet Preferensel Voting em i niupela wei bilong vot long Nesenel Paliament Ilekse.

Nau yu mas vot long Namba 1, Namba 2 na Namba 3 kendidet yu laikim.



BALLOT PAPER - NATIONAL ELECTIONS
Lincoln Valley Open Electorate

Vot Olsem:

- VOT WANTAIM DISPELA BALOT PEPA NA RAITIM 1, 2 NA 3 LONG BOKS BILONG NAMBA 1, NAMBA 2 NA NAMBA 3 KENDIDET YU LAIKIM.
- RAITIM TASOL 1, 2 NA 3. NOKEN RAITIM OL NARAPELA NAMBA O RAITIM TASOL 1 O RAITIM TASOL 2 NA 3.
- NOKEN PUTIM OL NARAPELA MAK LONG DISPELA PEPA.

 Gima Purple	 Ezekiel Red	 Michael Green
 Terrie Yellow	 Stella Pink	 Joseph Blue

BALLOT PAPER - NATIONAL ELECTIONS
Lincoln Valley Open Electorate

- Raitim 1 long boks bilong Namba 1 kendidet yu laikim.
- Raitim 2 long boks bilong Namba 2 kendidet yu laikim.
- Raitim 3 long boks bilong Namba 3 kendidet yu laikim.



ELECTORAL COMMISSION
Papua New Guinea

PVM10605

Dokta Temu i tok na bilong gayman

GAVMAN bilong Somare i wok long mekim klia long ol pipel bilong Papua Niugini long ol senis na developmen Papua Niugini i wok long go long en. Minista bilong Stet Entaprais na Infomesen Dokta Puka Temu i tokaut.

Dokta Temu i mekim dispela toktok long bekim singaut bilong Oposisen lida Peter O'Neil olsem gavman i no mekim klia long sanap na ron bilong kantri tude.

Dokta Temu i tok nupela opis insait long dipatmen bilong Stet Entaprais na Infomesen i kamapim pinis. Na wok bilong em long givim aut ol nius bilong gavman i go long pablik long save long wanem samting gavman i wok long mekim na wanem samting i wok long kamap insait long kantri.

Tasol Dokta Temu i tok dispela opis i kamap bikos taim Mista O'Neil yet i bin Minista long dispela gavman, em i kamapim ripot i go long kabinet long kamapim dispela opis. Olsem na em i tok amamas long wok bilong Mista O'Neil long dispela taim.

Dokta Temu i tok dispela opis i wok pinis na i wok long putim nius i go aut long olgeta mun wantaim 12-pela pes nius bilong gavman. Dispela nius i save kamap insait long The National niuspepa na Wantok niuspepa long olgeta mun. Dispela 12-pela pes niuspepa i save karim ol nius long tok ingis, tok pisin na tok motu.

Em i tok gavman i wok long yusim redio tu long tokaut long ol wok na ron bilong kantri. Tasol NBC redio i gat bikipela hevi nau bikos planti redio stesin long ol provins i no wok moa o i gat hevi long wok bilong ol bikos olpela gavman bilong bipo i kamapim rifom senis we i givim ol dispela provinsal redio stesin i go long han bilong ol provinsal gavman long lukautim. NBC tu i gat bikipela hevi long ranim wok bilong em tu, Dokta Temu i tok.

Mariana laik apim nem bilong PNG na Pasifik

.....namba wan PNG meri long wok wantaim Komonwel Seketeriet

Veronica Hatutasi i raitim

APIM nem bilong PNG na Pasifik em i wampela bikpela samting wampela meri PNG lida bai wokim taim em i kisim nupela wok wantaim Komonwel Seketeriet long London.

PNG i ken amamas bikos wampela gupela pikinini meri bilong em, Marina Ellingson (bipo Haoda) i kiseum bikpela wok long London, Ingran.


Mariana i bin holim wok olsem Deputi Nesenel Plening Seketeri tasol long stat bilong dispela mun, em bin pinis long dispela wok na lusim PNG. Na em i go kisim wok olsem namba tu Deputi Dairekta long Teknikel Divisen wantaim Komonwel Seketeriet long London.

Wantaim dispela wok na divisen, em bai lukautim Pasifik rijen Fifti foa kantrilong wol em ol i memba bilong Komonwel. Na PNG i wampela long em.

Dispela em i namaba wan taim long wampela meri PNG holim wok wantaim Komonwel Seketeriet.

Leit Sir Anthony siaguru em bin laspela PNG man husat i bin wok wantaim Komonwel Seketeriet pastaim.

Mariana bai holim dispela wok long tripela yia. Opis bilong em i stap long



• Mariana i redi long go long Ingran na em i raun long las pela spin bilong em long Mosbi. Em i amamas long ol gupela prut ol i bungim i stap long Crown Plaza, Pot Mosbi..

Maiboro Haus long London. Em bin tokim Meri Wantok olsem em bin amamas tru taim em i kisim nius olsem em i winim wok ya long wanem em bin inapim dri-man bilong em long kisim wok ovasis bihain long em i sevim pablik sevis long PNG long planti krismas.

"Mi bin kisim tok olsem mi winim dispela wok long Jun 24. Ol bin ringim mi. Na mi amamas nogut tru bikos 5-

pela taim, mi bin aplai long ol wok long Komonwel na nau mi kisim tru.

Mi no bin givap. Mi amamas tru long go wok long London bikos ples ya i gat planti samting we mi ken lainim long en.

Bikos em i wampela olupela siti, em i gat histri, art, peiting, musik na ol arapela moa we mi inap long kisim gupela save long en", Mariana i tok.

Wok bilong em em long go hetim ol stratijik plen bilong Komonwel, redim ol ripot, etvaisim Seketeri jenerel na ol bos long ol divisen long bikpela samting long ol wok plen na program bilong ol. Ol dispela i sut long gupela gavanens, demokresi, jenda isu o wankain luksave long wok bilong ol man na meri, skruim trening na save bilong ol manmeri long wok, ol sekta program long helt na edukesen.

Mama i bin karim Mariana long Kwato Ailan insait long Milen Be provins.

Em i marit long man Amerika na em i gat wampela pikinini.

Em i wok long Pablik sevis long 25 krismas. Long dispela, 15 yias em wantaim Nesenel Plening opis.

Tasol long sotpela taim long 1980, em bin wok wantaim wampela NGO grup bilong gemeni ol i kolim long Hans Seifel Faundesin.

Mariana i bin greduet long Yunivesiti ov PNG wantaim Basela ov Ats digri long Politikel Saiens na Sosioloji.

Em bin wokim Mastas Digri long Ohio, Amerika long 1995 inap long 1997. Long 2000, em bin kisim wok olsem Deputi Seketeri bilong Plening na Implimentesen.

Bikmeri i gat wanem totkok long wok em i holim na wok wantaim ol man na tu, long ol man i wok aninit long en.

"Mi save wok gut wantaim ol man tasol tru, i gat ol taim we bai yu kisim toktok olsem meri em bai meri, tasol mi bin kisim gupela sapot long ol man na meri wantaim."

Wanem toktok bilong em long ol yangpela meri i wok long kamap nau long skul, wok na sosaiti.

"Setim o makim ol gol bilong yu. Na yu mas wok gut (honest bikos long gupela wok, bai yu kisim luksave.

Mi bin makim gol bilong mi na em bin kisim 25 krismas long kamap tru. Mi gat ol narapela dri-man na wampela em long go bek long ples na kirapim bisnis bilong mi taim mi pinisim tripela yia wantaim komonwel. Musik tu em wampela hobi o samting mi save laikim," Mariana i tok.

Musik grup bilong em Salima i kamapim ol gupela singsing olsem "Motuan Coastline" na ol arapela moa.

Ol rol modol o pipel em i luksave long ol na kamapim bikpela senis long laip bilong en em long mama bilong em husat i wampela longpela taim tisa.

"Mama bilong mi em gupela rol modol. Em bin givim mi dispela strongpela tingting long noken givap tasol wanem samting mi laik wokim i mas karim kaikai.

Bubu man bilong mi tu i bin gat gupela rot long menesim ol samting na mi kisim dispela long en.

Ol meri amamas long lainim somap

Veronica Hatutasi i raitim

Meri Wantok i bin toktok wantaim sampela meri i bin greduet long Wimens Tekstail Trening Senta long Gordons. Olgewla i bin amamas long kisim save na nau ol i ken somap long famili o komyuniti na sios grup bilong ol.

Saraim Kauzi em i wampela mama husat i save laik lainim long somap gut tasoal em i no save gat taim. Na taim em i harim long dispela skul, em i go. Na em tok em bin mekim rait disisen bikos save em i kisim bai helpim long somapim klos long famili bilong em.

"Mi save gat bikpela laik long somap na taim mi harim long somap skul ya, mi bin kam. Dispela em i gupela somap kos long ol mama na meri long kisim save long lainim somap na ol i ken wokim klos long ol yet na ol pikinini bilong ol. Long mi yet, save mi lainim bai mi yusim long somapim klos long famili bikos em i bikpela mani tumas long baim ol klos long stoa. Tu ol klos yumi save baim long sekon hen em ol sampela lain i yusim pinis na i no gupela tumas. Dispela em gupela rot long kisim liklik mani tu

ya. Tasol dispela em i stat tasol na mi hop bai i gat narapela kos we mipela i ken kisim long skruim save moa," Misis Kauzi i tok.

Em i tok i moabeta ol i surukim taim bilong trening i go long 6 o 12-pela mun. Nau ol i wokim trening long 4-pela mun tasol.

Dogo Tau i tok i bin lainim long somapim slot i gat longpela han na kola, mewri blaus na longpela trausis.

Em i tok sampela lain greduet bilong senta i laik kirapim asosiesen na strongim wok. Na sampela gupela samting i ken kamap.

"Mipela wantaim ol sampela greduet i laik fomim asosiesen na wok wantaim long skruim wok we mipela i lainim long en. Tasol i moabeta long skruim taim i go long 6 mun o wampela yia na bai ol mama i lainim gut ol samting," Misis Tau i bin tok.

Sampela mama i bin kam olgeta long Koiari antap long Sogeri na ol bin amamas long alanim somap. Planti bilong ol i no bin gat save long somap na nau ol i aamamas long kisim save long WTTC. Komyuniti Developmen Skim i bin baim rot bilong ol long stap long dispela somap skul.

Kisim save long SKUL BILONG LAIP



Raits

Pat 5 -WANEM ol kantri long Saut Pasifik rijen i tok oraitim CEDAW na bihainim?

Em ol dispela kantri:

Samoa- long
Septemba 24 1992,
PNG- long Janueri 11,
1995, Fiji- Ogas
27, 1995, Vanuatu-
Septemba 7, 1995 na
Tuvalu- Oktoba 06, 1999.

Ol kantri olsem Kuk Ailan, Tokelau, Niue, Nu Kaledonia, Frans polinesia na Wallis na Futuna em ol teritori bilong Nu Silan na Frans. Na ol i lukim ol olsem ol i tok oraitim CEDAW bikos Nu Silan na Frans i tok oraitim dispela pinis.

Kuk Kona

Skalops Kebabs

Yu mas i gat:

2 tispun oli

2 tispun soi sos

2 tispun lemon suis

haf tispun sol na pepa

We bilong Kuk

Putim olgeta ingridien o ol samting long Kwik Seik kontena na miksim gut. Wokim kebabs wantaim skalops, bekon, ol hap painael yu aktim pinis, onion, masrum na wanem samting moa yu laikim. Putim ol long Sisen sev dis na kapsaitim marinet o ol sos samting yu miksim long em. Larim i stap long marinet long wampela awa. Tantanim taim em i stap long hap. Wokim babakiu kuk long en.

Sotpela Lukaut Toktok

OL pikinini i stap long taun i ken kisim bret i go long skul. Sapos putim arapela kaikai insait long bret, bai i ken givim inap kaikai long pikinini. Mekim olsem: 4-pela hap bret, 2 spun majarin (kaikai bilong givim strong), 2 spun pinat bata (kaikai bilong strongim blut) na wampela hap tomato (kaikai bilong lukautim skin)

Meri Wantok i laik save sapos yupela i save laikim ol stori mipela i save printim. Rait i kam long Meri Wantok, Word Publishing Company, PO Box 1982, Boroko, NCD o ring i kam long telipon 325 2500 na toktok long Veronica Hatutasi. Yu ken salim ol stori tu long email: word@global.net.pg.

TOKTOK NATING
Wantaim
Fr. Paul Liwun SVD



WANPELA yangpela man, taim em i pinis stadi long yunivesiti, i bin mekim bikipela wok tru long sapotim famili na komyuniti bilong em. Tasol nau em i gat bikipela wari tru na i luk olsem laip bilong em i nogat stia moa. Olgeta de dispela hevi i kamap bikipela moa. Olsem na em i bin go lukim dokta. Taim dokta i bin harim pinis wari bilong dispela man, dokta i bin givim em 4-pela boks marasin. Dokta i tokim em: "Tumora moning bipo long 9 kilok, yu wanpis mas lusim haus na go long nambis, bringim dispela ol boks marasin wantaim yu. Noken bringim narapela samting olsem radio, buk o niuspepa. Yu mas opim ol dispela boks bihainim taim mi bin raitim long wanwan, em i long 9 kilok, 12 kilok, 3 kilok na 5 kilok long apinun. Sapos yu bihainim gut dispela tok, sik bilong yu bai i pinis tumora tasol."

Dispela man i bin go long nambis. Long 9 kilok stret, em i bin opim nambawan boks marasin. Em i kirap nogut tru bikos em i no bin painim wanpela marasin i stap. Em i painim tasol wanpela hap pepa i gat dispela tok i stap; "HARIM". Pastaim em i no laik bilip. Tasol em i sindaun isi tasol na traim long harim. Long taim bilong sindaun isi bilong em, em inap long harim si i bruk long nambis, em i harim nois bilong win bilong nambis. Na tu nau em inap long harim lewa bilong em i pam insait long bodi bilong em. Em i pilim nais tru nois bilong solwara, win na pam bilong lewa bilong em. Longpela taim em i no bin harim dispela nois bikos em i save bisi tumas long wok bisnis bilong em. Nau em i pilim olsem bel bilong em i kamap klin tru olsem ol i bin brumim.

Long 12 kilok stret em i opim namba tu boks. Insait long dispela boks tu em i no painim wanpela marasin i stap. Em i painim liklik hap pepa wantaim dispela tok; "TINGIM". Nau em i lusim ol nois bilong solwara na win bilong nambis, em i stat long tingim bek olgeta step bilong laip bilong em, stat long taim em i liklik pikinini yet, em i tingim taim bilong em i stap long skul, tingim tupela papamama bilong em husat i bin laikim em tumas. Em i tingim tu olgeta pren bilong em, na em i pilim olsem pawa bilong laip i kamap strong gen insait long bel bilong em.

Taim em i opim namba tri boks bilong marasin long 3 kilok apinun, em i painim narapela tok; "SKELIM NA GLASIM". Nau em i pasim ai bilong em na strongim tingting bilong em na tingim bek na glasim gut gen long nambawan strongpela laik bilong em long mekim wok bisnis. Em i bin kirapim bisnis bilong em wantaim nambawan as - bilong helpim ol lain bilong em. Tasol taim bisnis bilong em i kamap bikipela em i lusim tingting long dispela na tingim em yet. Nau em i save pinis as bilong sik bilong em i save mekim em i wari olgeta taim long laip bilong em.

Taim em i opim namba fua boks marasin long 5 kilok, em i bin ritim; "RAITIM OLGETA WARI BILONG YU ANTAP LONG WESAN BILONG NAMBIS". Em i kirap, wokabaut i go long nambis na raitim "WARI". Taim em i pinis raitim, solwara bruk i kam na wasim wanem samting em i in raitim. Dispela tok WARI i no stap moa, solwara i bin wasim em i go. "Yupela husat i save karim planti hevi, kam long mi na kisim malolo." (Mathew 11: 28).



"Prea bilong man i laik bai God i stap wantaim em"

God, yu God bilong mi. Mi wok strong long painim yu. Spirit bilong mi i laikim tumas long i stap wantaim yu. Bodi bilong mi i laikim tru long stap wantaim yu, olsem man i stap long ples drai i nogat wara long en na i dai long wara. Mi laik lukim yu long haus bilong yu na mi laik yu soim mi bikipela strong bilong yu na namba bilong yu. Laip bilong dispela graun i gutpela tasol marimari bilong yu i nambawan tru. Olsem na mi litimapim nem bilong yu. Bai mi tenkyu long yu na litimapim nem bilong yu inap mi dai. Bai mi litimapim han bilong mi na prea long yu.

Buk Song 63: 1 - 4

Wimens felosip kamapim gutpela pren pasin

Sape Metta i raitim

YUNAITED Sios insait long kantri em i wanpela bikipela sios we i save mekim kamapim planti gutpela wok na pasin na ol kongrikisen i save amamas tru long go insait long ol samting sios i save kamapim.

Ol program i save bungim ol lain long olgeta han bilong sios. Dispela i stat long Sande skul, yut grup, wimens felosip grup na ol arapela grup moa.

Long Sande i go pinis, Yunaited Wimens Felosip bilong Goroka Seket insait long Isten Hailans provins i bin bungim na lukautim ol wimens felosip grup bilong Ewase Bialla Seket long Wes Nu Briten provins.

Insait long dispela grup, 40 mama, 8-pela ministri yut na wanpela pasto i bin kam antap long Goroka na serim tingting bilong God na givim ol samting olsem ol bilum, basket, mat, brum, laplap, klos na ol

narapela samting moa i go na i kam. Long dispela rot, ol i mekim gutpela pren pasin wantaim wanpela narapela namel long ol yet.

Presiden bilong Ewase Wimens Felosip, Rodia Amos, i tokim *Wantok Niuspepa* olsem tingting bilong dispela raun i kam antap long Goroka em long ol i ken bungim ol susa bilong ol na ol i ken serim toktok bilong God (Baibel stadi).

Het tok bilong dispela bung

em, "Investing in Children, Women and Youth" o putim kain samting olsem taim, mani na wok i go insait long ol pikinini, ol meri na ol yangpela. Namba tu tingting em, "Developing a Child and Have a Responsible Youth" (Proverb 22:6) o kamapim gut pikinini na kamapim wanpela yangpela husat i save soim ol gutpela pasin, em i tok.

Misis Amos i tok long dispela wan wik raun bilong ol long Goroka na Isten Hailans, ol i lainim na luksave long planti gutpela samting.

Em i tok wanpela bikipela samting em ol grup bilong em long Ewase Wimens Felosip i bin sindaun wantaim ol susa bilong ol long Goroka we ol i lainim na skulim ol yet i go na i kam long pasin bilong wokim bilum, basket na ol arapela samting moa.

Misis Amos i tok ol i save raun tasol long rijon bilong ol na ol i no save raun i go long narapela provins.

"Dispela raun bilong mipela em i namba wan taim long mipela i lusim provins bilong mipela na i kam antap long Goroka na Isten Hailans," em i tok.

Misis Amos i tok ol Bialla Wimens Felosip i tok ol bai wetim ol poromeri bilong ol long Goroka i go raun long Bialla tu.

Em i tok taim ol i go bek long Bialla ol bai wokim fan-resing na kamapim mani long i go raun long ol narapela provins na bungim ol arapela susa.



Ol wimens felosip grup bilong Ewase long Isten Hailans provins na Bialla long Wes Nu Briten provins i lainim long mekim basket. Foto: SAPE METTA

Salens i stap long wanwan manmeri

...Kamapim gutpela sindaun bilong ol pikinini

Veronica Hatutasi i raitim

SALENS i stap long han bilong mipela long tingim ol samting i kamap long Papua Niugini insait long las 29 yia na lukluk tu long wanem samting bai kamap long bihain taim.

Presiden bilong Midia Kaunsel bilong Papua Niugini, Peter Aitsi, i bin wokim dispela toktok long ol perisina bilong Sen Peter Chanel las Fonde long selebresen bilong namba 29 Indipendens selebresen bilong PNG.

Mista Aitsi i bin ges spika long ol selebresen we peris i bin holim long luksave long dispela de.

"Kamapim gutpela sindaun nau na long ol pikinini bai i kam long bihain taim i ken gat gutpela laip em bai kamap long wok mipela kamapim nau. Mipela i laikim ol pikinini bilong mipela i gat gutpela skul, gutpela helt sevis i go long ol. Em i wok bilong mipela olgeta long daunim ol hevi i kamap long kantri na strongim wok developmen. Mipela olgeta manmeri, ol sios, ol skul, ol famili na i no bilong ol politisen tasol. I moabeta long askim yumi yet long wanem samting bai yumi wokim long neks yia em bai PNG i

makim 30 yia bilong independens. Bai yumi wokim wanem long yuniti bilong kantri, long Mosbi siti na long ol rurel eria?" Mista Aitsi i bin wokim ol dispela toktok.

Em bin tok amamas na luksave long Sen Peter Chanel Erima Peris i holim ol selebresen we i bin go gut na em bin tok tenkyu long peris i askim em long stap insait long ol samting i bin kamap long dispela de. Samting olsem 200 perisina i karamapim ol pikinini, ol skul manki, ol yut, ol bikipela manmeri na peris pris wantaim ol siaman na eksekutiv bilong peris i bin stap amaamsim dispela de wantaim ol tumbuna danis na singsing ol wan wan rijinel grup, ol mama na yut grup i bin putim kamap.

Ol pikinini na perisina i bin amamas tru long lukim ol kain trik wanpela yangpela SVD pater i bin putim kamap long taim bilong selebresen.

Program i bin pinis stret long apinun na taim i go daun na nait i laik bruk, ol manmeri na pikinini i bin lusim peris graun wantaim gutpela bel na amamas long gutpela 29 independens selebresen ol bin gat.

ELC/PNG Kerowagi amamasim 50 yia

TAIM PNG i amamasim 29 yia em i kisim Indipendens, Evanjelikel Luteran Sios long Kerowagi na Jiwaka Seket insait long Simbu provins tu i amamasim 70 yia long wok bilong sios long hap.

Sampela ovasis ges i joinim ol sios memba i kam long Kerowagi na tripela seket olsem long Gesa, Kup na Kerowagi long stap insait long sios selebresen i bin stat long Mande, Septemba 13, na i pinis long de namba 15.

Selebresen i bin kamap yet long Kerowagi long olpela ples balus hap klostu long banis bilong Luteran Sios yet.

Ol namba wan misinari bilong Luteran Sios i bin krugutim Kerowagi long Septemba 15 1934. Ol bin salim ol dispela misinari long Madang i go long Kerowagi na ol bin wokabaut brukim na bihainim bikbus na maunten long Madang i go olsem Kerowagi.

Long Septemba 1, 1934, 7-pela ELC/PNG misinari i bin lusim Madang na katim i go oslem long Bundi, Gembogl i kam olsem long

Mt Kugkbagl na katim i go long het bilong wara Koronogi na i kam olsem long Kerowagi. Na bihain long tupela wik, ol bin kam kamap long Kerowagi long 14-15 Septemba 1934.

Nem bilong dispela 7-pela misinari husat i bin wokabaut katim bikbus long bihainim toktok bilong Bikipela em Reveren Pietz, Mager, Foege, Welsh, Radke, Eiffert na Hannemann. Olgeta i bilong kantri Jemeni.

Samting olsem 140 asples lain i bin wokabaut wantaim long dispela bikipela de long luksave long wok bilong ol misinari husat i bin givim laip bilong ol long ol pipel bilong Kerowagi.

Ol memba bilong kongrikisen bilong tripela seket i bin mekim ol wok plen long ol samting i kamap long dispela bikipela de bilong ol.

Em long ol singsing na danis bilong tumbuna, ol kaikai, ol liteji o lotu na ol arapela moa.

Tambarim musik i pairap naispela tru tu long dispela taim na sampela lain tu i bin kisim baptais long dispela taim.

Maunt Hagen Haus Sik pulim mani bilong em yet

Paulus Tali i raitim

MAUNT Hagen Jenerel Haus Sik fan-resing komiti i wokim mani mak inap long K10 000.

Dispela mani ol i bungim bai ol i yusim long baim ol samting bilong haus sik.

Dispela em i wanpela bikpela samting ol i mekim long painim dispela kain mani.

Siaman bilong fan resing komiti, Robin Yabra, i tok dispela mani ol i kamapim em i bikpela mani na ol bai yusim dispela mani long baim ol samting

olsem ol samting bilong siip long haus sik olsem ol betsit na pilo, ol tebol na wanpela ais boks o frisa.

Las tupela yia i go pinis ol komiti i bin kisim moa long K50 000 na namba wan projek mani olsem K4000 we ol i yusim long baim tupela masin bilong wasim klos.

Dispela ol mani tu ol yet i wokim long fan resing.

Mista Yabra i givim bikpla tok amamas long ol manmeri long sapot bilong ol i go long helpim wok bilong haus sik.

Keapara helt senta kisim K80,000 sapot



Mista Kambori i givim sek mani i go long ol menesing komiti bilong Hud Lagun long stretim Keapara helt senta bilong ol long ples.

OL PIPEL bilong Hud Lagun hap long Sentral provins i kisim K80,000 bilong strongim wok bilong helt servis insait long hap bilong ol nau.

Seketeri bilong Plening na Rurel Developmen, Valentine Kambori, i bin givim dispela sekmani i go long Keapara Helt senta na mekim bikpela tok tenkyu i go long ol komiti long gutpela wok bilong ol long mekim fanresing.

Mista Kambori i amamas long lukim dispela fan-resing wok we ol biknem lain bilong Hud Lagun olsem Sief Jastis Sir Mari Kapi na Raka Taviri bilong PNG Habas bod i stap insait long mekim.

Em i tok nesenel gavman i lukluk long wok bung wantaim ol lokel level gavman olsem na em i tok em i amamas long lukim olsem lokel level gavman kaunsil tu i mekim bikpela wok bilong kamapim dispela projek.

Mista Kambori i tok gavman i sanap strong long lukim olsem ol servis i ron long nesenel level i go daun long distrik na provinsel level olsem na em i wok long lukluk insait long ol projek we i ken ron i kam daun olsem insait long ol distrik.

Mista Kambori i tok ol ples we ol pipel i wok bung wantaim na sanap wantaim long mekim wok em isi long kisim helpim bikos long dispela bung wantaim we i stap pinis.

Long makim maus bilong ol komiti, Raka Guma, i tok fanresing komiti bilong ol i bin opim wanpela tras akaun (pasbuk) wantaim tu wok plen bilong senisim helt senta bilong ol.

Mista Guma i tok mani ol i kisim bai i go long wokim haus bilong helt ekstensen opisa na baim nupela bokis ais (frisa) na jenereta. Planti samting tu i olpela na i ros o bruk nabaut na i mas gat wok bilong senisim ol olpela samting o putim ol nupela palang, simen, kapa na ol kain samting olsem.

Mista Guma i tok tripela yia i go pinis ol pipel i lusim laip bilong ol bikos ol i traim long hariapim long kisim ol sik lain i go longwe long Pot Mosbi jenerel haus sik. Olsem na komiti i gat bikpela tingting long opim dispela helt senta long pinis bilong dispela yia.

Tupela nes long haus sik i les long helpim sik susa bilong mi

Andrew Molen i raitim

WANPELA meri i autim belhevi bilong em long tupela nes husat em i tok i no laik long helpim em na susa bilong em husat i bin sik i stap long Pot Mosbi Jenerel Haus Sik.

"Mi askim ol long kam helpim o lukluk long em na ol i no kam," meri husat i no laik long mipela i tokaut long nem bilong em i tok.

Em i tok long 2 kilok long apinun long Sande, Septemba 19, em i bin askim

wanpela nes meri taim em i kam long pasim windua na lukim susa bilong em husat i wok long pilim bikpela pen, long sekim em, tasol nes i tokim em olsem, "Em dokta yet sekim na mipela i no save, bai mipela i no inap mekim wanpela samting long em".

Em i tok long 7 kilok long nait susa bilong em i pilim bikpela pen yet na em i go askim gen ol nes na narapela nes husat i stap i tok, "Mipela i no save, yu yet wokim."

"Em i tok olsem na em givim mi han

glav na marasin na em i tokim mi long mi yet givim marasin long susa bilong mi," dispela meri i tok.

Em i tok wari bilong em i olsem dispela i no wok bilong em na sapos em i wokim kranki o givim marasin kranki na susa bilong em i dai bai olsem wanem stret?

Dispela meri i tok em i laik ol bikman bilong haus sik i mas toktok long ol nes long wokim wok bilong ol gut na hap han bilong wok bilong ol em long toktok gut long ol lain i stap long haus sik na helpim ol wantaim ol wari bilong ol.

NAU YU INAP LONG KISIM KAINKAIN SAMTING BILONG HAUS LONG K1.00 DIPOSIT TASOL!



TRENT #LA0023
5 SITA LOUNS SUIT
Wokim wantaim strongpela diwai. Naispela kusen wantaim strongpela laplap karamap.
DINAU PRAIS K1,035

SEIVIM K400

FRI GIFT
FRI 16 PELA KAIKAI PLET KAP

DEPOSIT K1.00

K39 LONG FURNITURE
K1,299 BIKO KES
K899 KES



ORCHID #DA0006
5 PELA DAININ SET
4 pila sia na 1 pila main tebol
Strongpela diwai. Kusen sia sit

NIU

FRI GIFT
FRI 16 PELA KAIKAI PLET KAP

DEPOSIT K1.00

K42 LONG FURNITURE
K1,199 BIKO KES
K999 KES



ROME tupela kala #LH0031
3+1+1 LOUNS SUIT
Long vinyl karamap. Aion leg

NIU

FRI GIFT
2 PELA FRI AMAZON KETEN

DEPOSIT K1.00

K81 LONG FURNITURE
K2,299 BIKO KES
K1,999 KES




MORNING SUN #BA3004
SINKOL METOL BED FREIM
Metres, ulu na bedsit of narapela pias

NIU

FRI GIFT
FRI SINKOL BED SHIT

DEPOSIT K1.00

K17 LONG FURNITURE
K379 BIKO KES
K329 KES




BRENINGTON #BG4003
DABOL METOL BED FREIM
Strongpela metal freim bai stap long taim.
Metres, pilo na bedsit of narapela pias

NIU

FRI GIFT
FRI DABOL BED SHIT

DEPOSIT K1.00

K26 LONG FURNITURE
K889 BIKO KES
K599 KES



WINIM

BAIM BIPO LONG 31 Dei bilong DISEMBA na WININ FANTASTIK "DIRIMA PRAIS" insait long GOL RAS Namba #3 KOTA DRO!

BAIM NAU! KISIM OL TIKET IKAM! TINGIM... ya baim moa... Kisim mau sanis long winim!

YU MAS STAP ISAIT LONG DRO LONG SPINIM NA WINIM!

GOLD RUSH

K600,000.00

INAPIM KES MONI NA PRAIS!

Baim wantaim K50 long ol Courts Supastoa klostu yu, long "kamapim driman bilong yu" long ol Bikpela dro!

INSTANT CREDIT APPROVAL
CONDITIONS APPLY

REQUIREMENTS

- CONFIRMATION LETTER
- Credit Employment Letter
- BE CARD
- Current Employment (12 mths)
- LATEST PAY SLIP
- Valid driving License
- ADDRESS CONFIRMATION
- Quick and Easy to use
- #3 NO RISK OF LOSS
- Home, Add'l, Phone, etc.

COURTS

FEIVARET FENISA NA ELEKTRIKOL SUPASTOA BILONG PAPUA NIUGINI

First for Furniture
FIRST FOR FURNITURE... FIRST FOR YOU!

PEIM ISI

COURTS GORDONS
Spring Garden Road, Gordons
Phone: 302 5808 • Fax: 325 4149

COURTS LAE
Millfordhaven Road, Lae
Phone: 472 4800 • Fax: 472 4621

COURTS GOROKA
Fox Street, Goroka
Phone: 732 2033 • Fax: 732 2063

COURTS MT HAGEN
Hagen Drive, Mount Hagen
Phone: 542 1401 • Fax: 542 3517

COURTS MADANG
Beckley Plaza, Nanulun Street
Phone: 852 3711 • Fax: 852 3612

Setelmen bagarapim gutpela sindaun long Is Sepik provins

Dia Edita,

Mi gat liklik wari long putim long niuspepa na bai ol pipel bilong Is Sepik provins i ken lukim na luksave long ol wanem hevi i wok long kamap long provins bilong mipela.

Mi lukim olsem Sepik em stat long go bikhet olgeta. Ol yangpela manki i save raun long taun na pik poket nambaut. Bilong wanem na ol i mekim olsem?

Ating provinsel gavman bilong yumi i mas traim long rausim ol setelmen insait long

Wewak taun we ol i save bikhet tumas.

Mi laik tok olsem taun bilong mipela bai kamap gutpela sapos nogat setelmen na bai yumi wanwan ken wok hat long painim gutpela sindaun.

Mi bai amamas sapos yupela i bekim pas bilong mi long setelmen. Mi wet taso! long bekim bilong dispela pas.

**AILYNE SAIHENGU
WEWAK
IS SEPIK PROVINS**

ELC/PNG Sinod 2006

Dia Edita,

Mi laik toksave long ol manmeri bilong Papua Niugini na ol memba bilong Luteran Sios olsem: Dispela toktok bilong sinod bin kamap long tripela wik i go pinis 09/09/04 insait long National Niuspepa em i no tru. Het tok ol raitim olsem Sinod 2004 em ol giman man i raitim.

Sinod bai kamap tru tru long 2006. Na narapela tu ol i kolim nem bilong Bisop bilong Luteran Sios na ol i tok em makim pinis ples bilong bung long Wasu tu em ol giman.

Ukata Distrik Konfrens long Tapen i no bin kamapim wanpela tok yet. Tapen bin surikim kam long Gatop we bai ol lida tasol bai i sindaun na makim ples bilong bung.

Na noken bagarapim nem bilong memba bilong Kabwum husat i siaman bilong Sinod 2006. Husat dispela man yu wok long gimanim ol manmeri bilong God, yu mas tingting gut.

**KAUT KORIK NANAN
POT MOSBI
NCD**

Kakao Bod i bagarapim sindaun

Dia Edita,

Mi no laik long Kakao Bod bilong kantri bilong yumi i wok long kamapim tingting bilong en long stopim kakao drai bin we nau ol fama bilong Sandaun provins i wok long kamapim i go long Jayapura.

Kakao Bod i mas tingting pastaim bipo long em i ken stopim ol san drai bin kakao.

Dispela long wanem nau yet planti papamama long ples i wok long painim hat tru long baim skul fi bilong ol pikinini bilong wanwan.

Sapos Kakao Bod i gat tingting long stopim ol kakao san drai bins, orait em i mas kamapim wanpela kakao mil olsem long Rabaul brens long Vanimo pastaim bihain long en, em i ken stopim ol kakao san drai bin. Sapos nogat mipela ol pipel bilong Sandaun provins bai salim yet ol kakao san

drai bin i go long Jayapura.

I tru olsem mani i go aut long kantri tasol em rong bilong husat? Yu yet, olsem na nau ol pipel i wok long sutim tok i long yu yet sekim yu yet planti taim na bai yu kisim gutpela tingting.

Dipatmen bilong Agrikalsa na Laipstok i wok long tok strong long planim kakao na vanilla tasol we stap ples bilong salim?

Nogat ples bilong salim o maket bilong tupela krop wantaim.

Hatwok na tuhat bilong planti fama i lus nating na ol i no save lukim kaikai bilong hat wok bilong ol. Olsem na planti ol fama ol i save lusim dispela kain wok ol i save mekim.

**BENJAMIN A. WEP
VANIMO
SANDAUN PROVINS**

Salim pas i kam long
WANTOK
Niuspepa
P.O. Box 1982
Boroko, PNG

Maski mangal long trausis

Dia Edita,

Halo, na mi tok tenkyu long givim hap bekim bilong mi i go long brata bilong Morata, Andrew Pora, long hap tok bilong em long "Bilas bilong yumi - i go narakain" long Wantok Niuspepa.

Tenkyu tru brata, mi laik bekim hap tok bilong yu olsem, ol kain klos bilong yumi long dispela graun 'wol' em i save bihainim klaimet o strong bilong san, ren na win. Klaimet bilong yumi i save senis long olgeta yia na mun; sapos yu save long skelim ol weda o sisen, kain olsem taim bilong drai, taim bilong ren, taim bilong kol, o taim bilong ais i pundaun, em nau bai yu save we long bilasim yu yet.

Nogat bai yu paol long taim bilong ples kol na yu putim sket, na win bai flaim, na sem bai kilim yu sapos yu no werim liklik trausis. Em tru o nogat?

Sapos yu gat gutpela tingting, long Tok

Inglis bai yumi tok "Mind your own business". Dispela em bai yu kila na save olsem susa o mama bilong yumi tu ol i save werim trausis, liklik trausis na ol kain dres.

Olsem na dispela graun em i fri long olgeta samting. Em i wan kain olsem long kaikai. Nau yu kaikai kaukau, tumora yu kaikai rais, hap tumora bai yu kaikai sak-sak o banana o kain olsem. Sapos yu les long dispela ol kaikai, na bai yu kaikai wanem?

I wankain long aiglas, taim yu laik raun, bai yu werim aiglas bilong san, popaia yu werim glas bilong painim pis, em yu yet nau. Kain olsem noken tru raitim kain samting olsem long niuspepa o stopim bikos olgeta meri bilong dispela graun ol i save werim trausis. Olsem ol manmeri Kristen o i no Kristen tu ol i save werim trausis.

Ating sapos yu lukim EMTV progreem olgeta Mande long 7 kilok long nait ol i kolim 'Praise' em nau bai yu lukim Makoma, Soul Harmony, Hillsong Singers, na planti moa, em ol tu i werim trausis.

Ating yu man bilong jeles o i gat tingting nogut long ol meri. Kain olsem, noken stap long siti. Moabeta yu mas go bek long ples na werim skin diwai olsem bipo. Nogut yu raun long siti na lukim ol meri i werim trausis na ai bilong yu bai raun olsem masin, bikos jeles pasin bai kilim yu. Em tasol na sapos yu no wanbel long bekim bilong mi, orait yu ken salim bekim na bai mi ken lukim na ritim bekim bilong yu. Mi sikrap tru long bekim moa pas i go long edita.

**MISTA IKUALITI -PNG
POT MOSBI, NCD**

Heven i ples bilong bilip man, i no sin man

Dia Edita,

Namba tu taim mi laik bekim pas bilong Mark Pumi bilong Sauten Hailans provins, i bin kamap long Sept 9, 2004.

Het tok em i raitim olsem, 'Wanpela sinman no ken i go long Heven'. Yes, Mark, sinman i no ken tru i go long Heven. Tasol bilipman bai i go long Heven yet. Olsem dispela stilman nogut ol bin hangamapim wantaim Jisas long diwai kros long Luk 23: 43 dispela stilman em i bilip long Jisas Krai antap long diwai kros. Na Jisas i tokim em 'mi tok tru long yu, tude bai yu i stap wantaim mi long Heven'. Em i no toktok liklik long narapela stilman i no bilip long em.

Tupela man i soim yumi kila piksa long sinman i noken i go long Heven, na bilipman bai i go long Heven. Sin askim, wari, hevi, belhat bilong yu, em diwai kros bilong kalvari. 1 Peter 2: 24. Krai yet i hangamap long diwai na karim sin bilong yumi long bodi bilong em. 2 Kor 5: 21 "Dispela man i no antap long em".

Olsem na olgeta wanwan sin manmeri ol yet i luksave long sin bilong ol yet, na Jisas Krai em i pe man bilong sin bilong ol, bai ol i tanim bel na kisim Krai long laip bilong ol. Dispela ol lain tasol ol bai kamap pikinini bilong God. Jon 1: 12. "Tasol long ol man i kisim em, em ol man i bilip long nem bilong em. Long ol dispela em i givim namba, bai ol i ken kamap pikinini bilong God". Galesia 3: 26. "Yupela olgeta i bilip long Krai Jisas, na long dispela bilip, yupela i stap pikinini bilong God."

Olgeta pikinini bilong God ol i gat laip bilong God yet i stap insait long olgeta bilip manmeri (ol i kolim nupela laip) Gal 2: 20. Em i wantaim tru long pikinini bilong yu, laip bilong yu i stap long em na yu save kolim em i pikinini na pikinini bai kolim yu olsem papa long yu.

Mark, taim yu tok long bilipman mekim sin bai tanim bel gen na tu yu tok ol bai i noken i go long heven. Taim yu tu long tanim bel gen long yusim Rev 2:4 na Jer 15: 19 yu minim wanem long dispela Baibel ves long tanim bel gen.

Yu save gut long mining bilong en o yu tok nating nating tasol long tingting bilong yu yet. Bipo long mi ken tok kila long ves, mi i gat sampela askim pastaim na yu mas mekim.

Krai i dai hamaspela taim? Heb 9: 28 Baibel em i tok wanpela taim tasol. Mama bilong yu i bin karim yu hamas taim? Bai yu dai hamas taim? Tanim bel tu wan kain tasol, wanpela taim tasol. Sapos yu tanim bel gen na gen, em i minim Krai bai i dai planti taim na em bai karim pen planti taim.

Ol manmeri yet bai sekim na skelim laip bilong ol yet wanwan olsem 2 Kor 13: 5, sapos ol i bin bilip long rong samting na bihain ol i harim Gutnius tru na tanim bel tru long sin pasin na bilip long Krai Jisas i bin i dai long sin bilong ol na ol i tanim bel tru, dispela em i no tanim bel gen, nogat tru. Dispela kain tanim bel em i Baibel we bilong tanim bel na tru tanim bel na wanpela taim tanim bel.

Namba tu yu tok bilip manmeri sapos ol i sin ol bai noken i go long heven. Pren mi tokim yu pinis laip bilong God yet i stap insait long ol dispela bilip man na ol i stap pikinini bilong God tru tru. Olsem wankain long pikinini tru tru bilong yu yet we meri bilong yu i karim long en.

Mi i gat wanpela askim long yu Mark. Sapos pikinini tru bilong yu i sakim tok bilong yu na mekim wanpela bikpela rong o sin, yu inap long senisim em na mekim pikinini bilong yu i kamap pikinini bilong narapela man o seten o kilim em i dai tu. Yu mas bekim yu inap mekim olsem o nogat? Sapos nogat Papa God tu wankain em i save kolim mipela pikinini insait long Krai.

Namba tri samting yu tok long i stap holi olsem God i stap holi. 1 Peter 1: 16. Mi bai bekim tasol mi i gat askim sampela holi Kristen laip bilong Peter yet. Olsem God i stap, mi ting Mark yu tu mas wankain olsem Peter laka?

Jisas Krai kolim Aposel Peter seten long Mt 16: 23 yu lukim sem Peter em i katim yao bilong wokboi bilong hetpris Mt 26: 51, i go moa yet na

lukim long ves 69-75 Peter em haitim nem bilong Jisas Bikpela bilong em 3-pela taim na tok mi i no save liklik long em.

Dispela ol pasin bilong Peter em i stap holi long ai bilong God a? Peter em i rait han man bilong Bikpela Jisas, tasol em i mekim sin nogut, olsem na ating yu ken tok olsem Peter nau em i stap long hel paia a? Husat autim tok long de long Pentikos na 3,000 manmeri ol i tanim bel Ap 2: 41 em Peter tasol.

Yu save long as bihain long Kristien laip bilong Peter em i stap holi olsem God Papa i stap holi na em i rait long 1 Peter 1: 16. Bekim em i konfes na tok sori tru long God long wanem pasin em i bin mekim Mt 26: 75. Nau to wankain wanpela we long i stap holi long kristien laip bilong yu konfes i go long God 1 Jon 1: 9 Olsem King David em i konfes long Buk Sam 51: na tu taim tru bilip manmeri mekim sin God Papa em i save stikim ol stretim, olsem olgeta Papa i save stretim pikinini taim pikinini i mekim rong. Heb 12: 5-11 tru tru pikinini bilong God stik bilong God bai wokabaut taim ol i min long mekim sin, na tu Holi Spirit tu bai kolim dispela bilip manmeri na soim em i mekim rong pinis long ai bilong God.

Tasol yet ol bai i go long heven yet long wanem heven em ples Papa bilong mipela em i redim bilong mipela olgeta bilip manmeri Jon 14: 1-3.

Na yu askim mi long seten, yu ritim Is 14: 12-15 na Ezekiel 28: 13-19 Lucifer bipo em i wanpela nambawan ensel bilong God tasol taim em i mekim sin long Heven, em i kamap seten na God i rausim em long heven wantaim sampela moa long ol holi ensel bilong God tu bihainim em. Na em ol i kamap spirit nogut na wokim hel paia em ples bilong em wantaim ol ensel bilong em Mt 25: 41.

Mi laik bekim na mekim kila long yu, i luk olsem yu i no kila tumas long seten, olsem na God em i rausim seten olgeta long Heven. Seten em i save long dispela nau em i bin kam long gaden liden na gimanim

tumbuna papamama bilong yumi tu na Adam na tupela tu i bin mekim sin, na sin pasin bilong tupela i kisim yumi olgeta Rom 5: 12.

Olsem na yumi olgeta manmeri bilong dispela graun i no gat strong long winim pawa na strong bilong sin, seten, i dai na hel. Bilong dispela as God Papa em yet em i salim pikinini tru bilong em i kam i dai long diwai kros long sin bilong yumi. Na taim em i kirap bek long matmat em i bin brukim pawa bilong sin, seten i dai, na hel na em i setim laip bilong oltaim we Adam i bin lusim long gaden liden. Nau em i laik givim dispela laip oltaim oltaim long olgeta man husat i bilip long Krai. Jon 3: 16. Bekim bai i go olsem, Krai i dai long sin bilong seten.

Laspela hap yu tok olsem gavman mas lukluk long ol dispela kain sios autim tok olsem na sindaun na kantri bagarap na pasin nogut kamap bikpela.

Em i no wok bilong gavman long autim Gutnius. Em i wok bilong sios long autim Gutnius na soim sin bilong ol manmeri na ol i ken tanim bel na bilip long Krai na kisim nupela laip bilong God. Yet 2 Kor 5: 17, nau bai yu lukim laip senis kantri sensi ples senis sindaun na famili senis. I no gavaman na sios i bagarapim kantri na sindaun bilong man nogat, sin long bel bilong man ol i no tanim bel, trabel em dispela.

Bipo yu laik putim bel hevi bilong yu long midia na pablik, yu yet mas save gut tru long as bilong hevi pastaim, na noken sutim tok nating long gavman o sios o wanpela man.

Nau mi bekim pas bilong yu. God Papa em i laikim yu na mi laikim yu tu. Mi bai amamas long bekim bilong yu i kam long Wantok Niuspepa bilong yumi.

Mi i no save abrusim Wantok Niuspepa, em i niuspepa bilong mi stret.

**PETER KELO
KAINANTU
ISTEN HAILANS PROVINS**



WANTOK KOMENTRI

Painim rot yet long pinisim raskol

Toktok bilong kamapim lo bilong hangamapim o kilim man husat i mekim ol bikipela trabel tru olsem kilim narapela man i dai o ol arapela bikipela trabel moa i wok long kamap yet long maus bilong ol bikman na komyniti yet.

Long dispela wik tripela man i bin apil long stap laip bikos kot i sasim ol long dai bihain long ol i bin kilim man i dai. Wanpela man i abrusim sas bilong dai pinis na em i kisim laip yia long kot bikos em i apil long kot long em i mas stap laip.

Planti saveman na sios na ol sampela grup tu i tok lo bilong kilim trabel man i no ansa bilong stopim na daunim hevi bilong lo na oda insait long kantri. I gat arapela rot i stap.

Long Australia, wanpela man i bin kilim dai ol raskol husat i bin laik brukim haus bilong em na kam stil bikos ol i no pret, ol i kam bek namba tri taim gen long stil na bagarapim turangu bikman ya. Olsem na em i pret long laip bilong em na sutim ol stilman ya i dai wantaim sotgan. Wanpela stua kipa tu i sutim wanpela bikman wantaim sotgan na em i dai bikos bikhet man ya i go long stua na pretim na mekim nabaut long stua. Em i bin mekim olsem bipo pinis. Man ya i pret long laip bilong em na sutim dai dispela stil man. Ol i laki bikos ol i gat sotgan na was bilong ol. PNG i nogat dispela kain was long olgeta haus.

Olsem na i gat tupela tingting long dispela. Larim raskol man i stap long kilim ol gutpela manmeri na bagarapim ol meri o pinisim ol olsem ol bikman ya i mekim bikos nogut ol bai i kam bek gen.

Olgeta lain i mekim trabel na bagarapim narapela lain i save gut tru olsem pasin ol i mekim i no stret. Em i no mekim trabel bikos em i longlong o het i paul.

sapos i gat gutpela lo bilong stretim dispela hevi, orait yumi mas toktok gut long en na kamapim nau. Tok i stap olsem olgeta nupela lo ino save wok gut inap em i kisim planti traim pasitaim na em bai wok gut na wok strong long bihain.



Ol Moge soim pasin bilong man

Dispela wik mi amamas long ritim long niuspepa long wanpela gutpela samting i bin kamap long Mt Hagen long Westen Hailans Provins. Tupela bikipela haus lain, Moge wantaim Jika i bin bung na paitim tok long gutpela sindaun na i no long surukim pasin birua na pait.

Nius i kam long Mt Hagen i tok olsem sampela lain bilong Jika i bin kilim indai wanpela man Moge long las Sande. Ripot i tok moa olsem dispela man husat i dai, em i marit na i gat ol pikinini.

Ripot tu i tok olsem long bekim bilong en, ol Moge i holim pasim tupela yanpela boi



TOK PISIN
wantaim
PETER MAIME

bilong Jika na kisim i go long ples bilong ol. Ripot tu i tok olsem dispela tupela boi ya i stap long hai skul. Tasol long Mande, ol Moge i kisim dispela tupela boi na i givim i go bek long ol Jika. Dispela tupela boi i bin tok tenkyu long ol Moge olsem ol i no bungim wanpela bagarap na stap gut.

Dispela pasin i brukim histori bilong Mt Hagen, Westen Hailans Provins na hailans rijion. Ol lain Moge i soim pasin tru bilong man olsem ol i no laikim pasin bilong bekim bek na ol famili

na haus lain i mas sindaun gut long ples.

Long 2000 Nesenel Populesen Sensus, Mt Hagen Distrik i bin gat 86, 951 pipel. Long dispela namba, 25, 099 i bin stap long Mt Hagen siti. Klostu long 60,000, em ol as ples manmeri bilong Mt Hagen Distrik husat i stap klostu long siti.

Moge na Jika em tupela bikipela haus lain long Mt Hagen na i ronim bisnis long Mt Hagen siti. Sapos dispela bel isi pasin bilong

Moge i no kamap, bai bikipela bagarap i kamap long Mt Hagen siti.

Namba tu polis bos long hailans rijion, Suprintenden Jeffery Kera i amamas long ol lain Moge na Jika i bung na pasim tok long i no long surukim dispela trabel.

Polis i bin holim pasim pinis tupela man husat polis i ting i stap insait long dai bilong dispela Moge man.

Dispela pasin bilong Moge long i no bekim bek na kisim tupela boi ya i kam bek long Jika em wanpela bikipela samting stret. Dispela i soim, pinis bilong wan-

pela histori na kirap bilong narapela histori. Histori bilong kros na pait i pinis na histori bilong laikim narapela na gutpela sindaun i kirap.

I gutpela tupela lain, Moge na Jika i putim dispela hevi long han bilong polis.

Wok nau i stap long polis long mekim wok painim aut gut na gen putim long han bilong kot long mekim disisen bilong em.

Sapos dispela kain pasin bilong Moge na Jika, i kamap long olgeta haus lain long hailans, ating bai hailans i kamap wanpela gutpela rijion bilong kantri.

Ol kain tingting na toktok we i no tru long yu

Sampela lain bai ol i tingting nating long sampela samting long yu olsem Lida ol i kolim Saspek Nating. Ol bai tingting nating na mekim kain ol toktok we i no tru long yu. Planti taim bai ol sutim tok long ol Lida long:

1 Bai ol sutim tok long ol Lida long Mani

2 Sampela taim long sampela Lida ol tok tru tasol long sampela i no tru.

*3 Bai ol i sutim tok long Lida tu long pasin bilong stap wansait sapos sampela disisen bilong Lida i no sapotim tingting



**OL PRINSIPOL BILONG
GUTPELA LIDA**

wantaim
**Pastor na Evangelist OHARE
JABERE**

bilong ol.

4 Bai ol i sutim tok tu long Lida long pasin bilong paolim samting.

5 Bai ol i sutim tok long Lida long paol wanaim ol meri. Sampela meri bilong ol Lida save sutim tok long ol man

bilong ol na saspek long ol. Dispela i ken bagarapim gutpela nem na wok bilong Lida.

Planti taim bai ol i tingting nating na toktok nating. Lida man na meri save kamap topik bilong planti diskasen o tingting toktok tasol. Lida i no ken be-hevi nating na wari planti long

ol dispela toktok. Em i pat bilong wok Lidasip yu holim na planti taim bai dispela ok kain toktok bai kamap long yu. Yu mas i gat pasin bilong fogivim ol lain husat i mekim nogut long yu.

Dispela em i gutpela polisi o prinsipol long yumi olsem Lida i ken bihainim. Yes!

Bai pasin bilong sutim tok i stap tasol yu mas winim ol wari tingting na stap strong long mekim wok bilong yu olsem Lida.

Jeremaiah 1: 4-10
Jeremaiah 31: 33-34

WANTOK

Published Weekly, Wednesday, for Word Publishing Company, Ltd.
P.O. Box 1982, Boroko, NCD

Papua New Guinea

Telephone: 325 2500

Fax: 325 2579

Email: word@global.net.pg

Pe bilong wanpela yia
52 niuspepa

Ples:	Air:
PNG	K140.00
AUSTRALIA	US\$100.00
ASIA PACIFIC na JAPAN	US\$80.00
AMERICA na EUROPE	US\$150.00

General Manager
Jeremy Burgess

Editor
Yakam Kelo

Published by Jeremy Burgess and printed by Pacific Star P.O. Box 6817 Boroko NCD at allotment 13 section 38 Waigani drive, Port Moresby

Word Publishing Company Limited is owned by the four major churches of Papua New Guinea: Catholics 50%, Lutheran 25%, Anglican 10%, United Church 10%. The company reserves the right to accept or reject any advertisement or other material submitted for publication which it deems contrary to the public interest at its absolute discretion. The publisher's general term acceptance are available at Word Publishing Company Ltd and are set out full on the display advertising form.

Mipela bai rausim Arafat

Israel:

PRAIM Minista bilong Israel, Ariel Sharon, i tok gen olsem ol bai rausim Presiden bilong Palestain, Yassar Arafat, long olgeta ol pasin nogut em i mekim long ol Israel. Dispela poto i soim Arafat.

Poto: Reuters/Loay Abu Haykel



Bom pairap long ka, kilim 11-pela



Irak:


SAMPELA pipel bilong Irak i lukluk raun long ol ka we i bin paia bihan long wanpela bom i bin pairap insait long wanpela ka

long Baghdad. Dispela bom i bin pairap long westen Baghdad las Trinde na i bin kilim inap long 11-pela pipel, ol opisal bilong haus sik i tok.

Poto: Reuters/Ceerwan Aziz

U.S.A bomim haus, kilim 8-pela


Irak:



SAMPELA man Irak i lukluk raun long wanpela haus long taun bilong Falluja long Irak, we i bin bagarap taim ami bilong Yunaited Stets ov Amerika (U.S.A) i bin bomim las Sarere.

Ami i bin karimaut wok bilong bomim dispela haus las Fraide nait bikos ol i billip ol sapota bilong wanpela teroris Abu Musab al-Zarqawai, i save bung long en. Dispela birua i bin kilim 8-pela pipel, ami na ol dokta bilong Irak i tok.

Poto: Reuters/Mohammed Khodor



Laip i hat

Sudan:



DISPELA poto i soim wanpela meri Sudan husat i no inap stap long graun tru bilong em bikos long pait we i wok long kamap namel long ol paitman - husat i tok olsem ol i makim ol pipel - na ol soldia bilong gavman, i wok long salim ol bisket em i mekim em yet long ol liklik rot long Kalma kem we em i save stap wantaim ol narapela lain olsem em.

Poto: Reuters/Antony Njuguna

Bashir bai kisim ol sas

Indonesia:



OL PROSEKYUTA o loya husat save wok long putim ol pipel husat save brukim long long kalabus, i ba mekim ol sas egensim wanpela bikman bilong ol Muslim long Indonesia, Abu Bakar Bashir, sampele taim long dispela wik. Ol dispela sas em long sait bilong teroris o wok bilong terorisim bikos ol i tok em i wok long i go pas long teroris grup Jemaah Islamiyah husat i save wok bung wantaim wantaim bikpel teroris grup al Qaeda. Dispela fa poto i soim Bashir.

Poto: Reuters/Beawiharta

Raunwin surik i go klostu long Bahamas

Bahamas:

Solwara i bruk bikpela long nambis bilong Bahamas allan taim raunwin ol i kolim Raunwin Jeanne i wok long surik i go klostu long hap. Raunwin Jeanne i bin kilim moa long 1000 pipel taim em i bin kamapim ol bikpela ren long Haiti las wiken.

Poto: Reuters/FelipZ

Man o monki?

Thailan:

WANPELA yangpela orang-utan (wanpela kain monki) i kaikai ol greip long Safari Wol Animol Pak long Bangkok, Thailan.

Poto: Reuters/Sukree Sukplang



Taim bilong vot

Indonesia:

OL ILEKSEN opisal bilong Indonesia i bilas long ol bilas bilong danis bilong Java na putim ol vot bilong ol long makim presiden i go insait long boks long wanpela hap bilong vot. Ol ripot i tok olsem

nau yet bipo jenerel bilong ami, Susilo Bambang Yudhoyono, husat i tok em i laik pait egensim terrorism na strongim ikonomi, i wok long i go pas long nau yet pesiden, Megawati Sukarnoputri, long dispela ileksen resis.

Poto: Reuters/Dwi Oblo



Tait wara bagarapim India

India:

WANPELA meri India (fran) i hap wokabaut hap swim insait long rot we ol bikpela ren i karamapim wantaim tait wara. Em i wok long i go long kisim wara bilong dring long Singhamura klostu long boda bilong Bangladesh, 106 mails i go long not bilong isten Indian Siti bilong Calcutta. Planti tausen pipel i kisim taim long dispela ol bikpela ren.

Poto: Reuters/Kumar Basu



Resis long kamap PM

Australia:

OPOSISEN gavman bilong Australia, Leba, i wok long i go pas long resis bilong Oktoba 9 ileksen long makim praim minista long nau yet, ol ripot i tok, tasol gavman i wok long ron i kam klostu long ol gen. Long dispela poto Praim Minista bilong Australia, John Howard (lephan) i na lida bilong oposisen, Mark Latham, i tok-tok wantaim bipo long ol i bin paitim toktok long ol tingting na polisi bilong ol long televisen long Sydney.

Poto: Reuters/Alan Porritt/Pool



UNITED
STATE OF
AMERICA

GUATAMALA

BAHAMAS

NICARAGUA

COLOMBIA

BRAZIL

ARGENTINA

PAPUA NEW
GUINEA

ALAND

Dokta Basse, i bin namba wan dokta bilong katim siklain

Michael Novingu i stori long laipstori bilong poro bilong em, leit Dokta Philip Basse.

OL PIPEL bilong Gugulava ples long Manam Ailan, Madang provins, na Papua Niugini tu, i lusim pinis wanpela gutpela pikinini bilong ol. Dispela pikinini em Dokta Philip Ururu Basse.

Basse i bin dai long 2 Mei, 2004.

Em i bin dai long sik bilong lewa (Heart Attack).

Dokta Basse i bin wanpela gutpela pren bilong mi. Mi bin kirap nogut taim ol i tokim mi olsem em i dai pinis tasol mi i no bilip inap mi go kamap long haus bilong em na mi painimaut olsem dispela toktok olsem em i dai i tru. Dai bodi bilong em i slip long bet na ol famili, wantok na pren i krai long em. Mi sori na mi krai tu.

Mi bin save long Dokta Basse long yia 2000 we Dokta Edward Talinat i bin soim mi long em taim mi wok olsem Menesa bilong Ewa Ges Haus long Madang. Long dispela taim mitupela i gutpela pren tru long sait bilong wok bisnis na ol arapela pasin olsem serim samting, bung raun wantaim na ol famili bilong mitupela tu i bin bung amamas wantaim. Long dispela kain pasin mitupela i save givim wok bisnis namel long mitupela. Sapos wanpela ges i sik na i laik lukim dokta, mi save salim em i go long klinik bilong Dokta Basse. Long sait bilong em ol lain i painim haus slip em i save salim ol i kam lukim mi. Long dispela kain pasin na mitupela i kamap gutpela pren tru.

Mi painim olsem Dokta Basse em i wanpela trupela man tru long famili bilong em. Em i wanpela man bilong wok hat tru na em i man bilong bel'isi long olgeta manmeri long asples bilong em long Dugulava, ol arapela pipel bilong Madang na kantri wantaim.

Em i no save tok mi gat bikpela save na apim nem bilong em yet, nogat. Em i man bilong daun pasin na dispela i mekim ol kainkain man i kamap pren bilong em.

Planti manmeri i bin kamap long haus krai bilong em long taim em i dai. Ol i bin soim bikpela sori na las rispek bilong ol long em. Wanpela meri i bin krai na i singaut 'Dokta Basse, han bilong yu i gat mejik yu oraitim sik bilong mi.'

Mi bin sori tru taim em i lusim mi na famili bilong mi. Mi i gat bikpela bilip tru long wok bilong em taim meri bilong mi i bin kisim bikpela sik lewa pen. Mi kisim em i go long klinik bilong Dokta Basse long 2 kilok long moning na em i lukim sik bilong em na nau em kamap orait gen na dispela sik lewapen i no kamap moa.

Dokta Basse i bin pinisim skul long Tabele Komyuniti Skul long Manam Ailan na pinisim gret 10 long Malala Katolik Hai Skul, Bogia, long yia 1971. Long yia 1972 Dokta Basse i winim wanpela skolasip ol i kolim Pablik Sevis Skolasip na bin i go skul long Yunivesiti bilong Papua Niugini (UPNG) long 1972 na i pinisim skul bilong em long kamap dokta long yia 1976 we em i greduet wantaim pepa bilong marasin na pepa bilong sejeri o katim ol sikmanmeri na painim sik bilong ol wantaim ol arapela 18 wanskul bilong em. Ol dispela wanskul bilong em em -Dokta Usurup nau bosman bilong Modilon Jenerel Haus Sik long Madang, Dokta Kulunga, Dokta Temu, Dokta Edward Talwat,

Dokta Pikacha na Dokta Dagan na ol arapela dokta. Bihain long ol i pinisim skul ol i salim ol i go aut long ol haus sik long olgeta hap bilong PNG na ol wokim trening bilong ol.

Long 1979 leit Dokta Basse i go skul long Yunivesiti bilong PNG long wokim digri bilong em na i greduet long 1983. Em i kamap wanpela namba wan speselis sejen long kamaut long yunivesiti bilong yumi PNG stret.

Bipo long em i kisim mastas digri bilong em em i go skul long Royal Prince Alfred Haus Sik long Sidney, Australia long 1982. Em i bin kari-maut wok painimaut long we bilong katim ol sikmanmeri na painim sik bilong ol na i winim dispela na i mekim em i kamap dokta tru bilong katim man long 1984.

Long dispela taim em i wanpela yangpela sejen na i gat moa save long katim ol sikmanmeri na i wok namel long ol waitman dokta olsem Kenclezy, Frank Smith, David Hamilton, Sankita Singha, Niviriti Patil na ol arapela lain waitman dokta.

Dispela i kamapim histri long PNG we mipela yet i gat saveman dokta i go bek long asples bilong ol na Dokta Basse i kamap namba wan sejen bilong kantri bilong yumi.

Long dispela taim Dokta Dagan i

kamap sief sejen na Dokta Basse i kamap namba tu bilong em. Dispela tupela i olsem brata na kamapim gutpela wokbung wantaim long helpim ol sikmanmeri insait long dispela kantri.

Insait long yia 1986 Dokta Basse i kamap sief sejen we em i trenim ol sejen olsem Dokta Kaupa, Dokta Watt, Dokta Torova, Dokta Kevau nau i lukautim othapaedik sejen bilong ol pikinini long Pot Mosbi Jenerel Haus Sik, Dokta Victor Golpak na ol arapela dokta nau i wok i stap long ol haus sik bilong yumi long PNG.

Nau yet i gat 40 sejen ol man PNG stret i holim ol dispela wok na 32 i wok wantaim ol haus sik bilong gavman.

Dokta Basse na ol wanwok bilong em i rispektim em olsem wanpela trupela tisa na man i gat planti save

Nau yet i gat 40 sejen ol man Papua Niugini stret i holim ol dispela wok na 32 i wok wantaim ol haus sik bilong gavman.

Dokta Basse na ol wanwok bilong em i rispektim em olsem man i gat planti save wanpela trupela tisa na long katim manmeri i gat sik na rausim.

Long 1986 Dokta Basse i kamap presiden bilong ol sejen long PNG. I no dispela tasol, em i bin holim tu ol arapela bikpela wok insait long PNG na arapela kantri long wok olsem

dokta na sejen.


Dokta Basse i bin kam bek long asples bilong em long Madang long 1997 na i statim praivet klinik bilong em. Em i no wok bisnis tasol, em i wok tu long helpim Modilon Haus sik long sait bilong katim ol sikmanmeri. Dispela long wanem Modilon haus sik i nogat speselis sejen.

Dokta Basse i bin resis long sit bilong Bogia long 1997 ileksen na kam namba 2 we Bernard Molok i bin winim em. Em i traim gen long 2002 ileksen long Bogia Open na i kam namba 2 gen long John Hickey.

Dokta Basse i maritim Naonao Moide bilong Daru long Westen provins na i gat 4-pela pikinini meri. Ol dispela pikinini meri em Francisca, Esther, Cathy na Lillian. Lillian nau i wok wantaim *Post Courier Niuspepa* long Pot Mosbi olsem niusmeri.

Bihain Dokta Basse i marit gen, em i kisim Violet we em i stap wantaim em inap dai i bungim em. Long sait bilong klinik bilong em, bisnis em i stap orait tasol wankain olsem taim Dokta Basse i stap. Yu husat manmeri i sik yupela i welkam tasol long lukim Misis Violet Basse wantaim Dokta Kawa na ol wokmanmeri bilong de na nait sejeri ol bai amamas tasol long helpim yu.

Dokta Basse yu brata bilong mi, yu kisim malolo nau long paradais.



Dokta Basse, i sindaun long opis bilong klinik bilong em long Madang long taim em i bin stap laip. Dokta Basse i lusim laip bilong em long Mei 2004 bihain long sik bilong lewa (heart attack) i kisim em. Foto: MICHAEL NOVINGU

Sanguma em tru o nogat?

Yakam Kelo i raitim

SANGUMA em wanpela kain pasin tumbuna bilong kilim narapela man o meri. Planti pipel insait long komyniti i save pret olsem sanguma i ken mekim ol i sik o kilim ol bikos sanguma i gat pawa.

Wankain tu i gat pasin bilong mekim posin long bagarapim o kilim man. Em tu i bikpela pasin komyniti i save pret long en bikos pipel i ting posin i gat pawa bilong kilim man o senisim samting i go nogut.

Tasol tude nupela save na pasin i kamap na i luksave olsem i no sanguma tasol i as bilong man o meri i dai. Man o meri i gat sik long bodi na sik i winim em. Dispela nau em save bilong sik olsem kensa, malaria, tibi, sik AIDS na planti arapela sik moa. Na ol i tok i gat save long as sik na dai i kamap na i gat rot bilong stretim. Em nau yumi gat ol dokta na nes bilong stretim ol sikmanmeri na ol saintis o save-man bilong save long as bilong sik na dai i kamap.

Tasol tingting bilong sanguma na posin i no pinis yet long olgeta hap bilong Papua Niugini na long Melanesian komyniti. Ol pipel i pret yet long posin na sanguma bai bagarapim ol yet.

Wanpela bikpela bung bilong sios na ol lain husat i save stadi na kisim save long pasin bilong ol pipel na ples bilong ol i bin lukluk insait long dispela toktok bilong sanguma insait long Papua Niugini.

Dispela bung i harim ripot na toktok bilong ol sios lida na ol dispela lain na harim kainkain ripot bilong pasin sanguma long kainkain ples insait long hailans na nambis.

Hermann Springler em wanpela wok misin man husat i save stadi long pasin na sindaun bilong ol pipel na wanem kain senis ol pipel i save go insait long en we i senisim laipstail na sindaun bilong ol.

Long dispela bung Reveren Springler i tokaut olsem taim ol i bin salim sampela wokman bilong ol i go insait long ol ples long Simbu provins long painimaut long pasin sanguma long hap, ol i kam bek wantaim wanpela bikpela luksave olsem.

Ol pipel i pret long sanguma bai kilim ol na tu sampela lain i pret long ol pipel bai kilim ol bikos ol i sutim long ol i sanguma lain.

Olsem na dispela tupela tingting wantaim i sanap strong namel nau long rot bilong lukluk i go insait long dispela hevi we ol pipel i wok long kilim dai ol man nating bikos ol i sutim tok long ol i mekim sanguma.

Reveren Springler i tokaut olsem i gat tupela kain luksave tude long sik na dai taim yumi glasim gut wanem as sik na dai i kamap. Planti taim em wanwan man na meri yet i ken luksave long dispela na save long as bilong sik na dai i kamap.



JADA 30/09.04

Long narapela sait em ol pipel i lukim sik na dai i kamap na i nogat as long dispela i kamap. Bikpela tingting em ol pipel i tingim tewel o sanguma tasol na i no arapela samting moa. Dispela tingting em ol pipel long komyniti i save kamapim.

Olsem na Reveren Springler i tok dispela tupela tingting nau i soim olsem wanem as bilong sik o dai em nupela samting we komyniti yet o wanwan yet i kamapim.

Olsem na em i gutpela long luksave long sampela gutpela poin. Nius bilong ol pipel i kilim ol lain taim i sutim tok long ol i posin o sanguma lain i wok long kamap bikpela insait long Papua Niugini. Planti long hailans.

Long sait bilong mekim posin, Reveren Springler i tok ol i luksave olsem dispela i no kamap tasol long stretim ol hevi na kros bilong ples.

I gat arapela as tu long mekim posin. Dokta Utrick Bergmann i tok olsem sampela i mekim posin bikos long pasin jeles o winim samting o kisim bikmenm.

Long PNG sapos wanpela yangpela man husat i nogat sik tasol em i dai bai ol manmeri i tok olsem em posin o sanguma tasol. Ol manmeri i save pret long wanem samting bai sanguma i mekim long ol. Olsem na ol i mas kilim em long bekim bek o long pinisim pasin sanguma long noken kamap moa.

Tingting bilong sanguma o posin i stap insait long Papua Niugini na Melanesian komyniti we pasin na luksave bilong en i narakain long narapela narapela ples o komyniti.

Pater Philip Gibbs tu em wanpela wokman bilong Melanesian Institute long Goroka we i mekim sampela wok insait long pasin bilong sanguma na posin insait long Papua Niugini i tok i gat kainkain pasin bilong skelim sanguma pasin we i no wankain long planti hap bilong kantri.

Sampela i save skelim sanguma em olsem man nogut wantaim pawa bilong kilim man i dai. Arapela i save skelim sanguma i olsem wanpela i mekim sampela kain samting long kilim narapela man. I gat pasin bilong posin tu i stap long kainkain hap bilong kantri.

Na plant i save skelim posin em olsem man i mekim samting olsem putim samting nogut long kaikai na wanpela i kaikai na i dai o mekim sampela samting na makim long wanpela man long kilim em.

I gat pasin bilong mekim mejik na salim i go long kilim man o meri. Olsem na olgeta dispela kain pasin i no wankain long planti hap bilong PNG.

Kain olsem long Mekeo man bilong mekim posin i no wankain olsem posin man bilong Enga husat i man bilong mekim toktok tasol na bagarapim man o Arapes glasman bilong rausim sik o Tolai man bilong mekim lngiat.

I gat kainkain wei na pasin.

Pater Gibbs i tok long Hailans, ol i save skelim sanguma em olsem wanpela samting nogut i go insait long man o meri na i yusim save na tingting bilong dispela man o meri long mekim ol birua samting bilong bagarapim arapela manmeri.

Long Simbu na Wagi Veleria ol i save kolim sanguma bilong ol em kum o kumo na em i save kam olsem wanpela wel abus.

Sampela taim em i kamap ples klia em bai i olsem kapul bilong diwai na sapos em i go insait o stap insait long wanpela man o meri em bai go pas long save na tingting bilong dispela man o meri na em bai mekim kainkain birua pasin.

Stadi bilong Pilosopi (Philosophical) i luksave olsem sanguma em i olsem stori we i save kamap taim wanpela i kisim bagarap o ol i sutim tok long wanpela man o meri long pasin na wokabaut bilong em.

Long taim bilong tumbuna

pasin bilong lotu i no narakain long ol pasin ol pipel i save mekim long komyniti bilong ol. Pasin bilong lotu i kamap bihainim pasin na sindaun bilong ol pipel na i mekim kamap pasin bilong wokim bisnis na politiks.

Dispela i kamap olsem pasin bilong ol pipel na wok bilong to na oda i kamap long pasin na sindaun bilong ol i stap gut.

Em nau nupela save na tingting i kamap we ol i tok wanem hevi o bagarap i kamap long man bai to i stretim. Yumi ken luksave long hevi na bagarap i kamap o sampela ples klia samting i kamapim bagarap.

Kain olsem klaut i pairap bikos ilektrik pawas i kam long skai, o man i kisim kol sik na kus bikos i gat binatang bilong givim sik i ron wantaim win na man i kisim i go insait long bodi bilong em.

Ol birua na bagarap tu em nupela tingting na save i soim rot na pasin ol dispela hevi i kamap. Tasol ol dispela save na tingting em i gutpela long kisim save long en insait long dispela taim nau we planti samting em man i mekim wantaim han na save.

Tasol bikpela askim i stap yet em, maski wanem samting ol saintis i painimaut na save long rot ol i kamap long en.

Tingting na bilip long sanguma i wok long stap yet bikos i nogat ansa yet long pawas na strong bilong em i tru o nogat na i ken mekim samting i kamap tru o nogat.

Olsem na olgeta taim wanpela man o meri i save kisim hevi bilong mekim pasin sanguma. Ol pipel i save sutim tok long em na bagarapim em.

Tude ol dokta na nes i ken tok olsem man i sik na dai bikos ol samting i doti na mekim man i sik o jems o binatang bilong sik i raun planti o ol dispela inap mekim man i sik.

Ol dispela nupela tingting em ol pipel bai save tasol bikpela askim em, bilong

wanem dispela sik i kamap na husat i kamapim?

Tasol nau dispela askim we dispela samting i kamap olsem wanem i wok long pinis. Bikpela askim ol pipel bilong ples i wok long askim yet em, husat i mekim dispela?

Ripot bilong Pater Gibbs i tok em i ting dispela hevi bilong sanguma bai i go bikpela long ol yia i kam yet taim birua bilong sik AIDS i kamap bikpela moa.

Taim planti yangpela manmeri i dai bai ol famili na ol lain i askim, Bilong wanem as? Husat i mekim? Em i tok ol i mas mekim moa wok i go insait long pasin sanguma bikos dispela tingting na bilip o pret i wok long kamap bikpela long Simbu provins na i go aut long ol arapela hailans provins olsem lalibu long Sauten Hailans provns na Enga provins.

Ol lain ya bai kamapim na strongim bilip na save bilong ol long pasin sanguma na wanem kain rot bilong ol long stretim bai bihainim pasin na wei bilong ol yet.

Dispela bung i kamap bikos hevi bilong sanguma i bikpela long ol hap bilong hailans olsem long Simbu provins yet em moa long 100 manmeri i save dai long olgeta yia bikos ol pipel i ting ol dispela lain i mekim sanguma na kilim famili bilong ol.

Sampela taim ol i bagarapim laip na sindaun bilong ol lain ol i sutim tok long ol olsem sanguma lain. Planti famili tu i save kirap iusim graun na ples bilong ol na go long narapela hap bikos ol pipel i sutim tok long ol olsem ol i sanguma lain.

Dispela hevi i kamap bikpela pinis long ol komyniti olsem Gembogl na Suave we wanpela polisman i bin tokaut long en insait long dispela miting wantaim ol sios lida na ol lain i save wok insait long ol komyniti na ol ples.

I nogat ansa yet long luksave tru olsem sanguma na posin em i tru o nogat na i save wok o nogat.

Tude em nupela save i tok ol man i sik bikos long jems o binatang bilong doti na bagarapim bodi. Man i dai long birua bilong kar, bagarapim bodi, sik na samtin we ol pipel i klia long as bilong en.

Tasol sanguma na posin em pipel i no klia yet long man i mekim dispela i kam olsem wanem na kilim wantok bilong ol i dai.

Em i bikpela wok tru yet long painimaut ansa na rot bilong stretim bikos dispela i go wantaim save na tingting na pasin bilong pipel, kastom, pasin bilong pret na arapela pasin moa.

Em i tru ol saveman bilong stadi insait long dispela hevi i gat bikpela hat tru yet long go insait na digim na kamautim na putim ples klia bai ai bilong ol manmeri i ken op long lukim olsem em i tru o i no tru.

Yumi save bilip tumas long sanguma na poisen. Planti manmeri i dai long sik AIDS long ples, tasol yumi save ting em sanguma i kilim em...Na ol wantok bilong husat i dai bai go na kilim nating man o meri ol i ting em i wanpela sanguma...
Edita Yakam Kelo i lukluk long dispela sindaun....

Em i orait long gavman i salim Telikom o nogat?

Em i orait long gavman i salim Telikom o nogat? Telikom em i wampela bisnis han bilong gavman olsem Air Niugini, PNG Wara Bod, Elcom na bipo Papua Niugini Benking Koporesen, we em i save kamapim mani long mekim wok bilong em. Nau yet i gat tok olsem Telikom i save kamapim olsem K100 milien long wanwan yia. Tasol i gat tok olsem gavman i laik salim Telikom long K40 milien long wampela kampani bilong Zimbabwe, Econet Wireless. Ripota Paul Zuvani i raun na kisim tingting bilong ol manmeri long salim bilong Telikom long dispela kampani.



Paulus Michael

Paulus Michael i bilong Mt Hagen, Westen Hailans provins na i pasto bilong wampela loka sios long Mt Hagen. Wantok Niuspepa i bungim em taim em i raun long Pot Mosbi. Em i tok gavman i mas salim Telikom long wanem em i no save givim gupela sevis long ol pipel. "Em i save kosim tumas ol manmeri long sevis em i givim long ol pipel. Olgeta yia kos bilong yusim telepon i go antap. I nogat wampela telepon kampani long Papua Niugini we i save resis wantaim Telikom. Olgeta mani em Telikom i save kisim na bilong wanem em i save sasim nating ol manmeri long bikipela sas na oltaim i laik apim sas bilong em," Pato Michael i tok.

Relvie Tibu

Relvie Tibu i bilong Kokopo, Is Nu Briten provins, na em wok wantaim Exxon long Gordons, Pot Mosbi. Em i laikim gavman i mas salim Telikom. "Ol sevis em Telikom i givim i daunbilo tru. Ol wokman i no save bekim singaut bilong ol manmeri long stretim telepon bilong ol taim ol i askim ol long stretim telepon bilong ol. Mi bin wet klostu 6 mun long Telikom i kam na stretim telepon bilong mi bihain long mi askim ol. Maski hamas taim mi kamap long opis bilong ol na askim ol, na sas em i sasim long ol manmeri i antap tumas," Tibu i tok.

Thomas Kusia

Thomas Kusia i bilong Kundiawa, Simbu provins, na em i wok wantaim PNG Komyuniti Developmen Skim (PNGCD AusAID) long Waigani, Pot Mosbi. Em i tok olsem tru sampela taim

Telikom i no save givim gupela sevis na i save givim bikipela sas long ol sevis bilong em tasol i no gupela long gavman i salim Telikom. "Nogat. Gavman i no ken salim Telikom. Em lusim dispela tingting na traim long daunim sas em i save givim long ol pipel. Watpo gavman bai salim bisnis we i save helpim em long kamapim planti mani! Em bai longlong sapos em i salim kampani we i save mekim klostu K100 milien long wanwan yia long K40 milien tasol. O sapos em i gat strongpela tingting yet orait em i mas salim long wampela loka kampani yet. Dispela bai i soim olsem mani i stap yet long kantri. Em i no ken salim long kampani bilong narapela kantri.

Pania Makeni

Pania Makeni i bilong Trobrand Ailan long Milne Be provins, na em i wok wantaim Steamships Stop 'N' Shop long Waigani, Pot Mosbi. Em i tok em i orait long gavman i salim Telikom. Tasol em i no laik gavman i salim long kampani bilong narapela kantri. "Gavman i save olsem em i sot long mani na em i mekim olgeta samting long lukautim gut mani. Na sot long mani na bekim ol dinau bilong em i bikipela as long em i wok long salim ol samting bilong em. Long dispela as em i mas salim long wampela nesenel kampani we mani i no go aut. I olsem mani em i givim i stap yet long kantri. Na ating sapos wampela kampani i baim Telikom bai yumi lukim gupela sevis i kamap."



Kendepo Pere Kumbayago

Kendepo Pere Kumbayago i bilong lalibu, Sauten Hailans provins. Em i save mekim wok bilong em

yet long Pot Mosbi. Em i no save amamas long kain sevis Telikom i save givim long ol kastoma bilong em na tu sas bilong sevis em i save givim i antap tumas. "Em i orait long gavman i salim Telikom bai Telikom i stap long han bilong wampela man na olsem gupela sevis i ken kamap. Na long wankain taim em i mas tok orait long narapela tupela o tripela telepon kampani long kantri. Wantaim resis bai sevis i kamap orait na sas bilong ol sevis ol i givim i no ken stap antap."

Kelly Giad

Kelly Giad i bilong Amele, Madang provins, na em i save wok wantaim Steel Industri long Gordons, Pot Mosbi. Em i tok gavman i mas salim Telikom. "I gupela gavman i salim Telikom bai gupela ol sevis i ken go long ol pipel. Nau yet sapos samting i rong long telepon bilong yu na yu askim ol Telikom lain em i kisim klostu ol mun o sapos nogat yia long ol wokman i kamap na stretim telepon bilong yu. Dispela long wanem ol wokman i ting ol i wokman bilong gavman na olsem ol i ken wok long laik. Maski ol i save olsem i gat wok i stap long ol i mas mekim. Wantaim kampani kain hambak pasin bai i no inap kamap."



Kaime Kipi

Kaime Kipi i bilong Minz, Westen Hailans provins. Em i no laik gavman i salim Telikom. "I gupela gavman i salim ol samting bilong em long painim mani long bekim dinau bilong em, tasol long wankain taim em i mas painim sampela kain we long kisim gut mani. Telikom i wampela gupela bisnis han bilong gavman long mekim mani na sapos em i salim Telikom wantaim Elcom o Wara Bod

em bai i nogat we long kisim mani. Dispela tripela bisnis han bilong gavman i save kamapim gut mani bilong gavman. Sapos em i laik salim Air Niugini dispela mi i ting em i orait. Air Niugini i save sasim nating bikipela mani long ol sevis bilong em tasol i no save kamapim gupela win mani bilong gavman."

Michael Ruagi Guaragi

Michael Ruagi Guaragi i bilong Abegini, Mikarew long Madang provins. Em i tok tru em i no save yusim tumas telepon tasol sampela taim em i mas yusim em i save painim hat long wanem sas bilong yusim telepon i antap tumas. "Long mekim laip bilong ol manmeri husat i yusim telepon Telikom i mas isi long kain sas em i save makim long ol sevis em i givim. I nogat wampela telepon kampani i stap long resis long wantaim Telikom na olsem olgeta mani em i save kisim long ol kastoma bilong em. Em i save kisim planti mani na em bai rong sapos em (Telikom) i tok em i sot long mani. Na mi laikim narapela ol telepon kampani long kamap tu long resis wantaim Telikom."



Lewis Sindigian

Lewis Sindigian i bilong Maprik, Is Sepik provins. Em i kam raun long Pot Mosbi taim Wantok Niuspepa i bungim em. Em i ting em i no gupela long gavman i salim Telikom. Telikom em i wampela we gavman i kisim mani long sapotim ol wok bilong em. Tasol long kain sevis em ol wokman i givim long ol kastoma i save givim nem nogut long kampani. "Mi sori tru long dispela. Mi lukim olsem i gat bikipela hevi bilong tingting na stap long

kantri. I nogat rispek long wanwan man yet na narapela na olsem maski em i wok bilong manmeri long givim sevis ol bai i no inap mekim. Dispela kain samting i daunim kantri bilong yumi."

Kelly Mesi

Kelly Mesi i bilong Sera, Aitape Sandaun provins. Em i wok wantaim Vanimo Timbers tasol i kam raun long Pot Mosbi taim Wantok Niuspepa i bungim em. Em i tok gavman i ken salim Telikom. "Dispela long wanem gupela sevis bai kamap. Nau yet ol wokman i ting ol i ol pablik seven na olsem ol i no save wari tumas long kain sevis ol i givim long ol kastoma. Sapos praiwet kampani i kism bai ol gupela sevis i kamap. Long wankain taim tu mi laikim gavman i mas tok orait long narapela tupela ol tripela telepon kampani i kamap long resis wantaim Telikom. Sapos i gat resis bai gupela sevis i kamap na sas bilong ol sevis bai daun long ol kastoma.

Lukim Laik bilong Pipel pes long Wantok Niuspepa neks wik long skelim tingting na toktok bilong ol pipel long wampela narapela bikipela askim.

CATHOLIC RADIO schedule

Fonde		Mande	
6:00	ANGELUS	6:00	ANGELUS
6:05	MEDITATION/INSPIRATIONAL MUSIC	6:05	SUNDAY EUCHARIST (regday)
7:00	VATICAN RADIO WORLD NEWS	7:00	HOLY ROSARY
7:15	VATICAN ENGLISH PROGRAM	7:30	CATHOLIC INSIGHT
7:35	NON-STOP GOSPEL MUSIC	8:00	VATICAN WORLD NEWS
8:00	JOURNEY HOME (EWTN)	8:15	VATICAN ENGLISH PROGRAM
9:00	VATICAN RADIO WORLD NEWS	8:40	IN THE LORD'S VINEYARD
9:15	VATICAN ENGLISH PROGRAM	10:00	NON-STOP GOSPEL MUSIC
9:40	KIDS SING-ALONG	Fonde	
10:00	CATHOLIC JUKEBOX	6:00	ANGELUS
10:30	GOSPEL MUSIC	6:05	MEDITATION/INSPIRATIONAL MUSIC
11:00	NON-STOP GOSPEL MUSIC	7:00	VATICAN WORLD NEWS
12:00	ANGELUS	7:15	VATICAN ENGLISH PROGRAM
12:05	VATICAN WORLD NEWS	7:35	NON-STOP MUSIC
12:20	VATICAN ENGLISH PROGRAM	8:00	BEST OF JOURNEY HOME
12:40	REFLECTION MUSIC	9:00	VATICAN WORLD NEWS
1:00	LAMB'S SUPPER WITH DR. SCHOTT HAHN	9:15	VATICAN ENGLISH PROGRAM
2:00	MUSIC	9:35	KIDS SING-ALONG
3:00	CHAPLET OF DIVINE MERCY	10:00	CATHOLIC JUKEBOX (EWTN)
3:20	NON-STOP GOSPEL MUSIC	10:30	NON-STOP GOSPEL MUSIC
4:00	CATHOLIC JUKEBOX (ENCORE)	12:00	ANGELUS
4:30	NON-STOP GOSPEL MUSIC	12:05	VATICAN WORLD NEWS
5:00	JOURNEY HOME	12:20	VATICAN ENGLISH PROGRAM
6:00	ANGELUS	12:40	AFTERNOON REFLECTION MUSIC
6:05	MADANG LOCAL NEWS	1:00	THE WAY TO FOLLOW JESUS
6:10	VATICAN ENGLISH PROGRAM	1:30	GOSPEL MUSIC
6:30	LAMB'S SUPPER WITH DR. SCHOTT HAHN	3:00	CHAPLET OF DIVINE MERCY
7:00	HOLY ROSARY	3:20	NON-STOP GOSPEL MUSIC
7:30	CATHOLIC INSIGHT	4:00	CATHOLIC JUKEBOX (EWTN)
8:00	VATICAN WORLD NEWS	4:30	NON-STOP GOSPEL MUSIC
8:15	MADANG LOCAL NEWS	5:00	MESSAGE IN MUSIC
8:30	VATICAN ENGLISH PROGRAM	6:00	ANGELUS
9:00	TOK STREET LONG HVAIDS	6:05	VATICAN ENGLISH PROGRAM
10:00	VATICAN ENGLISH PROGRAM	6:30	MANY FACES OF MARY
10:30	NON-STOP GOSPEL MUSIC	7:00	HOLY ROSARY
		7:30	BENEDICTION
		8:00	VATICAN WORLD NEWS
		8:15	CRN LOCAL NEWS
		8:30	VATICAN ENGLISH PROGRAM
		9:00	BEST OF JOURNEY HOME
		10:00	CATHOLIC JUKEBOX (EWTN)
		10:30	VATICAN ENGLISH PROGRAM
		11:00	NON-STOP GOSPEL MUSIC
Fonde		Fonde	
6:00	ANGELUS	6:00	ANGELUS
6:05	MEDITATION/INSPIRATIONAL MUSIC	6:05	MEDITATION/INSPIRATIONAL MUSIC
7:00	VATICAN WORLD NEWS	7:00	VATICAN WORLD NEWS
7:15	VATICAN ENGLISH PROGRAM	7:15	VATICAN ENGLISH PROGRAM
7:35	NON-STOP GOSPEL MUSIC	7:35	NON-STOP MUSIC
8:00	RADIO ST. JOSEPH PRESENTS	8:00	RADIO ST. JOSEPH PRESENTS
9:00	VATICAN WORLD NEWS	9:00	VATICAN RADIO WORLD NEWS
9:15	ENGLISH PROGRAM	9:15	VATICAN ENGLISH PROGRAM
9:35	KIDS SING-ALONG	9:40	KIDS SING-ALONG
10:00	CATHOLIC JUKEBOX	10:00	CATHOLIC JUKEBOX
10:30	NON-STOP GOSPEL MUSIC	10:30	GOSPEL MUSIC
11:00	WAVE FACTOR (EWTN)	12:00	ANGELUS
12:00	ANGELUS	12:05	VATICAN WORLD NEWS
12:05	VATICAN ENGLISH PROGRAM	12:20	VATICAN ENGLISH PROGRAM
12:30	FATIMA	12:40	REFLECTION MUSIC
1:00	HOLY ROSARY	1:00	SUPER SAINTS
1:30	STATIONS OF THE CROSS	1:30	GOSPEL MUSIC
2:00	VATICAN WORLD NEWS	3:00	CHAPLET OF DIVINE MERCY
2:30	CRN LOCAL NEWS	3:20	NON-STOP GOSPEL MUSIC
3:00	VATICAN ENGLISH PROGRAM	4:00	CATHOLIC JUKEBOX
3:30	TOK STREET LONG HVAIDS	4:30	NON-STOP GOSPEL MUSIC
4:00	CATHOLIC JUKEBOX	5:00	RADIO ST. JOSEPH PRESENTS
4:30	VATICAN ENGLISH PROGRAM	6:00	ANGELUS
5:00	NON-STOP GOSPEL MUSIC	6:05	AITAPE LOCAL NEWS
5:30	WAVE FACTOR (EWTN)	6:10	VATICAN ENGLISH PROGRAM
6:00	ANGELUS	6:30	MOTHER OF REDEEMER
6:05	VATICAN ENGLISH PROGRAM	7:00	HOLY ROSARY
6:30	FATIMA	7:30	SUPER SAINTS
7:00	HOLY ROSARY	8:00	VATICAN WORLD NEWS
7:30	STATIONS OF THE CROSS	8:15	AITAPE LOCAL NEWS
8:00	VATICAN WORLD NEWS	8:30	VATICAN ENGLISH PROGRAM
8:15	CRN LOCAL NEWS	9:00	TOK STREET ABOUT HVAIDS WITH FR. JUDE (ENGLISH)
8:30	VATICAN ENGLISH PROGRAM	10:00	CATHOLIC JUKEBOX
9:00	TOK STREET LONG HVAIDS	10:30	VATICAN ENGLISH PROGRAM
10:00	CATHOLIC JUKEBOX	10:50	NON-STOP GOSPEL MUSIC
10:30	VATICAN ENGLISH PROGRAM		
11:00	NON-STOP GOSPEL MUSIC		
Sarae		Trinde	
6:00	ANGELUS	6:00	ANGELUS
6:05	MEDITATION/INSPIRATIONAL MUSIC	6:05	MEDITATION/INSPIRATIONAL MUSIC
7:00	OUR FATHER'S PLAN	7:00	VATICAN WORLD NEWS
7:30	CROSSROADS (EWTN)	7:15	VATICAN ENGLISH PROGRAM
8:00	VATICAN WORLD NEWS	7:35	NON-STOP GOSPEL MUSIC
8:15	VATICAN PROGRAM	8:00	SCRIPTURE MATTERS WITH DR. SCHOTT HAHN (EWTN)
8:35	MUSIC	9:00	VATICAN WORLD NEWS
9:30	BACKSTAGE (EWTN)	9:15	VATICAN ENGLISH PROGRAM
10:00	WAVE FACTOR	9:35	KIDS SING-ALONG
11:00	NON-STOP GOSPEL MUSIC	10:00	CATHOLIC JUKEBOX
12:00	ANGELUS	10:30	NON-STOP GOSPEL MUSIC
12:05	VATICAN WORLD NEWS	12:00	ANGELUS
12:20	VATICAN ENGLISH PROGRAM	12:05	VATICAN WORLD NEWS
12:40	GOSPEL MUSIC	12:20	VATICAN ENGLISH PROGRAM
3:00	CHAPLET OF DIVINE MERCY	12:40	REFLECTION MUSIC
3:20	GOSPEL MUSIC	1:00	FIRST COMES LOVE DR. SCHOTT HAHN (EWTN)
4:00	BACKSTAGE	1:30	AFTERNOON GOSPEL MUSIC
4:30	NON-STOP GOSPEL MUSIC	3:00	CHAPLET OF DIVINE MERCY
5:00	WORLD OVER NEWS	3:20	NON-STOP GOSPEL MUSIC
6:00	ANGELUS	4:00	CATHOLIC JUKEBOX
6:05	VATICAN ENGLISH PROGRAM	4:30	NON-STOP GOSPEL MUSIC
6:30	MIRACLES OF THE CROSS	5:00	SCRIPTURE MATTERS
7:00	HOLY ROSARY	6:00	ANGELUS
7:30	CROSSROADS	6:05	VANIMO LOCAL NEWS
8:00	VATICAN WORLD NEWS	6:10	VATICAN ENGLISH PROGRAM
8:15	VATICAN ENGLISH PROGRAM	6:30	FATIMA HEAVEN'S PEACE PLAN
9:00	WORLD OVER NEWS (EWTN)	7:00	HOLY ROSARY
10:00	BACKSTAGE	7:30	DOCTORS OF THE CHURCH
10:30	VATICAN ENGLISH PROGRAM	8:00	VATICAN WORLD NEWS
11:00	NON-STOP GOSPEL MUSIC	8:15	VANIMO LOCAL NEWS
12:00	ANGELUS	8:20	VATICAN ENGLISH PROGRAM
12:05	VATICAN WORLD NEWS	9:00	TOK STREET ABOUT HVAIDS WITH FR. JUDE
12:20	VATICAN ENGLISH PROGRAM	10:00	CATHOLIC JUKEBOX
12:40	GOSPEL MUSIC	10:30	VATICAN ENGLISH PROGRAM
3:00	CHAPLET OF DIVINE MERCY	10:50	NON-STOP GOSPEL MUSIC
3:20	GOSPEL MUSIC		
5:00	SIGNS OF THE TIMES (RTA)		

Julius Moab soim stail bilong tok pisin

Cynthia Igua i raitim

SAPOS yu save laik lukim CHM Supersound Video Hits we i save kamap long EMTV long olgeta Fonde nait, yu klia long dispela i autim tru stail long tok pisin bilong ol adang.

Nem bilong dispela nan em Julius Moab. Singsing bilong em 'Zero Balance' em plan-ti manmeri i save laikim nau bilong wanem ol toktok insait long singsing yet i pani tru na i tok pilai long pasin bilong baim meri. Long strong bilong tok pisin bilong em tasol na planti manmeri i wok long indai kirap long singsing bilong em.

Julius i no nupela man long musik. Em i bin go pas long biknem ben bilong Madang long bipo, Side Doors. Ol i bin mekim nem namel long 1990s, na ol i bin soim tru kala bilong ol long PNG Made Trade Fair long Lae long 2000 taim ol i pairapim ol bikpela singsing bilong ol olsem 'Malio Wel Wel', 'Milo Kantri' na 'Angoram Boys'.

Ol manki Side Doors i bin bung long 1998. Olgeta manki i nogat wok tasol olgeta yet i bin gat bikpela laik long pilai musik.

Inap long 15 yia, ol bois i bin pilai musik

long kain kain hap we ol i gat sans long pilai. Long pinis bilong 2002, ol i pinisim namba wan musik albam bilong ol 'Fax Masin', na namba tu albam bilong ol, 'Soka Bal'.

Tupela albam bilong ol i bin pulaim laik bilong planti manmeri. Long dispela taim Julius i bin stap wantaim Side Doors, em i bin kisim bikpela eksperiens na save long wok musik. Long dispela save bilong em tasol na em i bin tingting long kamap wanpela solo rekoding atis. Em yet i bin bilip olsem em i mas mekim moa long opim stail bilong-musik bilong em. Olsem na em i kamapim solo albam bilong em na i opim rot bilong em long musik indastri.

Julius em bilong Suiwit viles long Raikos eria, em i gat 30 kris-mas na em i rilisim pinis namba wan solo albam bilong em, 'Zero Balance - Rai Coast i no BSP Bank'.

Dispela albam nau i wok long soim strong bilong en wantaim ol singsing 'Candle City', 'Sikul Sepik', na 'Zero Balance' yet.

Long dispela namba wan solo albam bilong em, Julius i kisim halivim bilong George Toivita na John Okum.

Dispela solo albam bilong em i gat planti manmeri i laikim tru.

Singsing Zero Balance i bin sindaun long namba wan ples long CHM Supersound Top 5 Video Hits klostu wan mun nau.

CHM Supersound Studios tasol i strongim dispela albam bilong Julius. Ol i katin gut tru na kwolati o strong bilong musik i krai gut tru.

Julius i bungim ol kain kain stail bilong musik long dispela albam. Em i gat ol Reggae na lokol singsing we i save pairap bihainim stret PNG stail musik.

Julius yet i givim bikpela luksave long helpim bilong Eddie Elias, wanpela biknem PNG musik atis, long namba wan na namba tu albam, Edmund Wakun, Max Okun, Bob Kawop na famili bilong en, ol poroman na ol lain man, meri na pikini ni husat i save laikim musik bilong em. "Yupela i save, Raikos i no BSP Bank - Zero balance," Julius em tok.

Bikpela tok tenkyu i go long Raymond Chin na Big T long sepot bilong ol na tu tenkyu i go long ol wok manmeri bilong Video Producers Kru bilong CHM long helpim em wantaim ol vidio klip.

"Tokim papa save kad bilong mi ya, nogat save blong em"

"Ol lain bilong yu kam kros long mi olsem jemen seped bilong ol Gad dok"

- Ol dispela kain tok pisin i soim tru tru kala na stail bilong tok pisin i pulap i stap insait long singsing bilong Julius Moab, 'Zero Balance'.

SEKIM TV LONG
DISPELA WIK

8:30PM - FRAIDE NAIT -
SURVIVOR VANUATU -
ISLANDS OF FIRE



Lopevi, grup bilong ol man long Survivor resis.



Yasur, grup bilong ol meri.

9:30PM - FRAIDE NAIT -
MEMORABLE MOMENTS

DISPELA em i wanpela spesol bai i kamap long EMTV we ol bai soim olgeta samting we i bin kamap insait long kantri na mipela i bin lukim long EMTV.

Olgeta bikpela samting i kamap insait long kantri, nius na spot na taim ol dokta i bin brukim tupela yangpela bebi twins Eustina na Eustocia.

Bai yu ken lukim long tripela ten minit i lusim 9 kilok long Fraide nait bihain long Survivor.

11:30PM - FRAIDE NAIT -
JAG

Ol dispela loya bilong US army, ol i save kolim ol yet Judge Advocate General (JAG) i kamap gen long EMTV. Bai yu inap lukim long tripela ten minit i lusim 11 kilok long Fraide nait.



Trinde Nait Muvi - DETROIT
ROCK CITY - 8:30pm

Ol turangu poroman ya i laik go lukim namba wan musik ben bilong ol i pilai tasol ol i painim hat tru.

DISPELA muvi em long 4-pela yangpela poroman. Ol i stap long hai skul na ol i save indai kirap long wanpela rok musik ben ol i kolim KISS. Dispela ol musik man ol i save pilai hevi metol na ol i save penim pes bilong ol wantaim ol kain kain pen bilong pes. Dispela 4-pela bai winim ol fri tiket long wanpela resis long radio long go lukim KISS i pilai, tasol ol i stap long narapela taun olgeta. Ol bai go painim kain kain birua long go lukim namba wan musik ben bilong ol i pilai.



Manki Miok i yusim musik long stori



BAI yu no inap long harim tumas stori bilong arapela man husat i bi-hainim driman bilong em long kamapim wanpela bikipela samting olsem stori bilong ol hevi wanpela manki Miok bilong Wapenamanda long Enga provins i painim na daunim.

Taim em i stap yet long komyuniti skul, em i save laikim tru tupela biknem musik man bilong PNG, Basil 'Blitz' Greg na Robert Oeka, em i laik kamap olsem ol stret taim em i bikipela. Em i save sindaun na harim musik bilong ol olgeta taim na em i no save les long harim.

Dispela man em i Nelson Taim, wanpela sumatin long Pot Mosbi Teknikel Koles. Em bilong liklik ples Alos long as bilong Maunten Sambakamanda long Wapenamanda long Enga provins.

Nelson i rilisim namba wan musik albam bilong em aninit long CHM Supersound Studios. Nem bilong albam bilong em 'Nuxz Melo', wanpela nem em i tok i makim olgeta hevi em i bungim taim em i liklik manki na em i save driman long kamap wanpela musik atis.

"Nau mi kamap musik man na driman bilong mi i karim kaikai, tasol em i no kamap isi tasol. Mi wok hat na mi strongim tingting bilong mi long raitim na rekodim musik," Nelson i tok.

Em i bin save long Basil na Robert taim wanpela poro bilong em long Alos ples i bin baim tupela kaset long Maunten Hagen long 1980s yet na Nelson i skelim olsem dispela tupela kaset tasol i bin pulim ol arapela hap bilong kantri i go klostu long em.

Nelson i stori, "Mi bin laikim tru! Mi inap long harim singsing bilong Basil, 'Lonely Makuri' na 'Honiara' na singsing bilong Robert 'Askere Kofa' olgeta de. Sampela taim mi bai eking olsem mi Basil o Robert na bai mi kisim ol hap diwai na makim olsem mi pilai gita na bai mi singim olgeta singsing bilong ol. Mi bin save long olgeta hap tok tok long singsing bilong

ol."

Taim em i bin bikipela liklik long 1998 na em i stap long Gred 7 long St Paul Luteran Hai Skul, Paus, Nelson i stat long raitim musik bilong em na kamapim ol stori long ol samting i kamap insait long Wapenamanda distrik.

"Mi makim taim namel long skul na raitim musik na mi prektis na kisim ol tok stia bilong ol arapela manmeri. Mi bilip olsem mi inap kamap olsem Basil na Robert," Nelson i tok.

Em i tok em i laik kamapim musik na raitim musik bilong em taim em i yangpela yet nogut em i no inap long pinisim skul.

Namba wan albam bilong em Nuxz Melo i gat 10-pela singsing long tok pisin, tok ples Enga, Gogodala na Goroka. Na wan wan singsing em i raitim long ol samting em i lukim taim em i stap long ples.

Plantu long ol singsing Nelson yet i raitim, tasol em i gat wanpela gutpela poroman bilong em, Win Yopson husat i gat 19 kismas. Yopson i bin lusim skul long raitim musik bilong Nuxz Melo.

Nuxz yet i mekim progreming long olgeta musik na i kisim helpim bilong Lister Laka na John Toea long pinisim albam na ol rekoding we em i bin stat mekim long 2000. Long stat bilong dispela mun tasol em i pinisim.

Wanpela singsing we i stap klostu long lewa bilong Nelson em long wanpela kumkatim meri poro bilong taim em i stap long komyuniti skul, nem bilong em Melinda. Em na Nuxz i bikipela wantaim na go skul wantaim long Wapenamanda. Bihain long ol i pinisim komyuniti skul na gred 7 na 8, nu-pela wantaim i bin kamap stap long Pot Mosbi. Nuxz i bin go skul long Gerehu Hai Skul na Melinda i go mekim gred 11 long Marianville Hai Skul bilong ol meri.

Taim Nelson i go long Pot Mosbi Nesenel Hai Skul, em i kisim wanpela pas long Melinda, em nau namba wan lav leta na inap nau, wanpela tasol Nelson i kisim long laip bilong em.

"Tete yet mi holim dis-



• Ol mangi Mioks long Wantok opis

pela pas i stap. Em i olsem got long mi bilong wanem i gat sampela naispela tok tok i kam long maus bilong wanpela meri i stap insait long en," Nuxz i tok.

Insait long dispela pas, Melinda i raitim, "Yu ken i stap long we long mi, na mi ken i stap long we long yu. Maski maunten, veli na ol wara i pasim rot bilong mi tupela, tasol singaut bilong ol pisin (miok) bai pulim mi tupela i kam stap wantaim".

"Wanpela de mi save long lewa bilong mi olsem mi na Melinda bai stap wantaim, tasol nau yet mi laik pinisim Ilektrikel Setifiket long Pot Mosbi Teknikel Koles na lusim Belinda i pinisim skul bilong em tu," Nuxz i tok.

Nuxz i tok wanpela rot tasol we em inap long tok tok long Melinda em long ol tok tok long musik bilong em we em i ken tokaut long bikipela laik bilong em long en.

Namba wan singsing long albam bilong Nelson em 'Miok', nem bilong wanpela pisin bilong Enga we i pisin bilong Miok klen o pisin na i save strongim tok promis bilong Nuxz Melo long ol pipel bilong em long helpim ol long bihain taim. Dispela singsing i strongim pisin bilong em long graun long Alos ples. Namba tu singsing em 'Milikin Teyam', stori bilong wanpela bikipela pait long ples bilong em namel long ol Miok na ol lain bilong narapela sait bilong Maunten Sambakamanda. Bihain long pait, ol lain long Maunten Hagen sait bilong Maunten Sambakamanda na ol Miok i stopim pait bai ol inap long stretim ol lain wantok bilong ol i indai o kisim bagarap.

Tasol ol i giamanim ol Miok na ol i go long hap sait bilong maunten na kil-

im dai ol lapun manmeri na pikinini i stap long Wapenamanda. Ol i bagarapim gaden, kilim ol abus na katim diwai taim olgeta yangpela man bilong Miok i stap long hap sait maunten na stretim ol wantok bilong ol i stap. Dispela stori long samting we i bin kamap i stap long singsing 'Miok'.

Sambakamanda albam bilong Nuxz Melo i bin kamaut 6-pela wik i go pinis.

Na Nuxz i tok olsem em bai amamasim dispela albam wantaim ol pipel bilong Enga yet long as ples bilong em long Wabag.

"Mi wetim taim mi malolo long skul long kismas na mi go bek long Wapenamanda. Mi bai lonsim gut albam bilong mi long hap. Sapos mi inap long kisim helpim long Mista lpatas, em bai moabeta. Mi bai lukluk long kisim helpim bilong ol arapela memba bilong palamen,

ol lida na ol bisnis long Wabag long lonsim long hap. Bihain bai mi pilai raun long ol hailans taun na ples long amamas wantaim ol lain bilong ples long Kismas na Niu Yia," Nuxz i tok.

Em i mekim samting stret!

Sapos yu laik helpim Nuxz long lonsim gut albam bilong em long Wabag long Kismas, yu ken putim liklik helpim mani bilong yu i go long BSP Waigani Brens Namba 8968, Account Namba 1000 124124, aninit long nem NELSON E. K. TAIM.

Sapos yu laik salim pas i go long Nelson, yu ken salim pas bilong yu i go long P. O. Box 655, Port Moresby.

Yu ken ritim stori bilong ol musik manmeri olgeta wik insait long POST COURIER long What's on Raitman

NATIONAL WEEKLY HIT PARADE

YUMI FM NATIONAL WEEKLY HITPARADE

Sarere Oktober 2, 2004

Twisties i sponsa			
Singsing	Musik Atis	Las Wik	Dispela Wik
Last In Line	Edwin Baffe	2	1
Jombie KunexNew	Painim Wok	1	2
20 Toea	West Kadah	5	3
Sigi Mangi	Grumo Masalai	4	4
Ranawel I Kam	Slim Buda	5	5
Sharon	Uralom ft Rokas	6	6
Modern Wali	Luke Banag	7	7
Naika	Hausboi	8	8
Kiri	Hausboi	9	9
Maunten Lewa Mori	Julius Maob	10	10 (4)
Zero Balance	Julius Maob	11	11 (3)
Kisim Bus	Luke Banag	12	12
Nellien	Uralom ft Moses	13	13
Daon Anda	West Kadah	14	14 (3)
Can I Be The One	O-shen	15	15 (3)
Luv Bait	K-Mala	19	16
Hard Life	X-Anats	20	17
Ravaku	Jnr Iroakele	0	18
Lewa	Phi Jay	0	19
704 (aloklok NCR)	Jnr Insects	17	20

In	Ravaku	Jnr	Iroakele
Out	Tobes	Westall ft Patti Doi	

EMTV GAID

Fonde
30/09/04

1.00AM KING OF QUEENS
00.00AM CLOSE

Mande
4/10/04

5.30 JOYCE MEYER MINISTRY	5.59 STATION OPEN
6.00 TODAY SHOW	5.30 JOYCE MEYER MINISTRY
9.00 CREFFLO DOLLAR	6.00 TODAY SHOW
9.30 DR PHIL	9.00 CREFFLO DOLLAR
10.20 PNG MARATHON	9.30 DR PHIL
1.30 SP SPORT AWARD	10.00 WORLD OF WILDLIFE
3.00 2004 GAME FISHING	10.20 GRADE 7 SCIENCE
4.00 HOT SOURCE	11.10 GRADE 7 SOCIAL SCIENCE
4.30 Y	12.00 GRADE 11 MATHS
4.57 EMTV TOKSAVE	12.50 GRADE 11 PHYSICS
5.00 THE PRICE IS RIGHT	1.30 GRADE 11 GEOGRAPHY
\$100,000 SUPER SHOWCASE	2.30 THE WIGGLES
6.00 NATIONAL EMTV NEWS	3.00 BANANAS IN PYJAMAS
6.30 A CURRENT AFFAIR	3.30 COURAGE THE COWARDLY DOG
6.57 TOK PISIN NEWS UPDATE	4.00 HOT SOURCE
6.59 LOTTO DRAW	4.30 Y
7.00 CHM SUPERSOUND	5.00 THE PRICE IS RIGHT
7.57 EMTV TOKSAVE	\$500,000 SUPER SHOWCASE
8.00 SPORT SCENE	6.00 NATIONAL EMTV NEWS
9.30 THE FOOTY SHOW	6.30 A CURRENT AFFAIR
11.00 AFL FOOTY SHOW	6.58 TOK PISIN NEWS UPDATE
1.00 EMTV NEWS REPLAY	6.59 LOTTO DRAW
1.30 NIGHTLINE	7.00 PRAISE
2.00 STATION CLOSE	8.00 INSAIT PNG
5.29 STATION OPEN	8.30 Who wants to be a millionaire

Fraide
1/10/04

5.30 JOYCE MEYER MINISTRY	5.29 STATION OPEN
6.00 TODAY SHOW	5.30 JOYCE MEYER MINISTRY
9.00 CREFFLO DOLLAR	6.00 TODAY SHOW
9.30 DR PHIL	9.00 CREFFLO DOLLAR
10.30 FRIDAY'S PRIME TIME LINE UP	9.30 DR PHIL
2.30 THE WIGGLES	10.20 GRADE 7 SCIENCE
3.00 BANANAS IN PYJAMAS	11.10 GRADE 7 SOCIAL SCIENCE
3.30 JUSTICE LEAGUE	12.00 GRADE 11 MATHS
4.00 HOT SOURCE	12.50 GRADE 11 PHYSICS
4.30 Y	1.30 GRADE 11 GEOGRAPHY
4.57 EMTV TOKSAVE	2.30 THE WIGGLES
5.00 THE PRICE IS RIGHT	3.00 BANANAS IN PYJAMAS
\$100,000 SUPER SHOWCASE	3.30 COURAGE THE COWARDLY DOG
6.00 NATIONAL EMTV NEWS	4.00 HOT SOURCE
6.30 A CURRENT AFFAIR	4.30 Y
6.58 NEWS UPDATE	4.57 EMTV TOKSAVE
6.59 LOTTO DRAW	5.00 THE PRICE IS RIGHT
7.00 TOK PIKSA	\$500,000 SUPER SHOWCASE
7.30 BURKE'S BACKYARD	6.00 NATIONAL EMTV NEWS
8.30 SURVIVOR: VANUATU	6.30 A CURRENT AFFAIR
9.30 PREMIERE SPECIAL EVENT: MEMORABLE MOMENTS	6.57 TOK PISIN NEWS UPDATE
11.30 EMTV NEWS REPLAY	6.59 LOTTO DRAW
11.30 JAG	7.00 HAUS & HOME
12.00 NIGHTLINE	8.00 BACKYARD BLITZ
00.30 STATION CLOSE	8.27 EMTV TOKSAVE

Sarere
2/10/04

8.00 PLANET FANTA	10.30 ER
10.00 SO FRESH	11.30 EMTV NEWS REPLAY
11.30 ARRIVE ALIVE CUP	12.00 NIGHTLINE
12.30 PROCARS	12.30 CLOSE

1.30 CAR SHOW	6.29 STATION OPEN
2.00 AFL PRELIMINARY FINAL#1	5.30 JOYCE MEYER MINISTRY
5.30 FISHING AUSTRALIA	6.00 TODAY SHOW
6.00 NATIONAL EMTV NEWS	9.00 CREFFLO DOLLAR
6.30 AUSTRALIA FUNNIEST VIDEO	9.30 DR PHIL
7.30 SPY TV	10.20 GRADE 7 SCIENCE
8.00 SOUTH PACIFIC MUSIC	11.10 GRADE 7 SOCIAL SCIENCE
9.00 XENA: WARRIOR PRINCES	12.00 GRADE 11 MATHS
10.00 HECULES	12.50 GRADE 11 PHYSICS
11.00 EMTV NEWS REPLAY	1.30 GRADE 11 GEOGRAPHY
00.00AM KING OF QUEENS	2.30 THE WIGGLES
00.30 CLOSE	3.00 BANANAS IN PYJAMAS

Sande
3/10/04

6.26AM STATION OPEN	4.00 HOT SOURCE
6.27 EMTV TOKSAVE	4.30 Y
6.30 THE TEACHING MINISTRY	4.57 EMTV TOKSAVE
7.00 IT IS WRITTEN	5.00 THE PRICE IS RIGHT
7.30 BUSINESS SUCCESS	\$500,000 SUPER SHOWCASE
8.00 BUSINESS SUNDAY	6.00 NATIONAL EMTV NEWS
9.00 SUNDAY	6.30 A CURRENT AFFAIR
11.00 AMERICAN CINEMA	6.58 TOK PISIN NEWS UPDATE
12.00 BOOTS N ALL	6.59 LOTTO DRAW
1.30 SUNDAY FOOTY SHOW	7.00 ANIMAL HOSPITAL
2.00 JERSEY FLAG GRAND FINAL	7.30 MCLEOD'S DAUGHTERS
4.00 PREMIERE LEAGUE FINAL	8.27 EMTV TOKSAVE
5.30 GRAND FINAL PREVIEW	8.30 WEDNESDAY NIGHT MOVIE: DETROIT ROCK CITY
6.00 EMTV NEWS	10.30 SOUTH PACIFIC MUSIC
6.30 GRAND FINAL ENTERTAINMENT	11.30 EMTV NEWS REPLAY
7.00 PREMIERESHIP GRAND FINAL	12.00 NIGHTLINE
9.00 DISCOVERED	12.30 STATION CLOSE
9.57 EMTV TOKSAVE	
10.30 PRAISE	



• (lephan) Sir John Kaputin i toktok wantaim Praim Minista Sir Michael Somare bihain long PNG wantaim Pasifik kantri i makim em olsem kendidet bilong ACP jenerel seketeri. Em Afrika, Karabien Pasifik we em kantri bilong ol bilak skin.



• Praim Minista Sir Michael Somare i kisim wampela presen long ol lain bilong Tonga taim em i go long miting long hap long las mun. Dispela presen i makim amamas bilong ol Samoa taim ol i bin skul long hia na winim skul long yunivesiti na go bek wok long kantri bilong ol. Dispela i olsem tenkyu long PNG.



• Ol kas bilong Angoram i mekim save long soim musik bilong tumbuna wanaimambu. Dispela taim ol i kamapim mambu na garamut so long Wewak long dispela mun long wampela festival bilong ol. *Poto Big Joe*



• Pes bilong ol Apo ya, bikipela so bilong ol lain long Goroka long Septemba 16 i kamap wantaim PNG independens de. Ol manmeri i amamas na singsing na soim bilas na ol kain pasin tumbuna bilong ol long dispela taim.



• Em yangpela bilong sios olsem long SDA na ol NGO i bin bung long kirapim ol toktok long bikipela hevi bilong sik AIDS insait long kantri. Dispela bung ibin kamap long Lae siti we ol yut i sanap strong long skulim ol arapela long abrusim dispela sik nogut.



• Ol dispela lain manmeri i bin sindaun long wampela woksop bilong lainim na save long wok bilong lukautim na mekim bisnis long dispela bikipela bisnis ol i kolim turis bisnis. Dispela woksop em ol lain bilong TPA wantaim DWU i ranim long banis bilong skul long Madang.

Toya Daniel gutpela man bilong wok didiman

Paul Zuvani i raitim

EM i man bilong wok pawa (ilektrisiti man) tasol em i tanim graun na kamap gutpela fama. Dispela man em Toya Daniel.

Askim long baim sipsip, meme, kabis na ol narapela saior long Pilimna, Dikne lokel level gavman (LLG), Gumine, o long Kundiawa sapos yu laik ol man i no inap long lus tingting long kolim Dom Yuri Didiman Fam.

Em fam Daniel i save lukautim o groim ol samting yumi kolim pinis wantaim sampela moa ol samting olsem brokoli, koliflawa, galik, stroberi, potato, wit na gini pik.

Dom Yuri Sip Fam i stap long Pilimna (LLG) Kaunsil eria long Gumine Distrik, Simbu provins.

Stori bilong Daniel long taim em i statim Dom Yuri Didiman o Sipsip Fam i stat olsem.

Inap long 1986 Daniel i wok wantaim Papua Niugini Ilekrisiti Komisnin (ELCOM) 10-pela yia bihain long em i stat wok long 1976.

Namel bilong 1986 em i pilim olsem stap bilong em wantaim ELCOM em inap pinis

em i laik mekim narapela samting.

Em i laik bihainim dispela tingting em i gat taim em i liklik manki yet, wok didiman. Na bipo long em i go moa yet em i pinis long ELCOM we em i baim wanpela meri sipsip na wanpela meri meme.

Long dispela taim em i tingting olsem, 'Sapos mi inap long lukautim tupela i go bikpela na tupela i karim ol pikinini mi bilip laik bilong mi long kamap fama bai kamap gut.'

Wantaim dispela tingting em i lukautim gut dispela tupela pikinini meri sipsip na meme na tupela i karim ol pikinini.

Nau yet Daniel i gat 45 meme na 40 sipsip long fam bilong em.

Bikpela tingting bilong em long statim fam em long lukim olsem olgeta famili long Dikne LLG Kaunsil hap na sapos nogat olgeta famili long Gumine i mas wok didiman long sapatim ol yet.

Ol i no ken go painim o baim samting long stoa o maket tasol i mas groim ol kaikai na abus ol yet na salim long ol manmeri long narapela hap long kisim mani.

"Wantaim abus, kaikai na mani ol i gat

long en ol i ken senisim sindaun bilong ol long ples," Daniel i tok taim em i soim amamas bilong em long lukim hatwok bilong em i stat long karim kaikai.

"Ol manmeri husat i laik lukautim sipsip o meme i mas kam lukim mi," em i tok.

Em i save salim ol pikinini meme long K150 na ol bikpela meme long K200.

Daniel husat i no kolim krismas bilong em tasol lukluk bilong em i long man husat i raitim dispela stori i ken tokim mi olsem em i stap long 48 o 50 krismas.

Em i marit na i gat faivpela pikinini, tupela man na tripela meri.

Em i bilip bilong em olsem taim em i lapun ol pikinini bilong em bai skruim yet dispela wok bilong em.

Tasol long taim em i toktok wantaim em pes bilong em i gat wari.

"Mi laikim minista bilong agrikalsa (Mathew Siune) na memba bilong mi (Nick Kuman- Gumine MP) long helpim mi," Toya i tok.

"Mi traim long helpim komyuniti long kamapim gutpela sindaun tasol mi go long mak em mi inap long go long en. Tasol long



• Daniel em i hap man bilong mekim wok faming.

go moa yet mi i no inap. Olsem na mi askim lokel memba bilong mi na minista bilong agrikalsa long helpim mi long sampela mani bai olsem mi i ken skruim gut dispela tingting bilong kamapim wok didiman long komyuniti.

Namba bilong salim kopi i go antap

NAMBA bilong salim kopi i go antap long 19.3 pesen long makim wantaim mak bilong salim long 2003.

Long wankain taim long las yia Papua Niugini i salim 14,500 ton na long 2004 em i salim 17,300 ton.

Dispela pesen em Gavana bilong Sentral Beng, Wilson Kamit, i tokaut long taim em i tokaut long gutpela maket em PNG i mekim long salim ol samting bilong em i go long narapela kantri.

Tasol em i tok stat long Jenuari i kam inap long Mas 2004 PNG i mekim gutpela maket long salim 8,200 ton na dispela em i gutpela mak tru.

Long Ikonmik Ripot bilong em long 2004 Jun kota Sentral Beng i tok namel prais mak bilong em long salim kopi i sanap olsem long K4,272 wanpela ton. Tasol dispela em siks pesent daunbilo long namba em i mekim long wankain taim long las yia.

Ripot i tok dispela pundaun bilong maket i kamap long asua long amamas US Dola i pait wantaim Kina.

Las em bikos i gat hevi long Brazil na olsem PNG i mas salim planti kopi tasol Brazil i kisim gutpela taim liklik na olsem ol kantri i no baim tumas kopi long PNG. Brazil i bikpela kantri bilong kamapim kopi.

Tasol long makim mak bilong maket long kopi long las yia na dispela yia maket bilong dispela yia stat long Jenuari na i kam inap long Jun i gutpela moa bilong las yia. Namel long dispela taim PNG i kamapim olsem K73.9 milion.

Tasol long namba bilong salim ol arapela didiman samting olsem kakao, kopra na oil pam dispela i go daun long mak bilong 2003.

Namba bilong salim kakao i go daun long 19.9 pesen, ti 6.3 pesen na raba 3.2 pesen.

NARI bai kamapim aweanes long we bilong stap long bikpela taim drai



• Sapos taim drai i kam, dispela ol manmeri bai i painim hat long groim ol dispela kain kaikai.

NESENE Agrikalsa Rises Institut (NARI) bai mekim ol wokabaut i go long ol provins long san i kamapim ol bagarap.

Dispela kempen em bai mekim wantaim Nesenel Agrikalsa Draut Komiti (NADC).

Dispela kempen i kam bihain long Nesenel Disasta na Imenjesi Sevises i tokaut long lukaut bilong taim bilong san o bikpela taim drai. Wantaim bikpela san ol kaikai na wara bilong dring bai i sot. Nau yet i gat save olsem planti ol provins i wok long bungim hevi bilong san.

Plen bilong kamapim dispela ol wokabaut i kamap long wanpela miting long Septemba 24 long NARI het kwata long Bubia, Morobe provins. Ol bai tokaut long dispela plen liklik taim.

"Em i bikpela samting yumi mas redim ol pipel bilong yumi long we bilong lukautim yumi yet long taim bilong san. Yumi i no ken wetim taim hevi i kamap," opis i tok.

"Sapos yumi wet bai bikpela bagarap bai kamap.

Bihainim bikpela bagarap bilong Ei

Nino long 1997, NARI, wantaim bilong Wol Benk i kamapim sampela kain wei long lukautim yumi yet long taim bilong san.

Dispela ol wei em long bihainim long taim bilong san na narapela em long lukautim ol pasin bilong wok didiman o long gaden long taim bilong san.

Sampela ol piksa toktok em: MALSING (putim drai lip na gras antap long graun we ol kaikai i stap o raunim long as bilong ol kaikai olsem banana, pitpit, popo na sam; LUKAUT long taim bilong rausim ol kaikai olsem yam, kaukau, mami, kasava long taim bilong san na; PLANIM hariap ol swit potato long bipo na long taim bilong san.

Dokta Ghodake i tok taim bilong san i bikpela birua bilong ol pipel bilong mipela.

"Mipela i mas amamas long lainim na save ol we bilong redi na bungim ol hevi.

"Toksava long we bilong stap long san i wok bilong yumi olgeta."


Long save moa long dispela toksava ringim Dokta Sergie Bang long

Bafolo Bill bilong Goroka

• Yangpela Bafolo Bill bilong Goroka, Isten Hailans provins, i kisim gupela pilings long sindaun antap long dispela bafolo we Dipatmen bilong Agrikalsa na Laipstok i save lukautim long Goroka.


Poto: SAPE METTA







Netbal eksen long wiken



PORT MORESBY SOCCER ASSOCIATION

WEEKEND DRAWS - SEMI FINAL

Saturday 2nd October, 2004

Bisini One

Time	Division	fixtures
08:00	Y2	Sunset vs Jaha
10:00	D3	Tawala vs Maset
12:00	D2	UBOG vs Cellnet
14:00	W1	PNG Gardener vs LBC
Defence		
16:00	P/Reserve	ANZ University vs Mirel Momase

Bisini Two

08:00	Y1	Cosmos vs Mirel Momase
10:00	D1	Bavaroko vs Sunset
12:00	WP	Telikom vs WMI
14:00	WP	Lamana GFN vs ANZ University
16:00	Premier	Cosmos vs ANZ University

Sunday 3rd October, 2004

Bisini One

08:00	Y2	Guria vs Orogen
10:00	D3	Korion vs Tarangau
12:00	D2	Badili United vs Telikom
14:00	W1	Sunset vs Murat

Bisini Two

08:00	Y1	PS Rutz vs LBC Defence
10:00	P/Reserve	Kurti Andra vs PS Rutz
12:00	D1	Souths United vs Guria
14:00	Premier	PS Rutz vs Rapatona





Roosters na Bulldogs gren fainel

WANPELA fil gol i kam long hap bek bilong Sydney Roosters, Brett Finch, na wanpela penelti gol i kam long Craig Fitzgibbon i pinisim strongpela ron bilong ol North Queensland Cowboys las wiken.

Roosters i daunim Cowboys 19-16 long stap insait long gren fainel 2004 egensim Canterbury Bulldogs.

Dispela bai namba tri gren fainel bilong Roosters nau. Tasol Cowboys i bin pilai strong na klostu ol i win.

Cowboys huka Aaron Payne i bin kilim namba wan fil gol bilong Finch long namba 73 minit. Tasol Finch i bin traim wanpela gen taim i gat 5-pela minit tasol long kilok na Roosters i makim namba 9 taim ol i daunim Cowboys.

"Mipela i ken amamas long pilai bilong mipela long dispela yia.

"Mipela bai redi long neks yia. Mi bilip olsem Roosters inap long winim gren fainel," Cowboys ful bek Matt Bowen i tok.

Pilai namel long Roosters na Cowboys i bin paia lait tu bihain long 2-pela minit taim pait i bruk.

Refri Paul Simpkins i bin givim tok lukaut long Jason Cayless, Luke Ricketson na Justin Hodges bihain long tas jas i givim ripot bilong em.

Kepten bilong Roosters, Brad Fittler i bin tok olsem hap bek bilong Cowboys, Nathan Fien i bin paitim em. Bihain long en Ricketson i paitim Fien.

Taim Roosters senta Ryan Cross i skoa bihain long Cayless i brukim difens long namba 11 minit, planti manmeri i ting ol

Roosters bai kilim dai lam bilong ol Cowboys.

Tasol nogat. 8-pela minit bihain tasol na Cowboys senta Paul Bowman i winim Shannon Hegarty long kisim wanpela bom na skorim trai.

Josh Hannay i kikim konvesen na skoa i sindaun long 6-6.

Fitzgibbon i kikim tupela penelti gol long tas 10 minit bilong fes hap na ol Roosters i lid 10-6 long hap taim.

Faivet bilong Cowboys David Myles i givim wanpela arapela penelti long Roosters bihain long em i suvim Anthony Minichiello taim em i laik traim kisim bal.

Fowet Luke O'Donnell i kisim taim bihain long em i tromoi han long Michael Crocker bilong Roosters. Crocker i bin kisim bikipela taim tru.

Cowboys kepten Travis Norton i bin lusim fil leit tru taim em i kisim bagarap long lek bilong em. Tasol pastaim em i paitim bal i kam bek insait long fil na winga Ty Williams i kisim na skoa. Skoa i bin sanap 10-10.

Tasol Roosters i bin kisim bek lid bihain long Bowen i bin dropim wanpela bom kik. Bihain long em tasol Finch i salim wanpela sot pas i go long Fittler na em i skoa aninit long pos stret.

Williams i skorim wanpela arapela trai gen bihain long Josh Hannay i tromoi bal i kam bek long em na em i skoa.

Hannay i kikim wanpela saittain konvesen na Cowboys i bin skin kirap long pilai long gren fainel. Tupela kik bihain tasol i bin daunim sans bilong ol.



Matt Bowen bilong Cowboys i traim long holim pasim Ryan Cross bilong Roosters long dispela gem las wiken.

Tes bilong strongpela drak holim Walker



Walker.

NESENEL Ragbi Lig (NRL) na Manly Sea Eagles i bin tokaut las Fraide olsem wanpela tes bilong strongpela drak i painimaut olsem Andrew Walker i save kisim kokein o strongpela drak.

Dispela nau bai i go long han bilong NRL Draks Traibunei husat bai bung klostu taim bilong glasim dispela sas.

Walker yet i no agensim kaikai bilong dispela tes.

Polisi bilong NRL em bilong givim tupela yia mekimsave. Inap long tupela yia, pilaia husat i asua bai i no inap long pilai ragbi lig aninit long NRL.

Dispela mekimsave i stap long olgeta asua bilong kisim ol kain kain

strongpela drak o marasin.

NRL yet i ken glasim long sekim sapos ol pilaia i yusim ol strongpela marasin bilong strongim pilai bilong ol.

Sapos nogat, ol bai i no inap givim dispela mekimsave long ol pilaia.

Andrew Walker yet i toksave pinis long NRL olsem em bai lusim ragbi lig nau.

Long Fraide, bosman bilong NRL, David Gallop i tok ol i no inap long toktok long dispela samting yet.

Em i tok i no gutpela bilong nem bilong Walker na i soim klia bikipela tingting bilong NRL long daunim hevi bilong ol kainkain strongpela marasin na drak we inap long bagarapim gem.

Slater lusim Kangaroos

SPITMAN bilong Melbourne Storm, Billy Slater, i kamap namba tu man bilong lusim Kangaroo trening skwod bihain tasol long narapela biknem pilaia Trent Barrett.

Slater i lusim Kangaroo trening skwod long go bai ol dokta i katim em na stretim wanpela hevi long sangana bilong em we i wok long daunim pilai bilong em long 4-pela mun pinis.

Barrett, husat i kepten bilong St

George Dragons tu i bin lusim Kangaroo trenin skwod long go bai ol dokta i katim em tu long stretim hevi long sol na skru bilong lek bilong em.

Slater i bin karim dispela hevi klostu tupela yia pinis na em i skelim olsem em i mas stretim nau nogut i go bagarap olgeta taim em i go pilai makim Australia.

"Mi no amamas olsem mi bai no inap stap long Kangaroo sait, tasol mi lukluk long taim bihain, olsem na

mi mekim dispela samting," Slater i tok.

Em yet i tok olsem em i no bin ron tumas long stat bilong sisen na em i no mekim bikipela trening na i bin hat liklik long pilai strong.

Slater bai no inap long ron inap long 4-pela mun tasol em i lukluk long go bek long ful trening long mun Januari long neks yia.

"Ol dokta i tokim mi olsem sapos mi go long dispela operesen na eksesais strong, bai mi

inap long stretim dispela hevi," Slater i tok. "Mi lukluk long ron strong gen long Januari, na sapos mi inap, bai mi inap strongim bodi bilong mi bai mi inap pilai strong moa long neks yia.

"Mi skelim olsem sapos mi inap pilai gut olsem mi pilai long dispela yia wantaim dispela hevi, mi bai inap pilai strong moa long neks yia. Wanpela dri-man bilong mi em long pilai insait long wanpela grin na gol jesi, na mi bai mekim olgeta samting mi ken mekim long kamapim dispela dri-man."

Long arapela nius, Matt Sing na Matt Bowen i stap long Kangaroos trening skwod nau. Ol arapela pilaia em ol manki bilong Panthers: Joel Clinton, Craig Gower, Luke Lewis, Luke Rooney na Trent Waterhouse.

Long sait bilong New Zealand, Joe Galuvao, Tony Puletua, Paul Whaitura na Frank Pritchard i kam insait long Kiwi sait. Na Paul Rauhihi na David Faiumu bilong Cowboys i kisim luk-save tu.



Slater.



NRL Gren Fainel 2004

Sande, Oktoba 3, 2004 Telstra Stadium
7.00 pm Laiv long EMTV



ROOSTERS

Refri: Tim
Mander



BULLDOGS

Anthony Minichiello
Shannon Hegarty
Ryan Cross
Justin Hodges
Chris Walker
Brad Fittler(Kapten)
Brett Finch
Jason Cayless
Craig Wing
Adrian Morley
Michael Crocker
Craig Fitzgibbon
Luke Ricketson
Chad Robinson
Chris Flannery
Ned Catic
Anthony Tupou
Stuart Webb

Luke Patten
Hazem El Mazri
Ben Harris
Willie Tonga
Matthew Utai
Braith Anasta
Brent Sherwin
Mark O'Meley
Adam Perry
Steve Price (Kepten)
Willie Mason
Andrew Ryan
Tony Grimaldi
Reni Maitua
Corey Hughes
Roy Asotasi
Sonny Bill Williams
Johnathan Thurston
Jamie Feeney

Mander bai refri long Gren Fainel

SINIA NRL refri Tim Mander bai lukautim Gren Fainel 2004 namel long Sydney Roosters na Canterbury Bulldogs.

Mander, husat i gat 43 krismas, i kontrolim 261 fes gred gem, 13 fainel gem, siksela tes na 4-pela Wol Kap.

Kosa bilong ol Refri, Robert Finch i tok makim bilong Mander i soim luksave bilong ol long ol yia Mander i bin wok olsem refri.

Ol tas jas bilong gem bai Steve Chiddy na Matt Cecchin. Graeme West na Chris Ward bai ol vidio refri.

Sten bai refri em Paul Simpkins.

"Tim i wok hat na nau em i kisim luksave long strongpela wok bilong em," Finch i tok. "Wok bilong refri long Telstra

primiasip em i bikpela samting tru. Na olgeta refri long dispela yia i wok long resis long kamap namba wan na mi amamas long wok bilong olgeta yet."

Mander i tok em i wok long lukluk long salens bilong namba wan Telstra primiasip gren fainel bilong em.

"Em i wanpela samting olgeta refri i save resis long en long wok bilong ol. Mi refri samting olsem 28 yia pinis na mi amamas nogut tru olsem mi kisim luksave bilong refri long gren fainel.

"Mi lukim olsem bikpela wok we mi yet mi mas mekim gut. Mi lukim tu olsem kaikai bilong olgeta hat wok na sapot we famili bilong mi i givim mi i kam inap long dispela taim," em i tok.



• Stuart no wanbel

Stuart no wanbel long mekimsave bilong Ricketson

KOSA bilong Sydney Roosters, Ricky Stuart i no wanbel wantaim mekimsave NRL i givim long Luke Ricketson bihain long em i tromoi han na paitim Nathan Fien bilong North Queensland Cowboys las wiken.

NRL i wet tasol long givim 3-pela wik saspensen long Ricketson bilong wanem ol i lukim dispela pasin em i mekim inap long gred 3 sas stret.

Sapos NRL i givim em 3-pela wik saspensen, Ricketson bai no inap pilai long gren fainel long Sande.

Stuart i tok olsem em i no ting dispela samting Ricketson i mekim inap long gred 3.

Em i tok wankain samting i bin kamap las

wik taim Willie Mason bilong Bulldogs i bin tromoi han long wanpela arapela man long het na nogat samting i kamap.

"Em (Ricketson) i wanpela intanesenel pilai, em i pilai State Of Origin, na em i pilai long gren fainel pinis," Sydney kepten Brad Fittler i tok.

"Em i save pilai maski em i kisim bagarap. Em wanpela strongpela man. Wanpela kain man yu bai laik go long woa wantaim."

Stuart i tok em i no amamas bilong wanem em i save long bel bilong ol manki na ol i laik winim gren fainel. Sapos Ricketson i no stap, ol bai i no inap strong olsem ol i strong na daunim Cowboys las wiken.

Aussie Ruls developmen progreem helpim gut ol manki

Andrew Molen i lukluk long progrem bilong AFL PNG Limited we i wok long kamap bikipela long kantri. Sapos olgeta spot grup i gat sampela kain progrem dispela bai helpim gut ol manki na stap bilong ol long komyuniti.

PLANTI ol progrem bilong Australia Futbol Lig Papua Niugini (AFL PNG) Limited i helpim ol manki long kantri. Na dispela i kamap bihainim tingting bilong AFL PNG Limited long lukim olgeta Papua Niugini i pilai Aussie Ruls.

AFL PNG Limited em i wanpela divisen o han bilong PNG Ruls Futbol Kaunsil na em i bin stat long 2001.

AFL PNG Limited i gat bod bilong em yet na ol memba bilong bod em siaman Scott Reid, Peter Lynam, Garry Bruest, Henry Kila, Anthony Smare, Justin Karcher na Mel Togolo.

AFL PNG Limited i save wok wantaim ol manki krismas bilong ol i stap long 12-18. PNG Ruls Kaunsil i save wok wantaim ol pilaia husat krismas bilong ol i stat long 18 na i go antap.

Aussie Ruls i no olsem ragbi na soka we ol i save pilai olgeta hap long kantri. Wanwan ples tasol olsem Pot Mosbi, Goroka, Kimbe na Lae em dispela spot i kamap strong tasol nau em i wok long surik i go na i no long taim bai planti manmeri long olgeta hap long kantri bai i gat save long pilai.

Long lukim gutpela wok bilong em AFL PNG Limited opis i amamas na tokaut olsem wok bilong ol i no long painimaut na developim ol manki husat i gat save bilong pilai Aussie Ruls tasol long wankain taim i laik helpim ol manki we bai ol i kamap gutpela ol sitisen bilong kantri.

Laipstail bilong ol manki husat i pilai na stap aninit long lukaut bilong AFL PNG Limited em: Noken dring bia, noken smuk, noken kisim drag na buai i wanpela bilong ol. Ol i mas harim tok na go long skul na i mas harim tok bilong papamama na tisa long mekim wok, i mas go long lotu, i mas helpim long ol komyuniti wok na i mas bihainim ol progrem bilong AFL PNG Limited.

Long Pot Mosbi we hetkota bilong AFL PNG i stap, AFL i gat pinis ol junia kompetisen bilong ol skul long anda-13 i go i nap long anda-18 divisen na neks yia (2005) bai i lukim ol meri tu i brukim bun long fil o oval olsem ol i save nemim fil bilong Aussie Ruls.

Sampela bikipela tonamen i kamap

pinis long dispela yia long ol junia divisen na ol sinia wantaim.

Ol junia pilaia i save resis long makim kantri long nesene junia tim, PNG Binatangs na ol bikipela bilong ol i save pait long werim jesi bilong PNG Mosquitoes.

AFL PNG i wokim bikipela wok tru long developim spot insait long kantri na hat wok bilong ol i kamap long planti ol tonamen na ol kosing klinik we i kamap.

"Tupela taim mipela i go pilai long Australia na mipela go kamap long gren fainel.

"Long namba wan taim em mipela i winim dispela fainel na seken taim, em long las yia mipela i go ken tasol mipela i lus long gren fainel long anda-14 na 16 wantaim," William Yogomin, junia progrem kodineta bilong Nesene Kapitel Distrik (NCD) i tok.

Em i tok dispela kain pilai i soim olsem stended o mak na we bilong pilai insait long kantri i go antap winim planti ol narapela kantri long wol we AFL em i wanpela spot we i wok long kamap isi isi i stap.


AFL PNG junia developmen siaman, Scott Reid, i tok wanpela as tingting bilong AFL PNG em long strongim ol manki long pilai na ol bai noken tingting long wokim ol bikhet pasin.

"Dispela ol manki husat i save kisim drak, dring bia, no save go long skul na lotu na i save bikhet tumas bai i no i nap stap long ol skwat.

"Yupela i mas stap gut na pilai gut," Reid i tokim ol manki long gren fainel bilong ol.

Las wik tupela bipo biknem pilaia bilong AFL long Australia i bin givim wanpela "supa" kosing klinik long ol manki bilong Pot Mosbi long Amini Park. Ol sumatin i bin gat sans long bungim Warwick Capper husat i bin pilai wantaim Sydney Swans na Brisbane Lions na Peter Daicos husat i bin pilai wantaim Collingwood Magpies.

Yogomin i tok em i amamas long tupela biknem man i kam long lukim na helpim ol manki long pilai bilong ol tasol em ol olpela pilaia na planti liklik



Warwick Capper i soim Winnie Ben, 15, bilong Taurama Praimeri Skul long we bilong kikim bai. Ben wantaim ol narapela yangpela bai stat pilai long kompetisen long 2005. Foto: ANDREW MOLEN

manki i no kila long ol.

"Sapos sampela o wanpela pilaia bilong nau husat i pilai i stap yet olsem Micael Voss o Mathew Lloyd em bai gutpela tru.

"Mi lukim olsem i gat bikipela laik long ol manki i pilaim dispela spot," Capper i tok.

Capper i tok olsem pilai na ol developmen progrem i orait tasol i mas i gat helpim long stretim ol fesiliti o samting bilong pilai.

"Pilai yet i orait tasol kain samting olsem stretim ples bilong pilai na putim sampela gras long fil em bai gutpela," Capper i tok.

"Yupela i mas tren strong, kaikai gutpela kaikai na tingting long wanem kain man o meri yu laik kamap bihain long dispela spot.

"Em i no isi long winim lewa bilong ol kosa na ol selekta long kisim yu long pilai long namba wan tim olsem na yu mas tren strong na soim olsem yu fitman o meri long pilai taim yu gat sans," em i tok.

Capper i tok em yet i stat pilai taim em i liklik manki yet na em i traim i go inap em i gat 16 krismas na ol i kisim em namba wan taim long pilai wantaim Sydney Swans. Bihain em i pilai wantaim Brisbane Lions.

Capper i pilai Aussie Ruls inap 15 yia olgeta. Em i wanpela bilong ol wanwan pilaia insait long AFL husat i kikim moa long 100 gol insait long wanpela yia.

"Sapos yupela pilai gut bai yupela inap pilai long ol bikipela gem, bai yupela i nap gat gutpela wok na bai yupela i kisim gutpela mani tu.

"Long spot tasol na mi save raun long planti hap long helpim ol manki olsem yupela," em i tokim ol manki.

Long wankain taim Capper i tok AFL long Australia i mas givim planti mani i kam long PNG long helpim developmen bilong spot ya long hia.

"Ol i save mekim planti mani tru insait long wanpela yia olsem na ol i mas givim han long developim AFL long hia.

Yogomin i tok: "Ol (AFL Australia) i

save helpim. Ol i save salim mani i kam long mipela tasol i no i nap long mipela i wokim olgeta samting mipela i laik mekim long en.

"Dispela mani i no save inapim olgeta provins we AFL i stap long en."

Long Kwins Bonde wiken long dispela yia, AFL PNG i holim wanpela sempionsip long Pot Mosbi we i lukim ol i makim ol junia pilaia bilong ol long pilai long wanwan tim i makim wanwan hap bilong sili na dispela i bin kamap gut tru.

Long dispela tonamen ol i makim junia Sauten Zon skwat long pilai long Nesene Junia AFL Sempiosip we bai kamap long Septemba 30 i go long Oktoba 2. Dispela ol tonamen i save soim stret planti manki i gat talent we AFL PNG bai lukluk long ol long developim ol bilong bihain taim.

"Planti bilong dispela ol manki i stap long top skwat na ol i save helpim long developim ol liklik i kam bihain long ol," kosa bilong Binatang Joe Maggio i tok.

Planti bilong AFL pilaia olsem yumi save lukim long T.V em ol longpela na traipela ol man tasol ol manki bilong yumi i save givim hat taim tru taim ol i save bungim ol.

"Mipela i save winim ol long spit na skills bilong mipela long pilai," Desmond Kaumu na Glen Tom, tupela manki husat ol i kamaut long dispela developmen progrem na ol i stap pilai long Cairns, Australia, nau i tok long wanpela bung wantaim ol nius ripota taim ol i bin kam bek las wik.

Tupela i tok olsem long sait bilong longpela bilong ol we mipela i no nap em tupela i save wokim long spit na skills bilong tupela.

"Ol gutpela pilai Kaumu na Tom na Alistair Sioni i mekim ol lain long hap laikim 5-pela moa pilaia long PNG i mas go daun," Desmond Kaumu (Snr) husat makim maus bilong Reid i tok.

Yogomin i tok ol i wok long wok hat na kain ol samting olsem i kamap long Kaumu, Tom na Sioni i soim olsem hat wok i karim kaikai.



Peter Daicos bipo Collingwood pilaia i toktok wantaim ol manki na AFL PNG Limited opisa Joe Maggio long sampela stail o wei bilong pilai gut. Planti manki i kamap long Amini Pak las Fraide na lainim samting. Foto: ANDREW MOLEN

CBL bai holim junia na sinia nesenel basketbol sempionsip



Basketbol eksen long basketbol kot long Hohola.

KAPITEL Basketbal Lig (CBL) long Pot Mosbi bai holim junia na sinia basketbol sempionsip long Oktoba 5 i go long 9.

Pilai bilong ol sinia divisen bai kamap long Oktoba 8-10.

Wari bilong ol em long redim Hohola Basketbal Kot bilong dispela ol tonamen.

Presiden bilong CBL, Sam Jose, i tok kot i gat banis i raunim nau tasol planti wok i stap yet long stret gren sten na hap bilong sindaun na tu long pulim wara i go insait long ol toilet na ples bilong waswas.

Em i tok ol i laik pinisim dispela olgeta wok bipo tasol long ol pilai i stat.

Dispela ol wok i bin stap pinis long stretim CBL tasol taim ol i makim ol long lukautim dispela tonamen na i gat yet olgeta samting i kam aninit long ai bilong mi.

Jose i tok ol bai karamapim banis long wanem ol i no laik bai ol manmeri i sanap ausait na lukluk i go insait long ol gem nogut wanpela birua o eksiden i kamap bilong wanem dispela kot i stap long sait bilong mein rot tasol.

Planti long dispela ol gem bai i kamap long Hohola yet tasol sapos ol i gat mani na PNG Nesenel Basketball Federesen (BFPNG) i tok wanem bai ol fainels na ol gem we ol i pilai long nait bai i kamap long Sir John Guise Stadium long Waigani.

CBL, Lihir, Sentral, Kavieng, Mt Hagen, Henganofi, Lae na Kerema i bin tok pinis olsem ol bai kisim wanpela tim bilong man na meri i kam tasol FILBA bai putim wanpela tim bilong ol man tasol.

Tresera bilong BFPNG, Boyet Daroya i tokaut long ol lain i afili-et wantaim ol em Is Nu Briten, Mt Hagen, CBL, Goroka, Kiunga, Lihir, Madang, Mendi, FILBA, Sentral na Lae.

Long dispela Kimbe i

tok ol i bin peim afilisen fi bilong ol tasol BFPNG i wetim tasol tok orait long beng long mani bilong i kam insait.

Dispela ol lain i afili-et tasol bai i vot long ileksen bilong ol long Oktoba 9.

Jose i tok em i save olsem em i bikipela moni long kamap long Pot Mosbi long pilai tasol em i no laik bai Goroka i no kamap long dispela tonamen.

"Sapos Pot Mosbi i inap long go pilai long ol narapela hap orait bilong wanem ol tim narapela hap i no inap kamap long Pot Mosbi long pilai," em i tok.

"Sapos ol liklik asosiesen i ken kam orait bilong wanem bai ol bikipela asosiesen olsem Goroka na ol narapela i no inap long kam.

Dispela i soim olsem ol i no redi gut na ol i yusim dispela tasol olsem giaman as long ol i no inap kam," Jose i tok.

Em i mekim dispela toktok bihain long Goroka i tok ol bai holim wanpela Hailans sempionsip.

Em i tok long wankain we Presiden bilong BFPNG, Tom Gesa, i tok wanem ol tim i pilai insait long dispela Hailans sempionsip bai kisim bikipela mekim save.

"BFPNG i no tok orait long dispela tonamen bai kamap na wanem ol lain i pilai insait long dispela tonamen bai kisim bikipela mekim save i kam long federe-sen," Gesa i tok.

Em i singaut long ol lokel asosiesen long kisim em long PH: 686 5064 long stretim dispela ol toktok.

Presiden bilong MT Hagen Iga Salilum i putim em yet long we long dispela Hailans tonamen.

"Mipela i peim nomisen fi bilong mipela na mipela i stap redi tasol long kam na pilai long Pot Mosbi," Gesa i tok.

Millenium Brothers bai bungim PRK Souths long gren fainel

Joe Ivaharia i raitim

MILLENIUM Brothers bai go insait long bungim PRK Souths long 2004 Pot Mosbi SP ragbi lig gren fainel long wiken.

Dispela i kamap bihain long ol i bin pinisim ron bilong ol sempion bilong las yia Post PNG Waliya 24-22 long kwalifaing fainel las Sande.

Dispela gem tupela i bin pilaia em tupela i no bin pinisim gut long tupela Sande i go pinis olsem na ol opisa bilong Pot Mosbi Ragbi Lig i askim tupela long pilai gen long pinisim gut.

Gem i no bin pinis gut long wanem pilai i bin stat bihain tru na olsem ol lait bilong pilai graun i no gutpela long lukluk wantaim.

Long gem yet Brothers i bin laki tru long lek bilong fulbek Nixon Nagle husat i bin kikim konvesen bilong wanpela trai bilong ol long winim dispela gem.

Tupela tim i go wantaim 22 poin bipo long konvesen kik bilong Nagle sampela 4-pela minit bipo long ful taim.

Waliya i no bin gat tupela brata Ricky na Dickson Sibiya long sait tasol ol pilaia olsem Stanley Hondina, Wesley Jeffery, Leslie Vele, Joshua Lapa, Joe Sil, Andrew "stail manki" Andiki, John Wamaro na Suckling Danege i bin stap long strongim tim.

Long hap taim ol i bin go pas long skoa bod 18-6 wantaim 4-pela trai we i bin kam long Edward Amenaya (tupela), John Poria, Suckling Danege na Wesley Jeffery we wanpela bilong ol trai Stanley Hondina i bin kikim.

Brothers i bin skorim wanpela trai long Alanga Peter we Nagle i bin kikim long kamapim 6-pela poin bilong ol.

Tasol bihain long seken hap Brothers i kam bek strong long skorim tripela trai insait long fes 15 minit long mekim skoa i

sanap long 18-18.

Ol trai i bin kam long kepten na hap bek Richard Sinamoi, huka Leonard Tarum na risev senta Godfrey Luke.

Long dispela hap gem i go strong tru we tupela tim i bin traim hat long brukim difens bilong narapela wantaim gutpela ron na kamapim ol spes long skoa tasol nogat.

Tupela tim i strongim banis bilong ol i stap we i no bin gat wanpela poin inap

long 30 minit mak we Waliya i bin kisim sans bihainim -wanpela gutpela kik long Stanley Hondina.

Bot i bin go slip insait long trai lain bilong Brothers we winga bilong Waliya Wesley Jeffery i slip antap long skorim laspela trai bilong ol.

Wantaim dispela trai Waliya i go pas gen long skoa 22-18 bipo long Brothers i bekim insait long laspela 5-pela minit long dispela stail gem tru.



Pilaia bilong Brothers i kisim taim long han bilong Post Waliya long mesa semi fainel pilai las Sande. Brothers win 24-22 na bai bungim PRK Souths long dispela Sande. Foto: JOE IVAHARIA

Sauten Jon i makim tim long PNG Ragbi Yunion Supa 4's

Andrew Molen i raitim

SAUTEN Jon i makim pinis tim bilong ol long dispela nupela PNG Ragbi Yunion Supa 4's resis we ol i lonsim las mun na bai kamap long Oktoba 2 i go long 9 long Pot Mosbi.

Kolim ol yet "Southern Traders" dispela dispela bai nupela sait olgeta.

Long wankain taim narapela tripela tim "Northern Reds", Highlanders na Islanders tu i wok long redim laspela skwat bilong ol i stap long brukim bun long dispela wan wik pilai.

Planti bilong ol pilaia long Sauten Jon i kam long Pot Mosbi Boromas skwat.

Sampela bilong dispela ol pilaia em George "Buster" Hoki bilong Lamana Yuniversiti na fowet Willie Rikis na Jonathan Kairu na tupela brata Richard na Anthony Pangkatana. Narapela gutpela pilaia em Carl Hoot.

Ol i bungim dispela skwat bihain long ragbi yunion resis long Pot Mosbi i pinis gut tupela wik i go pinis.

Seleksen i no kamap long dispela ol trael pilai namet long ol Boromas na Gaigais tasol, em i kamap tu long ol gutpela pilaia bilong ol klab insait long Pot Mosbi ragbi yunion resis tu.

Man husat i helpim Harlequins long gren fainel gem bilong ol em Jack Maraha, huka bilong em Ben Kote na skram hap em Julius Taunao. Ol i stap insait long skwat tu long gutpela pilai bilong ol long 2004 kompetisen.

Narapela man tu husat i no bin stap long ol trael gem tasol i stap nau em prop bilong Yuniversiti, Eddie Wesley.

Ol manki bilong Gaigais husat i winim

ples pas long sampela gutpela pilaia bilong Boromas long stap insait long Sauten Jon em bek rowa Ajay Sabumei, fran rowa Isidore Tiriman na spitman bilong Royals Ellison Kalimet Junia.

Kosa bilong Southern Traders Kevin Rooney i tok ol pilaia i stap long dispela 22-men skwat i no kisim ples gut yet bilong wanem ol i mas kisim medikel sek, pas long fitnes tes na abrusim tripela de bilong trening wantaim nogat bagarap pastaim.

Em i tok ol sedo pilaia bai inap long kisim ples bilong ol lain i stap long skwat sapos ol i no kamap gut long tren.

Rooney i tok tu olsem sapos ol pilaia i no kamap long trening na i no toksave long asua bilong ol bai i lusim ples bilong ol long skwat tu.

Ful Swat bilong Southern Traders em Richard Pangkatana, Anthony Pangkatana, Carl Hoot, Eddie Wesley, Isidore Tiriman, Ben Kote, Ajay Sabumei, Willie Rikis, Jonathan Kairu, Aaron Mui, Cecil Davani, Willie Petalie, Julius Taunao, Ellison Kalimet Junia, Jack Maraha, Keith Puaria, David Camillus, George Hoki, Otto Livua, Greg Wakore, Steven Batia Junia, Navu Maha.

Ol sedo pilaia em Jacob Jesse, Barley U'pono, Steven Vegogo, Joel Koel na Asi Vele Tola.

Long wankain taim ol "Islanders" i makim pinis tim bilong ol tu we i gat planti ol ekspirien pilaia olsem Pukpuk winga, Kevin Vitolo na senta Raymond Romalus wantaim planti nupela ol stail pilaia i stap long skwat we ol i makim bihain long Bismarck Cup salens long Kavieng.

Ragbi lig pilai bilong ol skulboi i strong yet

SKUL bois Ragbi Lig long Pot Mosbi i pilai sampela gem long Tunde na Trinde long traim na pinisim sampela ol raun i stap yet.

Siaman bilong Skulbois Ragbi Lig kompetien, Iffysoe Segeyaro, i tok skul bilong ol manki em i bikipela samting olsem na ol bai putim ol gem i go long we long taim biong wokim ol tes na eksem olsem na ol bai yusim ol holide long pilaim sampela ol was-aut gem.

Em i laik ol kosa bilong wanwan skul tim long givim nem bilong 3-pela o 4-pela pilaia bilong ol i go long pilai insait long wanpela "Possibles versus Probables" salens bihain long dispela yia.

Em i laik ol skul boi i mas pilaim wanpela keten resa pilai bipo long dispela Australian Junia Kangaroos na PNG President's 13 gem long Oktoba 16 o 17 long Pot Mosbi.


Long dispela gem bai i gat tupela tim bilong foapela divisen: anda 12, 14, 16 na anda-18.

Nau yet i gat 72 tim i save pilai olgeta wik long Pot Mosbi Ragbi Lig fil na Kone Tigers pilai graun taim ol i bin stop long pilai long Murray Barracks.

Dispela kompetisen i kisim ai bilong ol niustain bilog Australia na biknem ragbi lig tim, Brisbane Broncos.

Ol opisa bilong Broncos i tingting long kam antap na helpim long developim dispela spot long kantri.

Segeyaro i laik pinisim kompetisen long Novemba tasol nau yet em i nogat wanpela taim we ol i makim long pilaim ol fainel gem bilong wanem em i laik long makim ol narapela tim long makim ol manki bilong ol long soim ol skil bilong pilai.



WANTOK Spots



Millenum Brothers laik winim POM lig

Paul Zuvani i raitim

MILLENUM Brothers hap bek na kepten Richard Sinamoi i bilip nau em i taim Brothers i mas winim Pot Mosbi ragbi lig gren fainel.

Las taim Brothers A gred tim i winim gren fainel em long 1982 na dispela ol i ting em i longpela taim tumas. Em 22 krismas i go pinis.

Nau yet gupela sapot i wok long kam long ol pilaia blong 1982 pilai- Robert Akunai, Tom Jones, Wayne Nori na planti moa ol arapela pilaia.

Brothers i bin traim gen long 2000 tasol i lus long dispela wankain tim Souths.

Wantaim hangre bilong winim gren fainel ol bai i no laik givim sans gen.

"Kem bilong mi i bung gut na mi bilip mipela bai mekim samting stret-winim gren fainel," Sinamoi i tok.

"Wantaim gupela pilai mi no ting em bai i hat long i win. Long win mipela bai pas long ol bikpela samting; holim gut bal, difen na takol gut na mas mekim ol ron bilong mipela," em i tok.

Em i gat ol strongpela pilaia na wantaim helpim bilong ol sinia pilaia olsem Solomon Hui, Raphael Mua na Kumul pilaia Andrew Norman Sinamoi i ting em i gat tim we i ken kamapim gupela pilai.

Long said bilong bagarap em i gat winga Wilfred Henry husat i gat bagarap long han bilong em. Henry i gat liklik bruk long han long pilai bilong ol wantaim Post Waliya las Sande.

"Sapos nogat mi gat wankain skwat we i bin pilai las wik. Mipela bai putim wankain pilai we mipela i bin putim long winim Waliya.

"Na Souths i save laik long putim ol poin long skoa bod tasol mipela i no wari. Mipela i bin dro long fes raun na winim ol long namba tu raun na olgeta dispela taim mipela i bin kam bihain long mekim.



NRL gren fainel: Em nau taim bilong gren fainel. Andrew Ryan na Craig Fitzgibbon i soim eksen liklik long bikpela salens tim tupela em Bulldogs na Roosters bai mekim long Sande apinun.

Tasol Sinamoi i tok em i no lukdaun long Souths. Em i save Souths em wankain strongpela tim na em bai i no inap tokim ol manki bilong em long sanap na lukluk tasol.

"Mipela bai putim gupela pait," em i tok.

Ful skwat bilong em em fulbek Nixon Nagle, winga Godred Luke, senta Benjamin John na Andrew Norman, Mua, Sinamoi yet, Hui na Leonard Tarum long prop, Eddie Wamp,

Sparky Luigino, Tony Mote na Chris Lome. Henry i kisim bagarap na tim bai wet inap tumoro sapos ol bai larim em i pilai o nogat. Kosa em Raymond Carl.

Tasol long nem Souths em i no save abrus long ol gren fainel bilong Pot Mosbi ragbi lig.

Dispela tim i winim gren fainel tripela taim olgeta (1999/2000/2001) na stat long 1998 ol i wok long kamap long gren fainel i kam inap nau.

Dispela Sande ol bai kamap gen na traim wantaim Brothers.

Souths kosa Salosi Druma bai i no inap tingting planti taim ol pilaia bilong em i kisim ples long pilai graun.

Ol i gat eksperiens, save na strong bilong holim bal na ron na i save long sanapim strongpela banis.

Sapos ol i mekim olgeta samting stret na daunim namba bilong ol asua bilong ol dispela pilai em i

bilong ol.

Ful skwat em fulbek Samuel Nap, Elizah Anton, Roy Thomas, Paul Brendon, Alois Ambur, Robert Hame, Andrew Mekewa, David Kaiabe, kepten John Pandia, Tony Bare, Joseph Omai, John Freway na James Rekisa. Risev em Nelson Wanga, Howard Haugh, Mali Tomber. Kosa em Salosi Druma.

Kimbe i mekim
gut long Flame
Nesenel Junia
Netbal sempionsip

Joe Ivaharia i raitim

LIKLIK taun Kimbe i stilim ol pilai taim em i winim ol bikpela taun olsem Pot Mosbi long stat bilong Nesenel Junia Netbal sempionsip long Pot Mosbi.

Long Tunde namba wan de Kimbe i winim ol pilai long anda 13, 17 na 21 division. Wewak tasol i winim long anda 15 divison.

Dispela ol junai divison pilai i go het yet long aste na nau bai pinis wantaim ol gren fainel.

Long tumoro i go inap long Sande bai ol sinia divison pilai bai kamap. Dispela ol pilai em Poreporena Netbal Asosiesen i lukautim na ol i holiim ol pilai long St Hubert Murray Stedum long Konedobu.

Moa long 1000 pilaia long ol wanwan asosiesen long kantri i kamap long pilai.

Las wik Goodman Fielder Intanesenel kampani husat i save kamapim wankain rais bilong kaikai "Flame rais" i givim bikpela sapot long sponsarim dispela sempionsip.

Long taim bilong makim dispela bikpela sponsasip bilong "Flame Rais" maketing menesa Rockey Acot i tok kampani bilong em i amamas long givim sapot long wanem dispela gupela wokbung wantaim PNG Netbal Federesen i wok long kamap gut long olsem kampani i amamas long sponsarim dispela sempionsip.

Presiden bilong PNG Netbal Federesen Emily Taule i tok tenkyu long GFI long sapot bilong ol stat long 2000 i kam inap nau.

Taule i tok dispela yia em i bikpela sponsasip tumas we i karamapim olgeta samting olsem long ol tropi, transport, yunifom bilong ol refri na opisel na ol pilaia yunifom bilong Poreporena Netbal Asosiesen wantaim ol opisel tu.

Wantaim dispela ol samting kampani i givim tu flem rais na flem self-resing flawa bilong kuk na kaikai long ol wanwan haus long Hanuabada long lukautim ol pilaia i kam long ol narapela ples.

Presiden Taule i tok moa long 15pela asosiesen namel long 18pela asosiesen husat i afiliet wantaim PNGNF i kamap long pilai. Ol asosiesen em Madang, Mala-Sub, Oro Country, Wewak, Lahi, Alotau, Popondetta, Morobe Country, Kerema Taun, Kimbe, Lorengau, Hiri, Sentral, Pot Mosbi na Poreporena.

Presiden Taule i tok tenkyu i go long Motu-Koita Lokel Level Gavman long givim tok orait long yusim Stedum.

Long taim ol pilai i wok long kamap PNG Netbal Federesen bai holim enuel jenerol miting (AGM) bilong em long tumoro Fraide.